

lêkolîn

ROHAT ALAKOM



Folklor û jinên kurd



NEFEL

www.nefel.com
info@nefel.com

Folklor û jinêن kurd

Folklor û jinên kurd

ROHAT ALAKOM

NEFEL

Stockholm

2002

www.nefel.com
info@nefel.com

Rohat Alakom: Folklor û jinê kurd

Weşanxane: Nefel
Sandfjärdsgatan 10, 11 tr.
120 57 Årsta / Sweden

www.nefel.com
info@nefel.com

© Rohat Alakom û Nefel

Çapa dîjital: 2002
ISBN: 91-973195-5-4

Çapa kevin: Nûdem

Grafika pirtûkê: Arif Zêrevan
Wêneyê nivîskarî: Arif Zêrevan

Bêyî destûreka nivîskî ti kes nikare vê pirtûkê ji nû ve
bi ti awayî çap bike, kopî bike yan li ber wê zêde bike.

Çênabe ko ti kes fayla vê pirtûkê kopî bike
û di Internetê de bêxe malpera xwe.

Nêverok

Pêşgotin	7
-----------------------	----------

— BEŞ I —

Çirokbêjiya kurdî û xelasiya jinan	13
Welatê hat û nehatê	13
Keçêن padışahan	14
Çembera dora jinan teng dibe	16
Motîva »keça aqîl«	17
Komên jinêن xirab	19
Jinêن destgiran	25
Çend çirokêن jiyana rastî	25
Jinêن wekî rawiran	27
Jinêن çirokî	31
Tekoşîna jinan	33
Serkanî	36

— BEŞ II —

Di gotinê pêşîyan de zihniyetên jinparêz	43
Jin kaniya jiyînê ye	43
Jin wekî avakara malê	44
Cihê dayikan tijî nabe	45
Wekheviya jin û mîran	46
Motîva jina baş û jina xirab	48
Salêن keçîniyê	49
Şerê bûk û xwesûyê	51
Neçariya jinebiyan	52
Protestoke dijî pirjiniyê	53
Jin û namûs	54
Serkanî	57

— BEŞ III —

Di destanê kurdî de serdestîke jinan	67
Di destanê kurdî de struktura bingehî – dijayetiya sêserî	67
Dijminên du dilan û çar çavan	72
Çend keçperî û pirejin	73
Jin di rêke rast de dimeşin	74
Ji bo mîran danîna çend merc û hoyan	77
Çîma mîr dikevin rola şivanan	78
Sînorênen namûs û bênamûsiyê	79
Nefreta kontra-mîlîter	82
Welatê şahiyê	85
Serkânî	88

— BEŞ IV —

Di stranê kurdî de navçêke erotîk: memik	95
Peyveke erotîk: memik	95
Pêşkêşkirina memikan	97
Barîkatênen edebî û memik	101
Fonksiyonênen memikan yên din	102
Motîva »mîrén ji heqê memikan dernakevin«	107
Formênen memikan	109
Gîhiştina memikan û serhildana wan	114
Guhastina formê memikan	117
Dizênen memikan û micizeya vebûna bişkokan	117
Cenga li ser memikan	121
Çend motîfên dînî û memik	122
Peydabûna temaya »jinên memikfiroş«	124
Serkânî	127
Bîbiliyografiyaya folklorâ kurdî	131

*Kesê orta du dila û çar çavan xeber dide;
bila xêrê-wayê qet nebîne!
nifireke kurdî*

Pêşgotin

Rengînî û dewlemendiya folklorâ kurdî ji zû da bala rohilatnas, kurd-nas, folklorîstan û gelek kesên mayî kişandiye ser xwe. Mirov nikare folklorê tenê wek çend berhemên hinerî bihesibîne. Folklor serboriya civatekê ya dîrokî, civakî û hinerî ye. Folklor pêşketina zimanê wê ci-vatê nîşan dide. Ev yek hemû di nav folklorê de gihiştine hev, di nav hev de hatine honandin, di dawiyê de defîneke çandî pêk anîne û bûne serkaniyêن xurt. Akademîsyen û pisporê folklorê yê ermenî A. T. Ganalanyan vê dewlemendî û rengîniya folklorâ kurdî wek »ansîklo-pediya civata kurd ya jîyînê« bi nav dike. Ji ber vê yekê mirov nikare peyva folklor û jîyînê ji hev bide cida kirin. Mirov dikare bibêje ko folklor bi xwe jîyîn e, lê belê jîyîneke ko hiner û edebiyat ji xwe re kiriye pêlekan. Ew jîyîna rojane ko em di nav de ne, dem-dem rûsar e, carcar bîna mirovan teng dike, rijî, bêtam û bêlezet e, bi saya folklorê jixwe ev jîyan xweşiktir û bedewtir bûye. Ev sînorêن jîyîn, folklor û be-dewiyê bi alîkariya imkanêن hinerî çawa em dibînîn her diçin tenik, zirav, barîk dibin, ji nû ve têن honandin û ristin.

Folklor wek neynika civatekê ye. Mirov dikare bi saya vê neynikê, ci-vatekê baştir nas bike û bi hêsanî dikare xwe bigihîne kûraya sedsalan. Ji aliyê din, folklor him ji bo ziman, him jî, ji bo edebiyateke nûjen, bingeh û defîneke mezin e. Lê mixabin di nav kurdan de ev defîne, heta niha veşartî û sergirtî maye. Mimkin e ko rojekê ji rojan ev defîna giranbiha û hêja ji holê rabe, winda bibe û di ro de here. Hêz û hin dorberên polîtîk yên zordest jî li Tirkîyê xwe vê yekê dixwazin û hewl didin ko hemû hebûnêن çanda kurdî ji nav rakin, bihelînin. Li

Kurdistana Tirkîyê ji ber rewşa siyâşî, ji ber zordestî, qedexekirin û tunebûna imkanan, nimûneyên folklorâ kurdî him ne hatine berev kirin, him jî li ser van berheman kar, xebat û lêkolînên zanistî nehatine pêk anîn. Ji ber van dijwariyan folkora kurdî îro baş nayê nasîn. Ronakbîr, nivîskar û folklorîstê kurd divê li pêşıya vê sefera wêrankirinê, kambaxkirin û xizankirinê bisekinin. Çi dibe bira bibe, pêwist e ew her nimûneyeke folklorâ kurdî derbasî ser kaxiz bikin. Ev kar dîsa dikeve li ser milên kurdan.

Folklor, carina wek *edebiyata devkî*, carina jî wek bi *zargotin* jî tê bi nav kirin. Folklor mirov dikare bibêje ko edebiyateke kollektîf e, xelkê bi xwe ev edebiyata afirandiye. Nivîskarê vê edebiyatê tune ne. Ev edebiyata bi salan li ser zar û ziman maye, xwe parastiye, xwe nû kiriye, dewlemend kiriye û bûye malê xelkê kurd. Folklorâ kurdî, çawa em dibînin ji van hemû qonaxan re derbas bûye, hatiye gihiştiye van rojêن îro û beşeke çanda mirovahiyê pêk anîye.

Ev lêkolîna me, tenê li ser beşeke folklorâ kurdî hatiye pêk anîn. Mirov dikare bibêje ko xebateke bi sînorkirî ye, tenê di nav folklorâ kurdî de cihê jinan û motîvên ser tema jinan nîşan pêşkêş dike. Vê lêkolînê hemû nimûneyên folklorâ kurdî, ji xwe re nekiriye materiyal, nedaye li ber çavan. Tenê me nimûneyên xwe, ji nav çîrok, gotinê pêşıya, destan û stran wek ji nav çar beşen bingehî hilbijartiye.

Giringiya vê xebata piçûk ew e ko li ser folklorâ kurdî lêkolîneke bi zimanê kurdî tê çêkirin. Ji aliye din, xebat bi xwe jî li ser babet û tema jinan e, bi vî tehrî mirov dikare bibêje du rûçikêne vê pirtûkê hene: *folklor û jin*. Ev herdu babet di vê pirtûkê de ketine zikê hev, hev dewlemend kirine. Xwendevan ji alîkî de dikare nasiya xwe bide folklorâ kurdî, nimûneyên vê folklorê tam bike, ji aliye din bi saya hin berhemên folklorîk derbarê cihê jinan û rewşa jinan de dikare zêdetir agahdar bibe û zaniyariyên xwe pêş da bibe. Ji aliye din dema ev pirtûk hate berçav kirin, xwendevanê bibîne ko, jinan di nav folklorâ kurdî de ji xwe re textek ava kirine û serdestîke (hakimiyet) wan heye. Bi kurtî mirov dikare bibêje ko gotin »gotina jina« ye. Ev lêkolîna, ji aliye din dikare bibe cesaret û referanseke piçûk ji bo lêkolînê mayî.

Di dawiya vê pirtûkê de lîsteke ko ji xebatê li ser folklorâ kurdî pêkhatî jî cih girtiye. Xwendevan û kesên ko dixwazin zêdetir li ser folklorâ kurdî agahdar bin, ev bîblîyografiya piçek be jî dikare ji wan re bibe alîkar, kêrî wan bê. Her çiqas vê lîstê hemû materiyalê (wek

pirtûk) li ser folklorâ kurdî nehilçandiye jî, lê belê em dikarin bêjin ko navên piraniya pirtûkên ko heta niha li ser folklorâ kurdî çap bûne, di vê bîblîyografiyê de cih girtine.

Wek her xebateke nû, sedî sed kêmasiyêne vê lêkolîna me jî hene, babetê ko ji ber çavêne reviyane hene. Eger xwendevanêne me yên ezîz, li ser van kêmasî û valahiyan me agahdar bikin, bêguman em ê gelekê kêfxweş û dilşa bibin. Çawa tê zanîn nivîskar û xwendevan gelekê hewcedarî hev in. Bê hev nikarin bijîn.

Stockholm, 1993

Rohat Alakom

— BEŞ I —

Çirokbêjiya kurdî û xelasiya jinan

Di nav folklorâ kurdî ya devkî de dewlemendîke here mezin bêguman çîrok in. Çîrok beşike folklorê ye, nivîskarê wan ne kivş in, gel bi xwe ev berhem afirandine. Carcar di weşanên perîyodîk de, peyva çîrok li şûna serpêhatiyan (kurteçîrok) jî tê bi kar anîn, lê belê ev yeka ne rast e. Ji ber ko nivîskarê serpêhatiyan kivş in. Serpêhatî berhemên nûjen in, bi tehr û naveroka xwe ve ji çirokan gelekê cida dîbin. Ev yeka di warê navkirinê de tevlihevîke mezin di zimanê kurdî de peyda dike. Carcar van herdu berheman re jî çîrok tê gotin. Pêwist e ev pirsa terminolojiyê bê çareser kirin û divê her tişt di cihê xwe de rûnê.

Her çiqas heta niha çend berevokên çîrokê kurdî hatine weşandin jî, mirov îro nikare bibêje ko piraniya çîrokê kurdî îro derbasî ser kaxizê bûne. Bedewiya çîrokê kurdî çawa em dibînin bala gelek rohilatnas û kurdناسنەن کیشاندیسەر xwe û ji van çirokan beşek bi zimanê biyanî der çûne, hatine wergerandin.¹ Dema mirov bi çavekî zanistî, rexnevanî û lêkolînî li çîrokê kurdî mêze dike û babetên wan analîz dike, mirov wê çaxê dibîne ko, ev berhem, efrandinên gelî, wek destanên kurdî, gotinên pêşîya û stran ji me re dewlemendîke jîyîna folklorîk pêşkêş dikin. Ev berhem li me şîretan dikin, rê nîşanî me didin û me di nav fantaziyêng rengîn de dihêlin. Fantazî, xewn, xewnerojêng sedsalan di nav van çirokan de her çûne dewlemend bûne. Beşek ji wan bi rastiyêng jîyînê ve gihiştine hev, ji aliyê mirovan de têgi-hiştina jîyînê zêdetir hêsanter kirine. Di vî warî de çîrokê kurdî gelekê hînkar û şîretkar in. Di van çirokan de li dijî bêgavî, neçarî, tunebûn û xizaniyê, çawa em dibînin imkan û mecalên nedîtî, nebîhistî ji aliyê mîrxasên çîrokî de têng afirandin. Di nav van berheman de ew şerê pakî û nepakiyê, qencî û xirabiyê, xweşî û nexweşiyê her diçê tûj dibe. Her çiqas dilsar û rûsar be jî, dawiya beşek van çirokan carcar bi mirin û kuştinê diqedin. Ew şer û dew, teqereq, serpêhatî, bûyer û qew-

mandinêñ mezin yên ko di çîrokêñ kurdî de têñ pêşkêş kirin, ji alîkî de jî wek neynikekê, janêñ civatê, serêsiyêñ civatê û rewşa civatê nîşan didin. Pêwendî û hevgirêdanêñ mirovî radixin ber çavan. Di çîrokêñ kurdî de gelek erf û edet, rêvaçûn, karekter, nêrîn û dîtinêñ ser jîyînê hene. Civatê bi rêke hinerî, artîstîk, bi alîkariya zimanê çîrokan daxwazî û hêviyêñ xwe yên sedsale ji nû ve ji civatê re pêşkêş kiriye. Civatê bi dirêjahiya salan, bi hezaran çîrok afirandiye, angorî sal û zemanan hewcedariyêñ me yên hinerî bi cih aniye, di vî warî de em têr kirie. Hinera çîrokbêjiya kurdî di jîyîna rastî de nîn be jî, qet nebe ji me re cihaneke çîrokî wek xelat û mîrate hiştiye, pêşkêş kiriye.

Dema em naveroka çîrokbêjiya kurdî raçav dikin, em dibînin ko gelek babet û motîvên ji hev cida di nav van berheman de hene. Dewlemendiya motîvan nîşanî me dide ko civat ji her aliyî ve bûye babeta çîrokan. Mirov nikare peyvîn çîrok û civatê ji hev cida bike.

Di nav çîrokêñ kurdî de motîveke zêdetir hatiye bi kar anîn, bêguman rewşa jinan e. Di nav van berheman de babeta jinan motîveke here rengîn e, bi taybetî xelasiya jinan. Ev çîrokêñ kurdî, ji salêñ kevnare vir de derbarê rewşa jinan, cihê wan, berpirsiyarî û erkêñ wan de me gelekî ronî dikin. Çîrokbêjiya kurdî di vî warî de serkanîke gelekî bi kêrhatî ye. Ji bo lêkolîn û xebatêñ ko li ser jinêñ kurd têñ kirin, ev çîrok wek sermayeke mezin di vî warî de dikarin bêñ hesibîn.

Dema em naveroka van çîrokan bi kûrahî hûr-hûr dikolînin, em di dibînin ko civata kurdî, timê rûmet û cihekî mezin daye jinan. Jinan di pêwendiyêñ jin û mîran de, di warê mîrkirin û zewacê de timê roleke mezin lîstine. Ji aliyê din civatê hemû jin nexistiye tayekî teraziyê, jinêñ baş û jinêñ nebaş angorî normêñ wan sal û zemanan ji hev cida kirie. Bi nêrîn û çavêñ mayî li van herdu komêñ jinan mîze kiriye. Jinêñ baş rûspî kiriye, jinêñ nebaş rûreş û rûtenî kiriye. Civatê pîvanêñ başî û nebaşiyê, angorî xêra civatê, malbatê, angorî xêra zarokan û angorî xêra xelasî, azadiya jinan kivş kiriye. Jinêñ baş, çawa em di dawiya çîrokan de dibînin, xêr û xweşî li ser wan de dibare, ew ji ber destê zordestan xelas dibin û difilitin. Pirsa xelasiya jinan di nav çîrokêñ kurdî de babeteke here berbiçav e. Di dawiya her çîrokekê de ew bi dilketiyêñ xwe ve dibin yek, diçin digihêjin mirazê xwe û bi hev şâ dibin. Jinêñ nebaş jî, di dawiya çîrokê de gelek caran cezayêñ xwe dibînin û têñ kuştin. Di vê babetê de her çîrokeke kurdî mirov dikare bibêje heqî û adaletê belav dike.

Welatê hat û nehatê

Dema em avahî û hevsaziya çîrokên kurdî mêze dikin, gelek caran mîr dema dixwazin bizewicin, ji xwe re keçekê bînin, ew xwe davêjin nav agirêñ mezin. Ji bo jinan canê xwe didin, tirs û xofê davêjin alîkî. Dema mirov li ser vê yekê hûr û kûr difikire, mirov dibîne ko civatê jin ji ser her tişti re girtine. Angorî dilketiyê mîrîn, tu dibêjî ji jinê şirîntir tu tişteki şirîn li rûbarê dinê tune ye, timê dibeze... Bi saya van berheman mirov fîr dibe ko civatê qîmetekî cawa mezin daye jinê. Ji bo ko xwe bîghînin dilketiyênen xwe an jî »hisnil cemal« û »hisnil delal« ên xwe, ew diçine seferên dûr û dirêj. Ew berê xwe didin oxirê û dinê, pişta xwe didin felekê, terkeserî, terkeselatî dinê dibin, çol û çolistan, berî û beristan... Bi dinyayê dikevin. Ev beza, di dawiya her çîrokekê de dibe xelasiya jineke dîlgirtî, perîşan û neheqîke mezin lêbûyî. Di çîrokên kurdî de ev keçen şeng û şepal bi ifadeyên gelekê hêja ve têن pesinandin. Ev »hisnil cemal« û »hisnil delal« bi taybetî keçen gelekê ciwan û bedew in, wek horiyan in... Dema çavên mirovan li wan dikeve, heft rojan nan û av nayê bîra mirovan, ne bike, ne bixwe, ne bide ne bistîne, bedewiya wan mîze bike. Ji royê re dibêjin dernekeve, emê derêن, bil dilekî na, hezar dîlî mirov dibe evîndarê wan. Ew carcar wek hîvên çardeşevî ne, wek lempan dişuxilin... Angorî çîrokên kurdî, mîrîn bengîn ji bo van canikan, zerîyan dikevine riya *welatê hat û nehatê, welatê çûn û nehatê*. Menzila ko van kesan dane pêş xwe, bi tengasî, dijwarî û bi derd û kulan ve tijî ye, vegera wan ewqas ne hêsa ye. Ji bo vê yekê jî navê vî welatî, danîne »welatê hat û nehatê«. Ew kesan diçin derdikevine welatê dêwan, cinan, canpolatan, telûkeyêñ mezin li pêşberî wan hene. Mirov gavêن xwe bi pîvan û bi fesal nevêje, mirov dikare bibe kevir jî... Gelekê caran ev rê, wek riya mirinê tê hesibîn. Gelek kes diçin derdikevine li paş çiyayê Qaf, diçin welatê Çîn û Maçînê, li gelek welatên çîrokî digerin. Ew diçin li dinyayê digerin, ji vê rîwîtyê re dibêjin »seyranga dinê« û »dewra dinê«. Ew rûbarê dinê serobino dikin. Di vê rîwîtiya dûr û dirêj de, ew carina rastî »destebirakan« têن, aqil û cesaret didine hev, diçin, dîghêjine menzila xwe. Di destpêkê de mirov dikare bibêje ko ew kerên şeytîn siyar dibin. Dê û bavêن wan jî gelek caran naxwazin lawêن wan derkevin, herin ji bo »porserekê« terkeserî dinê bin. Dema em dawiya çîrokan dinêrin, qet jî wisan dernakeve. Her çiqas ew gelek

çetnayan, dijwariyan dibînin jî, di dawiya çîrokan de, ew wek bûk û zava, bi serfirazî cot vedigerin malên xwe û bi mirazê xwe şâ dixin.

Ew mîrên ko diçin vê sefera zewacê, çawa em ji çîrokan fam dikin gelek felaket û bela têr serê wan. Ew gelek cefayêن giran dibînin. Hin caran mecbûr dixin dikevin gelek dilqan û hin »kincêن« cida xwe dikin. Ev beşä teqereqê, di çîrokan de beşä here bingehî dikare bê hesibîn. Lê belê ew ji heqê hemû van dijwariyan derdikevin, dixin xweşmîr û cengawerêن bi nav û deng. Ew nayêن kuştin. Wek misal di çîroka *Herzemê Qolan* de, Herzemê Qolan, diçe him xuşka xwe, him jî hersê birayêن xwe rizgar dike, tîne. Ji aliyê din zora gelek hêzên mayî jî dibe, agir li ber çavêن wî dipeke, di dawiyê de ji xwe re *Xuşka Dinyayê* tîne.² Mîrxasê yekemîn timê pêşengiya birayan, destebirakan dike. Lê mixabin, di dawiya çend çîrokan de ji tirsan, ji çavnebariyê û ji ber çend sedemên mayî, bêbextik tê serê mîrxasê çîrokê yê yekemîn. Metoda here nas, wî davêjine bîrekê. Lê belê ew rêkê dibîne, difilite û heyfa xwe ji wan kesên bêbext distîne.³ Kesên wî xelas dikin, çawa em dibînin bi taybetî koçen bazirganan in.

Keçen padişahan

Di nav van kesên ko terkeserî dinê dixin de ji bo keçekê ji xwe re bibînin, bi wê re bizewicin, gelek kesên şivan, gavan, kesên belengaz û xizan hene. Piraniya wan hewl didin, bi keça padişah û paşan re bizewicin. Ji ber van bêgavî û neçariyan, di nav çîrokêن kurdî de çîrokê ko li ser padişah, paşan û hakiman cihekî fireh digrin. Çima padişah, paşa û hakim? Bi van keçen bavdewlemend re zewac, wek rêke xelasiyê hatiye dîtin, ew dixwazin ji wê belengaziya ko ew di nav de ne, zû xelas bibin û rojekê bibin zavê kesên dewlemend, pişta xwe xurt bikin. Her çiqas ev karekî dijwar û çetin be jî, dîsa jî ew diçin an ji kesên mayî disînin xwazgîniyê keçen padişahan. Ji aliyê din motîva belengaz û padişah wek dijayetikê di çîrokê de kelecanî û meraqeke mezin peyda dike. Ew diçin doza mirovatiyê li padişah dikin. Çawa em di çîrokêن kurdî de dibînin, di wan salêن kevn de, kesekî ko biçûya xwazgînî, berê diçû li ber qonaxa padişah li cihekî taybetî rûdinişt, ji vî cihî re digotin »kursiyê xwazgînî«. Di çend çîrokê mayî de jî, jê re »textê xwazgînî« û »kevirê xwazgînî« hatiye gotin. Ev kursî zêrkirî bûye. Ev kursiyê zêrkirî tenê bona kesên têr xwazgînî, hatiye saz kirin.

Kursîkî zîvkirî jî heye, ev kursî jî tenê bona daxwaziyêن mayî hatiye çêkirin. Zengilek jî li ber vî kursîyî hebûye, bi alîkariya vî zengîlî padişah agahdar dibû wekî xwazgîniyê keça wî hatine.

Dema kesekî belengaz here li padişah doza mirovatiyê bike, padişah çend mercên (qewl, hoy, şert) nedîtî, nebîhistî û ecêb pêşberî van kesan datîne, çawa dibêjin »ne min dîtiye, ne jî tu bibise!«, ewqas mercen giran bûne. Ev mercan di wan salan de li şuna qelend hatiye hesibîn. Bicihanîn, pêkanîn û qedandina van mercan, karên mirovan nîne, wek misal di çîrokekê de kesê çûye xwazgînî pêwist e tone genim û çehê tevlihevkirî jî hev derîne, ji ber vê neçariyê, ew diçe li bal kurê padişahê mûriyan, ji wî alîkariyê hêvî dike.⁴ Eger ev kes daxwaziyêن padişah neqedînin, angorî çîrokan, padişah serê wan jê dike. Ji ber van karên giran, kesen diçin xwazgîniyê keçen padişah, xwe davêjine li ber bextê hêzên mayî, wek pîran, dêw, hût, keça padişah, hacetên tilsimî, wek şiva qudretê... Dema daxwaziyêن padişah bi cih têن, padişah êdî pêwist e keça xwe bide wî kesî.

Di van çîrokan de tiştekî balkêş jî, li hemberî van serhişkî û mercen padişah, keçen ko timê qencî û xweşiyê dixwazin, ew di riya bavê xwe de nameşin, gelek caran jî diwazin alîkariya wan kesen ko hatine xwazgînî, bikin. Ev keçan, bi vî tehrî wan mercen ko bavê wan pêş da danîne, jê re çarekê dibînin, hêsantir dikin. Di dawiya çîrokan de çawa em dibînin, ew dighêjin bext û mirazên xwe. Ev keçen padişah bi zanîn û bi çavekî mayî li dorberê xwe, li bûyeran û li dinê dinêrin. Ew gelek caran ya xwe dikin.

Ev dijayetiya padişah û keça padişah nav û deng e. Wek keça padişah, wisan jî çawa em di çend çîrokên kurdî de dibînin, kurê padişah yê piçûk timê di rêke qenc de dimeşe, mîrxas e, fedakar, rastgo û camêr e. Di çend çîrokên kurdî de wek gelek caran tê dubare kirin, bi taybetî sê kurê padişah hene, navê yê piçûk gelek caran Mîrze Memûd an jî Mîrze Mihemed e. Ji ber ko ew timê di rêke rast de dimeşin, bi qencî, bi mîrxasiya xwe ve têن nasîn, peyva »mîrza« jî, wisan tê bawer kirin ko jî aliyê civatê de bi zanetî li ser navê wan kesan de hatiye zêdekirin. Di nav çîrokên kurdî de gelek çîrokên ko li ser Mîrze Memûd û Mîrze Mihemed hatine gotin, hene. Ev herdu kes wek du mîrxasên çîrokî yên here navdar têن bi nas kirin, ew xelaskarêن jinê bindest in.

Mîrze Memûd di gelek çîrokan de terkeserî dinê dibe, diçe dikeve

nav gelek şer û dewên mezin, ji xwe re keçeke bedew peyda dike, tîne. Ji ber ko mîrxas, camêr e, gelek keçik timê li ser wî bengî dimînin. Dema ew bi keçeke mayî re mecbûr bimîne, razê, ew şûrê xwe datîne navbera xwe û wê. Ev yeka jî, helalî, paqîjî û dilovaniya Mîrze Memûd nîşan dide, ev şûr dibe nîşana helaliyê.

Çembera dora jinan teng dibe

Ji der keç û kurê padişah, vê carê padişah bi xwe jî dixwaze bizewice. Carcar, çav ber dide jinêxelkê, dixwaze bi jinê mayî re serê xwe bike yek. Her çiqas ew padişah be jî, çawa em di çend çîrokan de dibînin, karê peydakirina yarekê ewqas hêsa nîne. Gelek caran ew ji wezîrê xwe alîkariyê dibîne, wezîr dişîne li bal jinan. Di dawiya van çîrokan de çawa em dibînin, ji ber famdarî, hiş û dûrdîtiniya jinan, ev padişah bi hêsanî nagihêjin daxwazê xwe, lingê xwe dikin soleke teng û destê xwe dikin qûla mar. Di çîroka bi navê *Jin û Padşa* de, dilê padişahekî dikeve jineke mîrkirî. Mîrê jinikê leşkeriya xwe dike. Padişah dixwaze bi dek û dolav, bi fend û fêlan ve him jinê, him jî mîrê wê bixapîne. Lê dema mîze dike ko jinik nayê rayê, naxwaze bi wî re razê, di dawiyê de him jinikê, him jî mîrê wê dikuje.⁵ Ew helaliya ko di navbera jin û mîr de heye, dibe kakilê naveroka gelek çîrokan. Di çîroka *Jina Wezîr Ya Aqîl* de padişah nagihêje daxwaza xwe. Dema padişah mîze dike, wezîr ne mal e, diçe mala wî, hin giliyan ber jinikê re davêje, jinik nêta wî fam dike û çend hêkan bi rengê cida boyax dike, datîne pêş padişah. Paşê ji padişah dipirse wekî tama kîjan hêkê zêde ye, dema padişah dibêje tama hemûyan wek hev e, wê çaxê jinik nêta padişah dide rûyê wî, dibêje jin jî hemû wek hev in, bi sergirtî dibêje ko, dest ji min berde, jin wek van hêkan hemû yek in.⁶ Ji ber vê bersîva jinikê, êdî ji destê padişah tiştek nayê, padişah bi poşmanî paş da vedigere û diçe qonaxa xwe. Di hemû van çîrokêni vî tehrî de jî çawa tê xuyan, mal û milk, dewlemendî, pere û pûl ewqas ne giring in, pêwendiyêni mirovî, helalî, rastî û pakî timê di van çîrokan de serdi Kevin.

Gelek çîrokêni kurdî jî, li ser melayan hatine gotin. Di van çîrokan de pêwendiyêni melan û jinan cihekî fireh digrin. Gelek ji van çîrokan kurt in û wek pêkenokan hatine gotin. Civatê bi melan qirf û tinaz kirine, bi alîkariya van çîrokan ew rexne kirine, berpirsiyariya wan aniye bîra wan. Çawa tê zanîn di civata kurdî de, ji ber olê islamiyê ci-

vatê timê baweriya xwe bi melan anîne, cih û rûmeteke mezin dane wan. Melan jî, ev baweriya xelkê gelek caran bedkar kirine. Di çîroka *Gulê û Çûko* de, li ser kaniyê jina mele timê dikeve dora pêş, jina gavîn jî vê yekê aciz dibe, gazinan li mêtê xwe dike, jinik dixwaze mêtê wê jî bibe mele. Gavan kincên melan xwe dike, terkeserî dinê dibe, bûyerên mezin têr serê wî. Ew diçe Serhedê navê wî gelekî belav dibe, gavan dibe melakî navdar, jina wî jî dibe jinseyda.⁷ Çawa em di çend çîrokan de dibînin, çavê melan timê li jinêñ kesêñ mayî in, çavê wan timê li der in. Gelek caran xwe vedîşerîn, bi vî tehrî dixwazin nêzîkî jinan bin. Di çîroka *Terzî* de çawa em dibînin ko, ew, jina terzîkî ji rê derdixe, bi wê re dikeve kîfê.⁸ Her çiqas naxwazin jinêñ wan herin nav koma mêtaran, lê belê ew bi xwe timê dixwazin bi jinêñ mayî re bimînin. Dema daxwazêñ wan neyêñ cih, çawa em di çîrokêñ *Keçelok û qızıka Amûtam* de jî dibînin, ew dikarin şeran jî bavêjin jinan, navê wan xirab bikin.⁹ Di çend çîrokan de jî, mela zanînêñ xwe yên olî bi kar tînin, bi alîkariya duayan dixwazin jinan ji rê derxin, di dawiyê de dibin babetêñ pêkenokan, dema melek qala horiyan dike, pîrejinek jî derbarê »horîyêñ nêr« de ji mele agahdariyan hêvî dike.¹⁰ Tema meleyêñ jinbaz di nav çîrokêñ kurdî de temake gelek belavbûyî û navdar e.

Mêtren hesûd gelek caran dibin sedemê malwêraniyê û tûjbûna pêwendiyêñ jin û mêtaran. Mêtren hesûd timê wek naxwaşîkê şikê dibine jinêñ xwe. Babetêñ çend çîrokêñ kurdî li ser bingehêñ hesûdiyê ava bûne, hesûdî bûye babeta pêkenokan, çîrokan. Mêt di van çîrokan de têr rexne kirin. Jinêñ şîrhalal û dilpak timê di van çîrokan de rûspî derdikevin. Di çîroka ko *Meriv Bixwaze* de serpêhatiya mirovekî hesûd heye. Ew timê jina xwe pêkol dike, ew diçe kîderê, mêt dide pey, ew heta avdêstxanê jî dide pey jina xwe.¹¹ Di çîroka *Çavres Lingan Diweşîne* de, dema kesek dibe mêtvanê malê, bawîşkêñ wî têr, mêtê jinikê vê yekê wek nîşana pêwendiyêñ jina xwe û mêtvanê malê dihesibîne, şikê dibe bawîşkêñ mêtvan. Jina xwe bi kêranê hewşê ve dadiliqîne. Lê belê, paşê dema ew dinêre bawîşkêñ mêtvan berdewam in, armanc ne jin e, ew ji kirinêñ xwe poşman dibe.¹²

Motîva »keça aqîl«

Di nav beşek çîrokêñ kurdî de em rastî jinêñ zane, fêmdar, xebatbez, qenc, helal û rastgo têr. Ew timê di van çîrokan de têr pesinandin, di

gelek rojên teng û dijwar de dibil alîkarêن mêtren xwe, riyên qencyîê û xêrê datînin li ber mîran. Mêtren tiral, bêkêr û yên ko timê di mal de rûdinê û kar nakin, çawa em dibînin ji aliyê jinê xwe de têñ rexne kirin. Ev mêtren tiral carcar dibil babetên pêkenokan. Di dawiyê de jinê van kesêñ tiral, mêtren xwe davêjin ber dêrî, ew terkeserî dinê dibil, diçin tevî nav bûyer, teqereq û gelek qewmandinan dibil. Di çiroka *Eloyê Newêrek* de, mîrekî wisan tirsonek heye, timê li mal e, newêre derkeve derva. Rojekê jina wî mîze dike, êdî ev yeka awa nameşê, lîstikekê tîne serê wî. Jinik diçê derva katan li ber dêrî radixe û dibêje Elo hela rabe kate barîne. Dema Elo radibe, diçê dêrî vedike, li katan mîze dike, jina wî, tîne wî nişkêva def dide, dêrî digre û carke din venake. Paşê Elo neçar dimîne, diçê derdikeve welatêñ dûr, dibe dostê dêwan, dewlemend dibe, vedigere tê mala xwe.¹³ Çirokeke ko nêzîkî babeta vê çirokê ye, çiroka *Silêmanê Newêrek*.¹⁴ Di çiroka *Mêrê Şevê* de jî, mîrekî awa şil û şêt heye. Jina wî rojekê dibêjê, rabe şer derketiye, tu çima di mal de rûniştîyî, pêlî damara wî ya mîraniyê dike. Mêr mecbûr dimîne radibe şûr û mertalê xwe hildide diçê nava gund, lê belê çi şer, ci hal! Paşê dema mîrik vedigere tê mala xwe jinik dêrî lê venake, dibêje mêtren min çûye şer, xwe li nezaniyê datîne. Bi kurtî çirok paşê wek pêkenokekê berdewam dike.¹⁵ Wek van çirokan, di çend çirokêñ mayî de jî, angorî mîran, em rastî aktîfbûna jinan têñ. Mêtren ko dibil bayisê malwîraniyê û kambaxiya malê, timê têñ rexne kirin, jin jî wek stûna malê têñ pesinandin.

Motîfa »Keça aqil« di çirokêñ kurdî de, motîveke bingehî e. Gelek caran bi famdarî, bi zanîn, bi serwextbûna xwe ve, keç û jin zora mîran dibil. Di çiroka *Bav û kur* de, ji hêrsê kuran yek heramza (pîç) e. Dema kur diçine bal melakî wekî hîn bin, ji wan kîjan heramza ye, mela nikare jê derxe, keça wî tê hawariyê, piştî çend pirsiyaran kurê heramza tê kivş kirin.¹⁶ Di çiroka *Qîza serwext* de, serpêhatiya keçekê zane û famdar heye. Piştî gelek çetnayan ew dibe padişah, teyrê dewletê tê serê wê rûdinê.¹⁷ Teyrê dewletê, bêguman ji ber serwextiya vê keçikê tê serê wê rûdinê, wek xelatekê mirov dikare bihesibîne. Bi gotineke mayî bi vê motîva teyrê dewletê, civat vê keçikê pîroz dike. Di çiroka *Bûka agil* de, vê carê bûkek tîne yek û yek gazî bîst kesan dike, sêvekê dixe cêbêñ wan, her yekî re jî dibêje »ez te hez dikim«. Piştî ev hemû bîst kes diçin ji vê bûkê re paletiyê dikin, ew dibêje »de bixebitin, ez heyrana xorté sêv cêbê de«. Ji ber ko sêv cêba herkesî de

hebûye, hemû bi xîreteke mezin ve kar dikin, kar zûtirê diqedînin.¹⁸ Di çîrokeke mayî de, padişahek dixwaze kurê xwe bizewicîne, dilê kur dikeve keça gundiyelekî. Cara pêşîn, malbata padişah naxwaze bibin xînamiyê mala keçen gundiyan. Lê belê, padişah dema serwextiya keçikê dibîne, wê çaxê êdî bêgav dimîne, biryarê xwe diguhirîne.¹⁹

Komên jinên xirab

Di nav hin çîrokên kurdî de em rastî jinên wisan têr ko bi xirabiya xwe ve hatine nasîn, wek damarî, xwesû, hewî, jintî, dayîkên bêbav û dilbikevir... Ji van jinan gelek di dawiya çîrokan de cezayê xwe dibînin û têr kuştin.

Di nav hin çîrokên kurdî de motîveke here naskirî û mezin jî motîva damariyan e. Di van çîrokan de, rewşa wan zarokên ko diyên wan dimrin, dikevin ber destê damariyan, her diçin ber bi nepakî û xirabiyê diçe. Dilhişkiya damariyan tu sînoran nas nake. Gelek caran dikevin bin mîrên xwe, zarokan û bavê wan berî hev didin, zarokan li ber çavêن bavan reş dikin. Carcar bav di bin bandûr û gotinên van jinan de jî dimînin, wê çaxê êdî ji van zarokan re tu starek namîne. Ew timê lêdan, kutan, kotekan dibînin, tî û birçî dimînin, bi tirs û xofeke mezin ve dijîn. Di dawiya van çîrokan de, damarî ji aliyê civatê de, têr gunekar kirin û cezayê mezin dibînin. Di çîroka *Tûdî Quşî* de, damarîke wisan dilkevir ji aliyê zarokan de têr kuştin û cezayê xwe dibîne. Angorî çîrokê du zarokên kesekî gelek dewlemend hebûne. Bavê wan rojekê lêdixe diçe hecê. Ew, herdu zarokên xwe li ber destê vê jina xwe ya duwemîn dihêle. Ev jin, dema mîrê wê diçe hecê, ji xwe re dostekî nû dibîne, bi wî re rojên xwe derbas dike. Ev dostê wê dixwaze wekî jinik van zarokan bikuje, serê wan jê bike. Lê belê cariyeke vê malê hebûye. Ew, zarokan ji vê yekê agahdar dike, zarok ji serê xwe hildidin diçin cihekî dûr. Piştî ko mîrê jinikê ji hecê vedigere, qala kurên xwe dike, jinik dibêje ko zarok mirine. Çend sal derbas dibin, rojekê ev zarok dixwazin wek mîvanî herin serîkî bidin mala bavê xwe, hela ka rewşa wan çawa ye. Ew ji bavê xwe re behsa çîrokekê dikin, babeta çîrokê hema serpêhatiya wan bi xwe ye. Wê çaxê bav fam dike ko ev kesan zarokên wî bi xwe ne, her tişt êdî zelal dibe. Damariyê dikujin, wê cariyê jî didine bavê xwe. Di gelek çîrokên kurdî de, piştî xirabikê gelek sal derbas dibin, ew mîrxasên ko ji malekê ne û bi salan

ji hev dûr ketine, di nav çîrokê de besa çîrokekê dikin (çîroka jîyîna xwe) dikin, ev çîroka serboriya wan bi xwe ye. Piştî vê »çîroka nav çîrokê« her tişt derdikeve holê, bi vî tehrî imkana zanîn û hînbûna kesên xirab peyda dibe.²⁰ Ev »çîroka nav çîrokê« di çend çîrokê mayî de jî wek stîlekê, xemlekê tê bi kar anîn, ji bo zelalbûna mesaja çîrokê imkanekê mezin peyda dike. Di çîroka *Elik û Fatik* de jî dîsa êş û jana damariyan tê pêşkêş kirin. Ev çîroka, çîrokeke gelek naskirî û hezkirî ye. Li gelek deverên Kurdistanê belav bûye. Elik û Fatik navêن bira û xuşkekê ne. Piştî ko diya wan dimire, ew dibin sêwî, stoxar li ber dîwara dimînin. Dema diya wan dimire, bav ji nû ve dizewice, ji xwe re jinekê tîne. Ev jinbav keseke nebaş bûye, timê bi çavekî xirab li van zarokan mîze kiriye. Rojekê damariya van zarokan, wan dişîne çolê wekî ji wê re kerengan berev bikin, bînin. Binê tûrikê wan jî qûl bûye, çî kerengên berev dikin, ji vê qûlika tûrikên wan de tê xarê, nikarin tu kerengan bidin hev. Ew gelek diwestin, tî û birçî û bêxew dimînin, riya xwe şaş dikin û gelek tiştên nebaş têن serê wan, di dawiya çîrokê de ji wan her yek ji xwe re dizewice, dighêje mirazê xwe.²¹ Çîroka bi navê *Pepûk* ji aliyê naveroka xwe de gelekî nêzîkî çîroka *Elik û Fatik* e. Dema ew diçin ji damariya xwe re kerengan berev bikin, çawa me li jor jî got ji ber ko tûrikê wan qûlik bûye, imkana berevkirina kerengan tune bûye, zarok jî nizanîn wekî damariya wan bi zanetî tûrikekî qûl daye wan. Vê carê xuşk şikê dibe birayê xwe, ew hew dizane, hema birayê wê hemû kerengên berevkirî dixwe, carekê xelas dike, nizane ko tûrik qûl e. Ji ber vê yekê jî, ew dikevine qirika hev, bi hevra şer dikin. Angorî çîrokê, rojekê xuşka lawik tîne zikê birayê xwe diqelişîne, dixwaze mîze bike ko hela ka kereng hene an na. Di dawiyê de dibîne ko, tu kereng di zikê birayê wê de tune ne, vê carê gelek li berxwe dikeve, duayan li Xwedê dike wekî wê bike pepûk. Xwedê daxwaza keçikê tîne cih, wê dike pepûkekê.²² Gelek şax û guhartokên ser-pêhatiya van xuşk û bira hene, beşa dawîn ya her şaxekê jî, angorî her çîrokbej û deverê ji hev cida dibe. Li ser babeta damariyan çîrokeke here balkêş jî çîroka bi navê *Sûrîeyar* e. Angorî vê çîrokê, sê keçen mirovekî hebûne, piştî çend salan diya wan dimire. Berî ko diya wan bimire, ew ji mîrê xwe hêvî dike û dibêje mîrê xwe, dibeje dema ez mirim, te jineke teze anî, nehêle ew jin bi destê xwe ve zarokên min bixe, destekî min jê bike. Dema wê xwast zarokan bixe, bira bi vî destê min ve lêxe. Jina wî dimire. Jina teze, ango damarî dibêje mîrê xwe,

divê tu van zarokan bibî serê çiyakî bikujî. Mêrê wê her çiqas vê yekê naxwaze, rojekê mecbûr dimîne, wan dibe serê çiyakî dihêle, tê jina xwe dixapîne, dibêje min zarok kuştin. Bi vî tehrî, ev hersê zarok ji ber destê damariyê difilitin. Piştî çend salan ji wan keçan yek bi kurê paşakî re dizewice, xuşkên xwe li bal xwe cîwar dike, bavê xwe jî, efû dike, paşê hemû di nav xweşiyê de dijîn.²³

Çawa tê xuyan bêbaviya damariyan di nav çîrokên kurdî de, wisan jî di nav berhemên mayî de motîveke nav û deng e, wek misal gelek gotinên pêşıya hene ko li ser damariyan û zordestiyêwan yêni li dijî zarokan hene.

Ji der jana damariyan, motîveke »jina xirab« ya mayî jî jana xwesûyan e. Xasî jî wek damariyan gelek caran bi dilhişkî, bêwijdanê û bi neheqîya xwe ve hatine nasîn. Di çîroka *Bûka Gulsûn* de, xasîke wisan bêiman û bêbav heye. Rojekê lawikek dizewice, ji xwe re keçekê tîne. Diya lawik jî, bi wan re tevayî di malê de dimîne. Dema kurik diçe li ser karê xwe, ev bûka teze û xwesûya xwe tenê dimînin. Xasî gelek caran xwarinê nadî bûka xwe, wê birçî dihêle, bi wê re pev diçe, rewşa bûkê her diçe xirab dibe. Bûkeke bêdeng, şermoke û newêrek bûye, zar û zimanê wê tune bûye, keseke gelek reben bûye. Di dawiyê de ji hal dikeve, ken ji bîr dike. Mêrê wê paşê jê derdixe ko diya wî li jina wî hatiye xezebê, jê re nepak e. Mêrik biryarê xwe digre wekî careke din bizewice, diçe digere, vê carê ji xwe re keçekê bi navê *Gulsûn* dibîne, tîne malê. Gulsûn angorî jina berê bûkeke çavvekirî, serwext, şerût û bi zar û ziman bûye. Gelek caran cesaret dike li dijî neheqiyênen xwesûya xwe derdikeve, dilê wê ci bixwaze tîne cih. Di dawiya çîrokê de ji ber lêdaneke Gulsûnê xasî gelek bêhal dikeve, paşê jî dimire. Bi vî tehrî herdu bûk ji destê vê xwesûyê xelas dîbin.²⁴ Gelek çîrok hene ko di dawiyê de bûne bingehê bendênen pêşıyan, mirov dikare bibêje her koka bendeke pêşıya diçe dighêje çîrokekê û bûyerekê, ji ber vê yekê jî di navbera peydabûna bendênen pêşıyan û çîrokan de pêwendiyênen xurt hene. Her çîrokek demek hatiye êdî ketiye qalibê hevokekê, kurt bûye, wek çend peyvan ketiye tehrekî pendênen pêşıyan. Mirov van çîrokan »çîrokên bendênen pêşıya« jî dikare bi nav bike, wek misal »bûkê tune zar û ziman, xwesûyê tune dîn û iman« di dawiya çîrokekê de peyda bûye, ev çîroka wisan e:

Bûkek teze anîn peya kirin, xwesûya wê roja pêşîn du nan anîn dane ber bûkê û gotê: »Bûkê can, şerm neke, lê serê nan ker meke«. Bûkê ji

şerma wê rojê nan ne xwar, got: »Xwesûya min gotiye serê nan ker meke«. Sê roj temam bûn bi vî tehrî, xwesûyê digote bûkê, lê bûkê jî nan ne dixwar. Rojtira çara dîsa xwesûyê nan danî ber bûkê û gotê : »Şerme meke, lê serê nêñ ker meke«. Bûkê dîna xwe dayê ji birçiya wê qudum bikeve, ewê anî ji orta nêñ derxist xar, tenê qalkê li ser nan ma. Wisan sê roja bûkê nan ker nedikir, tenê orta nan dixwar, qalikê nêñ cî de dihişt. Rojekê xwesûyê gotê : »Bûkê, tu çira orta nêñ dixwî qalikê hişk jî dihêlî?« Bûkê got: »Tu xwesûya min î, ci te digot min jî gura te dikir. Wextê bûkê tune zar ziman, xwesûyê tune dî û iman«. Hingê bûkê xwesûyê re xeber de, şermî ji ortê rabû.²⁵

Çawa me li jor jî got di dawiya çîroka *Bûka Gulsûn* de, piştî mirina xwesûya wan, ev herdu hewî dibin yek, bi kêfa dilê xwe şâ dibin. Ji ber ko çîrok xelas bûye, mirov nikare derbarê pêwendiyên van herdu bûkan û hewiyan yên pêşerojê de tiştekî bêje. Di çîrokê de, xasîk û du bûk hene. Herdu bûk jî hewiyê hev in. Ji ber ko di çîrokê de xasî heye, vê careşerê hewiyan disekine, hewî li dijî xwesûyê ne, dubendî, nakokî û şerê nav xwe ber didin, bi xwesûya xwe ve mijûl dibin. Eger çîrokê de motîva xwesûyê tune bûya, bêguman şerê hewiyan dikaribû mezin bibûya, di çîrokê de cihekî fireh bigirta. Çawa tê zanîn hatina jineke nû, di statûya jina yekemîn de guhasinên mezin pêk tîne, cih û rûmeta wê nimz dibe, jina duwemîn timê dibe berdilk û şîrîna mîrê xwe, çawa bendeke pêşîyan dibêje: *nû hatin, kevin hilatin*. Di destpêkê de anîna jineke nû timê ji mîran re wek bûyereke xweş tê xuyan, lê belê piştî demekê, şerê hewiyan dest pê dike, hewî dikevine pêşîra hev, wê çaxê ew rojîn xweşiyê êdî namînin, winda dibin, derdê pirjiniyê wê demê baş tê fam kirin. Di çîroka *Mîrê du jinan* de ev yeka gelek eşkere tê xuyan.²⁶ Di çîroka *Gulançikzérîn* de, dilê padişahekî dikeve sê keçikên malekê, hersêyan jî, ji xwe re tîne. Padişah ji ber bersîvên keça piçûk, zêdetir ev keça hez kiriye. Lê belê herdu keçen mezin dest pê kirine dexesiya keça piçûk kirine. Demek derbas dibe, şerek derdikeve padişah diçe şer. Wê demê jî jina piçûk ducan bûye, ber hemlebûnê bûye. Piştî çend mehan, dema keça piçûk diwelide, herdu xuşkên mezin gazî pîrikeke bêîman dikin wekî bê alîkariya keça piçûk bike. Dema keçik diwelide, ev pîrik li şuna zarokan, du cewrikên (tule, kudik) sa tîne nîşanî keçikê dide, zarokan jî dike sandoqekê dibin davêjine nav behrê. Dema padişah tê, qala vê yekê dikin, padişah dibêje li ber malê saferekê çê bikin, jînikê û herdu cewrikên wê li wir

girêdin. Sal derbas dibin, ew herdu zarokên padişah yên ko avîtibûne behrê (Huseyîn û Gulîzer) ji mirinê xelas dibin, dema ez zarokan rojekê qala serpêhayiya xwe dikan, paşê padişah fam dike ko ev zarokên wî yên jina piçûk in. Herdu jinênen wî yên mezin lîstikeke anîne serê jina piçûk. Paşa tîne van herdu jinênen mezin ceza dike, jina piçûk jî azad dike.²⁷ Çiroka *Mîrze Memûd û Xuşka Wî*, ji gelek aliyan de dişibîne vê çirokê. Di çiroka *Mîrze Memûd û Xuşka Wî* de jî hewiya mezin hesûdiya hewiya piçûk dike. Di çiroka jorîn de ci tê serê hewiyê, tê serê vê hewiyê jî, herdu çîrok wek şaxêن hev dikarin bêñ hesibîn. Di dawiya vê çirokê de, dema padişah fam dike ko ci hatiye serê wî, tîne jina mezin şeq-şeqî dike dikuje.²⁸ Naveroka çiroka bi navê *Gulê* jî, wek van herdu çirokan e.²⁹ Di hersê çirokan de jî, derdê hewiyan motîveke hevpar e.

Di van çirokê ko li ser derdê hewiyan hatine gotin de tiştekî ko bala mirovan dikşîne jî, rewşa pîran e, wek kesên bêiman û sérbaz di nav koma »jinênen xirab« de cih digirin. Di çirokê kurdî de em rastî çend tîpêñ pîran têñ. Pîr, di zimanê kurdî de bi taybetî ji bo jinênen ko salêñ wan bihurîne tê bi kar anîn. Carcar ji wan re *pîrejin* jî tê gotin, di çirokê kurdî de ev pîr gelek caran famdarî, zanebûn û mîvanheziya xwe ve têñ nasîn. Çawa di çend çirokan de jî xuya dibe, ev pîran kesine belengaz in, tenê dimînin, çavêñ wan li destê kesen mayî in, rojêñ xwe dipêñ. Ev tîpêñ pîran gelek caran alîkar in, qencî û pakiyê dixwazin, bextan û mirazan dîghînin hev, suran re vekirîne, keç û xort dikarin baweriya xwe bi wan bînin. Ji wan hinek jî dilreş in, timê li pey xirabiyê ne, gilî û gotina digerînin, gilîgerok in, xeybê mirovan dikan. Çawa me di çiroka *Gulançikzêrin* de qala wê kir, hin pîr jî hene, bi taybetî dema zarokanînê de alîkariya jinan dikan, ji wan re pîrik (ebe) dibêjin, di çiroka *Gulançikzêrin* de ew pîrika wek jineke neçê tê nasîn. Tîpeke mayî jî *pîrhevok* in, ev kesan wek jinênen çirokî jî dikarin bêñ nav kirin, timê xirabiyê dixwazin, xof û tirsa wan timê li ser mirovan e, memikêñ xwe davêjine li ser milê xwe, pêşkarî mirovan dibin. Di jîyîna rojane de ev peyva, ji bo jinênen bêter, bed, nebedew jî tê bi kar anîn.

Di folklorâ kurdî de jana damariyan, jana xwesûyan, jana hewiyan û jana jintiyan wek çar motîvên bingehî cih girtine. Van herçar motîvan (damarî, xasî, hewî, jintî) di nav folklorâ kurdî de sûretekî »Jina Xirab« peyda kirine.

Di çend çirokê kurdî de bêbextî û nehelaliya jinan, bûye sedemê

malwêranî, malkambaxiyan. Bi taybetî jinên ko mîrkirî ne, lê belê bi mîrekî mayî re serê xwe dikine yek, di van çîrokan de wek jinên rû bi tenî têñ hesibîn, gelek caran jî, di dawiya çîrokan de têñ kuştin. Ev jinên ko bi yar in, jinên ko nabin xwediyê nefsa xwe, bi dizîka ve mîrêñ din re radizêñ, bi wan re şâ dibin, di van çîrokan de gelek bi fesal gavêñ xwe davêjin, dek û dolap, fend û fêlêñ mezin tînin serê mîrêñ xwe. Carcar bi zanetî wek misal xwe nexwaş datînin, ji bo ko imkana hevdîtina dilketiyê xwe peyda bike, mîrê xwe bona »dermanekî« dişîne »welatê hat û nehatê«. Lî belê di dawiya çîrokan de her tişt êdî eşkere dibe. Çîroka *Ava heyatê û sêva Xelatê* di vî warî de gelek balkêşê. Jinik xwe nexwaş datîne, dibêje mîrê xwe, tê herî ji min re *Ava heyatê û sêva Xelatê bînî*. Mîrik tîvdarekê xwe dike, terkeserî dinê dibe. Diçe gundê mala xuşka xwe, xuşka wî zane ne av, ne jî sêveke wisân heye, dibêje birayê xwe, jina te bi yar e, vegere here mala xwe! ew te dixapîne. Paşê bira û xuşk dikevine dilqê du gerokan, diçin dibînin ko gotinêñ xuşka wî rast in, jina wî bi yar e. Herduyan jî dikujin.³⁰ Di çîroka *Bengliboz* de, jineke padişahekî hebûye, navê wê Siltan bûye. Dema mîrê wê diçe şer, ew nîta xwe xirab dike, bi wezîrê padişah re radibe û rûdinê. Hespekî padişah jî hebûye, hespekî sêrbaz bûye, dikaribûye deng jî bike. Hesp, rojekê kurê padişah re, qala diya wî û wezîr dike, êdî pêwendiyêñ diya wî û wezîr eşkere dibin. Di dawiya çîrokê de, ev jinik tê kuştin.³¹ Di çîroka *Silo û Rehmo* de hejmara jinên bi yarik her diçin zêde dibin. Silo di gomekê de xwe vedîşêre, mîze dike dor bi dor sê mîrêñ çîptazî hatin gomê tevî pêz bûne. Ev kesan, yarikêñ wê jina ko Silo di goma wê de xwe veşartiye, bûne. Dema mîrê jinikê tê, diçe gomê rastî çend kesan tê, Silo mîrik re dibêje, ev yarê jina te ne. Silo jî radibe diçe mala xwe, dêrî dixe jina wî dêrî venake, jina wî jî bi yar e. Jinik yarê xwe dike kûpekî, vedîşêre. Piştî demekê mîr vî kûpî dike difroşe, dide cihûkî. Cihû dibêje Silo, vî kûpî bibe mala min, dema Silo kûp dike mala cihû, mîze dike heft bûkêñ cihû her yek jî wan bi yarê xwe ve ketine nav kîf û henekan. Dema bûk çav li Silo dikevin, bembû davêjin li ser yarêñ xwe, wan vedîşêrin. Paşê cihû tê malê, her tişt eşkere dibe.³² Di dawiya çîrokê de, yarê jina Silo û yarêñ heft bûkêñ cihû jî têñ kuştin. Çawa di çîrokê de jî tê xuyan, him jinêñ bi yar, him jî mîrêñ bi yar re imkana jîyînê zêde namîne. Di çîroka *Silqo* de, vê carê her çîqas Silqo jê derdixe jina wî bi yar e, dinêre xortek di nav cihê jina wî de ye, jinikê nakuje, tenê ber dide, paşê

jineke din ji xwe re tîne.³³ Çîroka *Bila ew nan û mastê xwe bixwe* wek pêkeniyan hatiye gotin, rojekê mîrek diçe leşkeriyê, heft sal leşkeriyê dike. Dema vedigere tê mala xwe, mîze dike kû sê zarokên wî hene, ew şas û metel dimîne. Dema jina xwe dipirse wekî ev zarok yê kê ne, bersîva jinikê mîrik têr nake, êdî ter tişt derdikeve holê, mîrik fam dike ko ew zarok ne ji wî ne.³⁴

Jinê destgiran

Çawa em li jor jî li ser sekinîbûn, di çîrokbêjiya kurdî de mîrên tiral, şil û şed, timê li malê ne, kêrî tiştekî nayêñ û bûne babetên gelek çîrokan. Civatê ew kesan di nav koma »mîrên xirab« de bi cih kirine. Wek mîran vê carê em rastî jinêñ wisan jî têñ. Ev jinan jî tiral in, xebatekê nakin, her tiştî ji Xwedê, ji dorberê xwe hêvî dikin, di dawiyê de perîşan dibin, dikevin li ser zar û zimanân û dibin babetên çend çîrokan. Di çîroka *Mena komekê jî gotî hebe* de dayîk û keçek hene.³⁵ Di çîroka *Ardu* de bav, keçek³⁶ û di çîroka *Riya şixrê* de jî pîrejiniek, dotek û pişîkek heye.³⁷ Hemû mîrxasên van hersê çîrokan jî, berî ko zivistan bê qet tividarekê zivistanê nakin. Di van hersê çîrokan de dayîk, pîrejin û bav dibêjin çawa hebe emê bimirin, ne hewce ye em kar bikin, hersê keçen van çîrokan jî difikirin, dibêjin emê heta wê çaxê ji xwe re mîrekî bibînin, emê bizewicin. Di çîroka dawîn de pişîk jî dibêje, dema ew mirin û zewicîn ezê jî herim mala cîranan, bibim pişîka wan. Lê belê zivistan tê, ne ev dayîk, pîrejin û bav dimirin, ne jî keç mîr dikin. Dema zivistan tê ev kesên tiral, cangiran gelek perîşan dibin û destê kesên mayî dinêrin. Ji bo ko ji xwe re ardu û xwarinê berev bikin, dikevine çolan. Di dawiyê de mîze dikin ko jîyîn çawa ew difikirin wisan hêsa nîne. Ji aliyê din çawa em dibînin babeta van hersê çîrokan jî gelek nêzîkî hev e, wek şax û guhartinokên hev in. Ev yeka jî nîşan dide ko, tema van çîrokan ji aliyê civatê de giring hatiye dîtin ko ev çîrok ewqas belav bûne, nav dane.

Çend çîrokêñ jiyana rastî

Gelek çîrok li ser jîyîna kurdan hatine gotin, ev çîrokan, çîrokêñ rastî (real) têñ bi nav kirin. Di jîyîna rojane de, ev bûyer li ser mirovan û li ser civatê re derbas bûne, wek neynika civatê ne. Ji aliyê dîrokî, der-

barê sal û demên bîhûrî de, ev çîrok me gelekî ronî dîkin. Qewmandinêñ ko em di van çîrokan de rastî wan têñ, wek qewmandinêñ bûyî dikarin bêñ hesibîn. Çawa tê zanîn civata kurdî wek ci-vateke feodal ji gelek êl û eşîran pêk hatiye. Ji aliyê din bandûra serokesîr, axa, beg, şêx û mezinan li ser civatê timê mezin bûye. Dubendî, nakokî, şer û dewêñ navbera van hêzan timê bala civatê kişandiye. Di hiş û mêmûyê civatê de cihek girtiye, ketiye li ser zar û zi-manê civatê, bûne çîrok. Hevkuştin, xûnrijandin, dijminahî û şer wek motîv bûne babetê gelek çîrokan. Di vî warî de çîroka here balkêş, çîroka *Suto û Tato* ye. Bûyerên çîrokê li deverên Badînan derbas dibe. Suto serokê êla Duşkanî, Tato jî serokê êla Rêkanî ye. Şerekî bêhempa di navbera van herdu êlan de dest pê dike, bi hevra dijminatîke mezin dajon. Hêzên dewletê, axa û şêxên mayî jî tevî vî şerî dibin. Suto û merivêñ xwe gelek bêbextî, teda û zordestiyê li merivê êla Tato dîkin. Di dawiyê de gelek mirovan ji hev dikujin. Ji bo tola hev bistînin herdu êl pêşîra hev ber nadîn. Paşê gelek hêzên mayî dikevine nav, dixwazin wan bi hev bînin. Di dawiyê de herdu alî jî bi hev têñ. Suto keça xwe dide Tato. Dema xûn hat rijandin, ji bo hevhatinê, li pêş xûnê dayîna keçekê di nav kurdan de edetekî kevn e. Ev yeka wek nîşana aşîtiyê dikare bê hesibîn. Lê belê Suto, rojekê xwe bi zanetî nexwaş davêje. Tato mirovêñ xwe ve têñ serîkî bidinê wî. Dema ew diçin razêñ, mirovêñ Suto lêdixin Tato û mirovêñ wî dikujin. Bi vî tehrî Suto tola xwe ji dijminê xwe distîne û paşê radibe ser xwe spaş Xwedê dike.³⁸ Di çîroka *Revandina qereciyekê* de dîsa gelek mirov, qasî cil kes ji eşîra malmezinan tê kuştin. Rojekê xortekî eşîra malmezinan keçekê qereciyan direvîne. Dema qereçî pê dihesin, davêjine ser eşîra Malmezinan, cil mirovêñ wan dikujin, paşê vedigerin malêñ xwe. Di çîrokê de dema serokê eşîra Malmezinan jê derdixe ko ewqas kes ji bo keçekê mirine, gazî xort û keçikê dike, dixwaze van herduyan jî biku-jê. Lê belê dema mîze dike dilê lawik gelekî di keçikê de heye, dest ji kuştina wan ber dide. Serokê eşîra Malmezinan, çawa tê xuyan zewaceke bi keça qereciyan di cih de nabîne.³⁹

Di vî warî de çend çîrokêñ ko Alexander Jaba berev kirine û wek pirtûk weşandiye zêdetir bala mirovan dikşînin. Motîfîn derbarê rewşa jinêñ kurd, di van çîrokan de gelek xurt û balkêş in. Di *Çîroka heystan* de dilê du xortan dikeve keçekê bi navê Barnîk. Navê van xor-tan yek Şimasî, navê yê mayî jî Çolo ye. Cara pêşîn Barnîk didine

Şimasî. Şimasî yekî dewlemend, Çolo yekî belengaz bûye. Lê belê dilê keçikê dikeve Çolo. Paşê ev herdu xort dikevine qirika hev, herdu jî tênu kuştin. Di dawiyê de keçik jî bi xençerê xwe dikuje. Keçikê dibin li bal mezerê Çolo gor dikan. Di *Çiroka donzdehan* de serpêhatiya du birayê bêkar cih girtiye. Dilê birayê mezin Hesen Axa dikeve vê keça bi navê Lalî Xanim. Paşê dema birayê wî yê piçûk Çeleng Axa vê keçikê dibîne, dilê wî jî dikeve keçikê. Birayê piçûk lîstikekê tîne serê birayê xwe yê mezin, bira dev ji keçikê ber dide, birayê piçûk bi wê re dizewice, lê belê dilê keçikê birayê mezin - Hesen Axa de hebûye. Di dawiyê de keçik jehrê dixwe, dimire. *Çiroka nozdehan* de paqijî, helalî, dilovanî û cesaretê jinan tê zimîn. Angorî çîrokê mirovek hebûye, li bajarê Bitlîsê dima. Navê wî Cergo, navê jina wî jî Guzel Xatûn bûye. Rojekê jina wî bi mîvanî diçe gundê mala bavê xwe. Demek derbas dibe, Cergo xulamê xwe dişîne pey jina xwe wekî hilde bîne malê. Navê xulêm Kirêt bûye. Xulam di rê de nêta xwe xirab dike, dilê wî dikeve jina axê, pêşkarî jinikê dibe. Jinik dema firsendekê dibîne, tîne Kirêt dikuje, herdu milên wî jî jê dike, dibe nîşanî mîrê xwe û xelqê dide. Paşê herkes pesnê Guzel Xatûnê dide.⁴⁰

Jinênek wekî rawiran

Dema mirov çîrokê kurdî beş û beş analîz bike, ji hev derîne, mirov dibîne ko gelek çîrok jî, li ser rawir (tabe, terewil, lawir, heywan) hatine gotin. Ji ber ko piraniya kurdan di zikê tebiyetê de dijîn, di jîyîna wan ya rojane de ew û rawir di nav hev de ne, gelek rawiran diparêzin. Şivan, gavan, berxvan, golikvan û gelek kesen mayî her yek ji aliyê xwe de pisporekî rawiran e. Him rawirê hov, him jî rawirê kedîkirî di çîrokan de wek mirovan gavê davêjin, cilêni mirovan xwe dikin û dibin parçekî jîyîna mirovan. Mirov û rawir ji gelek aliyen de dişibînin hev. Di dawiya çend çîrokan de, ji ber xirabî û nepakiya xwe, çawa em dibînin ew dibin rawir, wek pepûk, hirç, jûjî, meymûn terke-serî dinê dibin. Dema em naveroka van çîrokan mîze dikin, yek ji mîrxasên çîrokê ji Xwedê re duayan dike, lawa dike, wekî ew kesen xirab û nepak bibe rawirekî, daxwaziyêni van kesen derhal tênu cih. Ew kes dibe ci lawir? Ev yeka angorî naveroka çîrokê, rewş û kirinêni van kesen re girêdayî ye. Bi saya van çîrokan em sedemêni peydabûna her rawirekî jî fêr dibin.⁴¹

Naveroka hinek çirokêne kurdî bi temamî li ser rawiran e. Beşeke wan jî nîvî rawir in, nîvî mirov in. Di çend çirokan de jî, her çiqas temam rawir bin jî, formekî hinerî di van çirokan de peyda bûye, çawa em dibînin vê carê wek misal bi devê rawirekî an jî rawirekê çirokeke li ser mirovan têngotin. Vê besê di nav hevsaziya çirokeke dirêj de bi serê xwe cih girtiye. Dema em van çirokêne di nav çirokan de mêze dîkin, bi alîkariya van »çirokêne piçûk« rawir dixwazin nêt, merem û mesaja çirokê xurt bikin. Angorî vî rûçikê hinera çirokbêjiyê, bi devê rawiran şîret li me têngotin, rawir rewşa xwe û bûyerên van çirokêne ko dibêjin, hemberî hev dîkin, ji xwe re dîkin pêlekan, material û daxwaza xwe ya dawîn pêşkêşî me dîkin. Çawa tê zanîn wek hebûnên jîndar (zêndî, candar, ruhber) di navbera mirovan û hêzên nemirovî de, wek misal rawiran de gelek nêzîkahî û dirûvlêketinê balkêş hene. Gelek babetê çirokêne rawiran hene û naverokêne wan ji motîvên gelek cida-cuda pêk têngotin. Di nav van motîvan de motîveke bingehî, motîva jinan û zewacê ye. Di vî warî de çirokeke here hewaskar, şîretkar, çiroka bi navê *Zewaca Qijik û Kevokê* ye. Angorî çirokê, Qijik mîr e, Kevok jî jin e, bi hevra dizewicin, lê belê piştî demekê bi hev nakin, dixwazin hev berdin. Ew diçin li bal qazîyekî, her yek qala rewşa xwe dike û çirokekê qazî re dibêjin. Sedemê gotina van çirokan jî, her yek ji aliyê xwe de bi misalêne xweşik ve dixwaze qazî bidin bawer kirin, wekî kî heq e, kî neheq e, dixwazin li pêşberî qazî wek dadi-gehekê xwe biparêzin. Em ji naveroka çirokê derdixin ko, Kevok doza hevberdanê dike, dixwaze ji mîrê xwe Qijikê veqete, wî berde. Angorî îfade û gotinêne Kevokê, mîrê wê kesekî pîs e, timê qilêr û qirêj e, diçe ser cendek, kelaxan, timê tiştên pîs dixwe, bîna genî ji devê wî tê. Ji ber van sedaman Kevok dixwaze ji Qijikê veqete. Çawa me jor jî got, herdu diçin li bal qazîkî bawerî û nêrînên xwe li ser vê hevberdanê pêşkêş dîkin. Pêşiyê Kevok, qala zordesîya ko li ser jinan heye dike, vê yekê wek neheqîkê di cî de nabîne. Paşê Qijik jî, bêbextiya jinan şirove dike, li ser neheqîya jinan disekine. Piştî ko her yek xwe diparêze, vê carê her yek çirokekê jî dibêje wekî bawerî û dîtinêne xwe xurttir bikin. Pêşiyê Qijik çirokekê dibêje. Ev çiroka ko Qijik dibêje, bêbextiya jinan eşkere dike, wek misal Mîrze Mihemed rojekê bi çavê xwe dibîne ko jina wî û herdu jinêne birayêne wî bi kesen xerîb re ne, xwe tazî dîkin, bi van mîran re dikevine avê, hev şâ dîbin, kêfa xwe dinêrin. Piştî van gotinêne Qijikê dor tê Kevokê wekî bawerî û nêrînên xwe jî qazî re

pêşkêş bike. Piştî çend gotinan, ew jî çîrokekê dibêje. Angorî çîroka Qijikê mirovek hebûye, navê wî Memo bûye, Memo dema zewaca wî tê, bi dotmama xwe Rewşê re dizewice. Demek derbas dibe, vê carê Memo diçe hevala jina xwe ya dibistanê jî wek hewî bîne. Jina wî, ji bo ko belak neyê serê mêt, dikeve dilqê mîrekî, navê xwe datîne Ehmedê Kal, diçe digihêje mêt xwe, lê belê mêt nizane ew jina wî ye. Ew timê alîkariya mêt xwe dike ko qeza û belak nayê serê wî. Paşê dema ew hewiyê tîne ser Rewşê, vê carê dest pê dike Rewşê dixe, wê dikute. Fedakariya ko Rewşê jê re kiriye nizane... Kevok çîroka xwe dirêj dike, heta ko qazî dide bawer kirin ko mêt timê neheqiya jinan dikan û mêt wê qijik jî mîrekî nepak e. Ji ber vê yekê jî dixwaze mêt xwe berde. Çîrok bi vî tehrî xelas dibe.⁴² Mirov êdî nizane ko qazî heq daye kîjan alîyî. Çîrokbêj mimkin e mafê bîryardayînê ji xwendevan û ji guhdaran re dihêle. Çîroka *Zewaca qijik û kevokê* di babeta problematîka jinan de çîrokeke gelek hînkar (dîdaktîk) e. Ji ber ko herdu alî ci jin, ci mêt di vê çîrokê de sedemên hevberdanê bi vekirî, bi misal û bi alîkariya çîrokê mayî raberî xwendevanan û guhdaran dikan.

Çîroka *Kund û bilbil* ji aliyê dilovanî, paqîjî, helalî, nefş û quweta danbawerkirina jinan de me zêdetir ronî dike, çîrokeke bandûrhiş e. Rojekê çawa dibe kund riya xwe şâş dike, diçe ber qula bilbilê. Dixwaze here bal bilbilê. Bilbil jinebîke xweyê çend zarokan bûye. Kund çiqas lawa dike, bilbil dîsa dêrî lê venake, dema dinêre nikare Kund bide bawer kirin, vê carê jê re qala çîrokekê dike. Angorî çîrokê li bajarê Helebê paşak dima, serkarekî xulamên paşê hebûye, navê wî Elo bûye. Rojekê dema paşa diçe hec, karêna mala xwe dispêre Elo. Sê keçen paşê hebûne. Elo dor bi dor çav berdide keçen paşê. Lê belê keça piçûk, keçeye bêter bûye, Elo ew nikaribûye bîne rê. Di dawiyê de wê davêje çelekê, heta bavê wê tê. Paşê jî iftira davêje keçikê, ji bavê re dibêje, dibê keça te, dema tu ne li vira bûyî kerxane vekiri bû, timê li ser riyan derpiyê xwe derdixist... Piştî van gotinan gelek bela têne serê keçikê, bav dixwaze wê bikuje, paşê ew rîkê dibîne xelas dibe. Dema Bilbil vê çîrokê dirêj dike, Kund gelek aciz dibe, dibê ev çîroka gelek dirêj e, tu nikarî qut bikî. Lê belê bilbil, heta ko kund bikeve bimire, çîroka xwe didomîne. Bi mirina kund ve êdî çîroka bingehî diqedede, xelas dibe.⁴³

Him çîroka *Zewaca qijik û kevok*, him jî çîroka *Kund û bilbil* bi tehrekî allegorîk rewşa jinan, problem û eşen wan, zordestiyên li wan

tên kirin, bi stîleke hinerî radixin li ber çavan. Çawa tê xuyan ew »çîrokên nav çîrokan« bedewîke mezin didin van herdu çîrokan. Di van çîrokên rawiran de, çawa em dibînin jinê ko kincê rawiran an jî rawirê ko kincê jinan xwe kirine, ji wan her yek problemeke jinan pêşkêş dike. Di çîroka *Kêz xatûn* de, Kêz xatûn piştî gereke dirêj ji xwe re mîrekî dibîne, pê re dizewice, navê mîr Mişko Axa bûye. Kêz Xatûn her çiqas bedew bûye, her ewqas jî qure û pozbilind bûye. Di dawiyê de Kêz xatûn dibe goriyê vê quretî û pozbilindiya xwe, ji aliyê Mişko Axa de tê kuştin.⁴⁴

Çawa me li jorê jî pêşkêş kir di van hersê çîrokên kurdî de cotek rawir kincê jin û mîran li xwe dikin, dikevin dilqê mirovan, bi hev ra dizewicin (qijik û kevok, kund û bilbil, kêz û mişk). Di van hersê çîrokan de jî, em rastî tu zewaceke dilşa nayê, ya hev berdidin yan jî dîbin bayisê mirina hev.

Ji aliyê din çîrok jî hene, ji van cotan yek mirov e, yek jî rawir e, bi hevra dizwewicin, dîbin jin û mîrên hev. Di çîrokên *Mar⁴⁵* û *Hemend⁴⁶* de, vê carê marek wek xortekî dixwaze bi keça padişah re bizewice. Piştî çend teqereqan ew diçin, digihêjin mirazê xwe. Ev herdu çîrok jî, ji gelek alian de wek hev in, mirov dikare bêje, şaxêñ hev in jî. Mar hewl dide ko martiya xwe zêde nîşan nede, bala mirovan zêde nekişîne ser xwe, lê belê dîsa jî ji destê wan nafilite, dawiyê de dîsa ya xwe dike, bi keça padişah re dizewice. Eger em ji dinya çîrokan piçekê dûr bikevin, di jîyîna rojane de mar çawa em zanin wek rawirekî zêdetir bi kûvîtiya xwe, zordestî û êrîşkariya xwe ve tê nasîn.⁴⁷

Di nav kurdan de mar, rawirekî zêde hezkirî nayê hesibîn, angorî lêkolînvaneyeke tirk ya ko gelek çîrokên kurdî wergerandine tirkî, pêwendiyênen nexweşîya mar û tunebûna ava paqîj gelek xurt in. Angorî wê, ew kesên ko ava ne paqîj vedixwin, li gor baweriya wan, di zikê wan de imkana peydabûna meran zêdetur e, ev yeka jî dibe bayisê tîrsa maran.⁴⁸ Lê belê di folklor û mítolojiya kurdî de, ev sûretê maran yê êrîşkar wisan bi hêz û xurt nîne. Çîroka şahmaran (şahê maran) de mar bi sûretekî gelek mirovî ve hatiye xemilîn. Angorî van mítolojiyan mar wek figurekî mítolojîk ji navê berjêr wek mar, ji navê berjor wek keçeke bedew e. Mar angorî vê mítolojiyê bûye nîşana bedewî û xweşîyê, navê şaha van marêñ nîv-mirov û nîv-mar, angorî mítolojiyê şahmaran bûye.⁴⁹ Dema mirov van herdu çîrokên ko me navê van li jor

daye û mîtolojiya şahmerdanê dide ber hev, mirov van herdu çîrokan de sûretekî maran yê nêzîkî mirovan dibîne.

Jinêن çîrokî

Ji aliye din jin hene tenê jinêن çîrokî û mîtolojîk in, ne mirov, ne ji rawir in. Ew gelek caran wek keçen dêwan, hût, cinan û wek pîrhevokan têن nasîn, horî, perî ne. Çawa me di destpêkê de de ji gotibû, dema ew mîrxasên berê xwe didine »welatê hat û nehatê«, ew diçin rastî van dêw, hût û cinan têن, ev erd welatê wan e. Gelek mîrxas li vi welatî nasiya xwe didin keçen wan, dibin heval, paşê vedigerin têن cî û meskenê xwe. Dema ew diçin lingê xwe davêjine welatê hat û nehatê, ev dêw, hût û cin fam dikin ko bîna »benî« yan, »benî ademan« tê, »evdê sereş« hatine welatê wan, mirovan zû nas dikin. Ew dest pê dikin îfadeyên wan mirovan digirin, carcar ji gelek şer û dew, mirin û kuştin pêş da têن. Dîsa me di destpêkê de gotibû, dema kesek diçe xwazgîniyê keçekê, bavê wê çend mercen giran û dijwar pêşda davêje, erdê pêkanîn û cihanîna van mercan ji bi taybetî ev welatê hat û nehatê ye, ev kesan mecbûr dibin berê xwe didin vi welatî. Motîfeke din ji, dema kesek bedhal dikeve, nexwaş dibe, ji bo dîtin û peydakirina dermanekî ew diçin vi welatî, ew wek misal pey *sêva xweşiyê û ava heyatê* dikevin... Carcar ji jinêن ko dixwazin demekê ji mîrên xwe dûr bikevin, sedem û bahaneyên cida dibînin û mîrên xwe dişînin van welatan dûr. Çîroka *Silêmanê Zindî* di vê babetê de çîrokeke pir giring e. Bavê Silêmanê Zindî ji aliye hûtekî de tê kuştin. Ew ji heft kurê hût dikuje, bavê wan ji dîl digire, tîne dest û piyê wî girê dide, davêje çelekê, selekî datîne ser çelê. Vê carê diya Silêmanê Zindî dibe evîndarê hût. Ji bo ko ew û hût bi rehetî hev bibînin, bi hevra şabin, ew xwe naxwaş datîne, kurê xwe Silêmanê Zindî dişîne dîtina dermanan (zebeşê hûtan û şîrê şêran). Diya wî di wê baweriyyê de ye ko, dema Silêmanê Zindî cû van deveran, dêwê wî bikujin, êdî vegera wî tune ye. Cara pêşîn kur diçe nav bostanê Dêwê Sor, keça dêw dibe evîndarê Silêmanê Zindî, dibe alîkara wî. Ew zebeşê diya wî gotibûyê, peyda dike, vedigere malê. Diya wî û hût vê carê lîstikeke din tînin serê Silêmanê Zindî, diya wî dibêjê, here min re »şîrê şêr di eyarê şêr de« bîne. Silêman lêdixe diçe Çiyayê şêran. Keça dêw dîsa jê re dibe alîkar, dibêje dema tu diçi Çiyayê şêran li wir xuşkeke min heye navê wê Gulxan e, vê namê bide

wê, ewê te re bibe alîkar. Vê carê jî Silêmanê Zindî daxwaziya diya xwe tîne cih. Lê belê ji ber ko diya wî keseke bêbext û xayîn bûye, di dawiyê de çavê kurê xwe derdixe û davêje bîrekê (çal). Paşê ew bi alîkariya çend rîwiyan tê xelas kirin. Vê carê Silêmanê Zindî tê malê, him diya xwe, him jî dostê wê dikuje, paşê jî laşê wan dişewitîne. Silêmanê Zindî xwe jî bi keça Dêwê Sor re dizewice, navê wê Herdemxan bûye. Paşê ew diçin mirazê xwe şâ dibin. Di çîroka Silêmanê Zindî de dubendîke gelek tûj heye, li alîkê dayîkeke dil bi kevir, bêbext, li alîkî jî herdu keçen Dêwê Sor (Herdemxan û Gulxan) bi qenciyâ xwe ve têن nasîn, wek du tîpêن li dijî hev, ji hev dûr, bûne nîşana pakî û nepakiyê. Bi van herdu tîpêن jinan ve, çîrokê imkanekê rûberîhevkin, danberhevdanê jî bo xwendevanan peyda kiriye. Di çîrokê de jinên çîrokî di warê qenciyê de çawa em dibînin zora jinên mirovî (benî adem) dibin. Bi vê teknîka xwe ve çîrokeke bi hêz e. Ev çîroka ko Roger Lescot berev kiriye (Silêmanê Zindî), ji gelek aliyan de dişibîne çîrokeke ko Heciyê Cindî berev kiriye (Meymûn Xanim û Mîrze Memûd), di vê çîrokê de jî diya Mîrze Memûd, dêwekî bi navê Babir re dibe yek, li dijî kurê xwe xirabiya difikire, herdu çîrok jî xirabî û dilkeviriya dayîkên bêbext radixe ber çavan.⁵⁰ Çîroka *Şarûr Bilbil* de Mîrze Memûd rastî keçen Dêwê Sor, Spî û Reşte, ev hersê keçik jî wî re dibin alîkar û dibin evîndarê wî, lê belê Mîrze Memûd heta ko nagîhêje merema xwe, têkilî van keçikan nabe, şûrê xwe datîne navbera xwe û wan.⁵¹ Ji ber ko di van çîrokan de dêw, hût, cin bi bi xirabiya xwe ve têن nasîn, li pêşberî van zordestiyêن bavêن xwe, keçen wan jî bûne wek nîşanên aşîtiyê, evîn û qenciyê. Dijayetîke mezin navbera bav û keçan de heye. Di çîrokên li ser padişahan de jî, çawa me gotibû dijayetiya bav û keçan bi nav û deng e. Di çîroka *Nêçîra Çiyayê Reş* de him dilê keça Pîra Heftserî dikeve Mîrze Mihemed, him jî dilê dergistiya Dêwê Canpolat. Her çiqas dergistiya Dêwê Canpolat dixwaze wekî Mîrze Mihemed bibe mîrê wan herduyan jî, lê belê ew vê yekê cih de nabîne, Mîrze Mihemed bi keça Dêwê Canpolat re dizewice, navê wê Gulsûm bûye, keça Pîra Heftserî jî dide birakî xwe.⁵² Ev keçan bi vê evîna xwe ve, em dikarin bêjin ko ew bi tehrekî mayî neheqî û zordestiyan li welatê xwe, zordestiyêن bavan protesto dikin. Evîn, dibe formekî protestoyê.

Beşên dawîn yên çîrokên kurdî timê heqî, qencî, paqijiyyê wek motîvên dilpakiyê li ser mirovan de dîbarînin. Di çend çîrokên kurdî

de, carcar ew kesên ko hatine girtin, eziyet û cefa dîtine, nepakî hatine serê wan, mîrxasê çîrokê yê xêrxwaz van kesan dişîne himamê wekî xwe himam bikin, bişon. Ev motîva himamê wek nîşana paqijiyyê dikare bê hesibîn. Ne tenê qilêr û qirêja bedenê, ev serîşustina ji alîkî de jî dibe nîşana serketin, serbestî û şahiyê, motîva himamê dibe nîşana destpêka jîyîneke nû.

Tekoşîna jinan

Bi kurtî tema jinan di nav çîrokêñ kurdî cihekî fireh digire. Dema em van çîrokan bi çavekî rexnegirî analîz dikan, jin di du warî de gelek aktif in. Ji alîkî de ew bi xurtî li dijî neheqiyêñ li wan bûyî, radiwestin, şer dikan, ji alîkî de jî wek pêşeng û rîber bi zanebûn û famdariya xwe ve rî nîşanî mîran didin, di nav çîrokan de motîva jinêñ tekoşer peyda dikan. Ew tevî raberzînêñ »jin tabîe mîr e an mîr tabîe jin e« dîbin, ew di çend çîrokan de îspat dikan, nîşan didin ko, timê »jin ne tabîe mîr e«, ew gelek hewl didin ko nîşandin wekî mîr jî dikarin tabîe jinan bibin. Çawa tê zanîn karêñ ko jin di nav malê de dikan bêhejmar in, ne tenê karêñ malê, li der malê jî jin timê mijûl in, di warê bicihanîna karêñ der û hundur de sebira jinêñ kurd bêşînor e. Di çîroka *Mîr Neşen Bibin Kevanî* de dema zilamekî cotkar bi jîna xwe ve pev diçe, mirûzê xwe dike wekî şîv tune, rojekê jin dibêjê de were tu bi karêñ malê ve mijûl bibe, ez li şuna te herim cot, dema jinik êvarê vedigere mal, mîze dike ko çi malwêranî. Mîrê wê poşman dibe, rojtira din dîsa diçe li ser cotê xwe.³³ Di çîroka *Qirxsaçliyê* de em rastî jineke wisan tekoşer tê. Ew terkeserî dinê dibe, di rî de rastî gelek kesan tê, ev kesen çav ber didin wê, dixwazin bi wê re bizewicin, dest davêjine wê, lê belê Qirxsaçlî her carekê rîkê dibîne, pêşîra xwe ji vê koma mîran xelas dike. Carekê rastî padişahekî tê, sî û neh jinê wî hebûne, dixwaze Qirxsaçliyê jî bixwaze, hejmara jinêñ xwe bike çîlî. Qirxsaçlî, padişah dixapîne û sî û neh jinêñ wî jî hildide direve, diçe. Vê carê rastî komeke çil mîran tê. Ev çil mîr dixwazin, bi van çil keçan re bizewicin. Qirxsaçlî, bi keçen hevalêñ xwe ve, lê dixin koka van çil mîrî tînin, paşê dikevine riya xwe. Rojekê têñ cihekî dibînin ko padişahê wî welatî miriye, teyrê dewletê difirînin, angorî edetêñ wan salan, teyr serê kê daniya, ew dibû padişahê wî welatî. Vê carê teyr tê datîne serê Qirxsaçliyê, Qirxsaçlî dibe padişah, wan sî û neh keçikêñ

din jî dike wezîr, wekîl û karên mayî dide wan, meclîseke tenê ji jinan pêkhatî ava dike. Di dawiya çîrokê de, ew kesên ko berê di rê de rastî wê hatibûn, dest avîtine wê, angorî kirinê wan Qirxsaçlı tîne cezayan dide wan, kesên bi heq û neheq ji hev cida dike.⁵⁴ Çîroka Qirxsaçliyê nîşan dide ko jin dikarin di heqê her tiştî de derkevin, serkevin û bigihêjin serfiraziyê. Di çend çîrokê kurdî em rastî jinê wisan têñ ko li dîjî dijminêñ xwe seferber dibin, karêñ xwe bi serfirazî diqedînin, digihêjin armancêñ xwe.⁵⁵ Çend çîrokê kurdî jî jin hene, nîşan didin ko jin dikarin gelek caran lîstikêñ mezin bînîn serê mîran, li ser tilîke xwe van mîran bidin lîstinê. Di Çîrokêñ *Jina Bêter*⁵⁶ û *Masiyêñ Bejî*⁵⁷ de, em rastî jineke wisan têñ, dikare mîrê xwe bide bawer kirin wekî di nav zeviyan de jî masî dikarin peyda bin û mîr jî bawer dike. Bêteriya jinan carcar digihêje sînorekî wisan, mirin jî bi wan nikare. Dema van tîpêñ jinan tiştek xiste hişê xwe, angorî çîrokan Xwedê jî bi wan nikare, ev jin di nav koma jinêñ serhişk de cih digirin. Rojekê mîrek û jîna xwe diçin nav zeviyê, dinêrin kêrguşkek ji nav zeviyê revî çû. Jinik dibêje, ew rûvî ye, mîr dibêje na jinik ew ne rûvî ye, ew kêrgûşk e. Mîr ci dike û nake nikare jîna xwe bide bawer kirin, diçin gora jinê dikolin, jinik dîsa dibêje, na ew rûvî ye.⁵⁸

Bi kurtahî di çîrokê kurdî her çiqas li pêşberî miraz, bext û dilşahiya evîndaran gelek dijwarî, tengasî û asteng peyda dibin jî, ew dîsa bi serfirazî vedigerin têñ, digihêjin hev. Bi taybetî jin ji ber van dijwarî û tengasiyan tu wext stoyê xwe xar nakin, timê aktîf in. Di gelek çîrokan de ew tînîn hûrê rawiran dixin serê xwe, dikevine dilqê keçelan, ji ber ko kes şikê nebe wan, ew her imkanêñ xelasiyê diceribînin. Motîfa »jîna keçelok«, ji alîkî de aktîfbûna jinan nîşan dide.⁵⁹ Di vê kefteleft, şer û tekoşîna xelasiyê de, çend hêzên çîrokî jî timê amade ne, têñ hewariya evîndaran, keç û xortan, alîkariya wan dikin, wek secade, xalîçêñ firoke, teyrê sîmir, şiva qudretê, jin an jî keça dêw...⁶⁰ Ev yekitî, destbirakî û dostayetî, çawa em dibînin wisan xurt e, ko di dawiyê de, zora wî dêwê herî xurt, Canpolat jî dibe, heft deriyê wî yên pola jî êdî kêrî tiştekî nayêñ, wek mîrê rojêñ teng Mîrze Memûd çawa wê keçika bedew – Çilkeziyê ji destê Canpolat xîlas dike û Çilkeziyê digihîne mirazê wê. Em dibînin ko dawiya her çîrokekê de mîzgîniya şahiyê bi lez diçe digihêje dê û bavan, mîrov dikare bibêje ko dawiya her çîrokekê de dîlanek heye.⁶¹ Motîfa Mîrze Memûd di çîrokê kurdî de wek xelaskarê jinêñ bindest yê herî bi nav û deng dikare bê hesi-

bîn. Di çîroka *Usîfê Tenbûrvan* de piştî gelek teqereqan Gulbarîn ji destê Canpolat tê xelas kirin. her çiqas Canpolat bi lêdanan nayê kuştin, di dawiyê da ruhê wî jê tê standin, paşê ew bêcan dimîne, dimire, Gulbarîn para Usivê Tenbûrvan dikeve.⁶² Di çîrokeke mayî de vê carê keçeve mayî tê xelas kirin, navê wê Bilbilhezar bûye.⁶³ Bi vî tehrî Çilkezî, Gulbarîn, Bilbilhezar û gelek keçen mayî ji ber destê dêwan, hûtan difilitin, digihêjin bext û mirazê xwe. Bi kûrtahî mirov dikare bibêje ko pirsa xelasî û azadiya jinan, kakilê piraniya çîrokên kurdî pêk tîne.

Serkanî

- 1) Çawa berî û piştî destpêka sedsala me, wisan jî di salên dawîn de çîrokên kurdî bala gelek kurdnas û lêkolîneran kişandiye ser xwe. Ji ber vê yekê jî, wan ev berheman wergerandine çend zimanen: M. B. Rudenko, *Kurdske Skaski*, Moskov, 1959. Cemal Nebez, *Kurdische Märchen und Volkserzählungen*, Munîh, 1972. Arab Schamilow, *Die drei Galatzköfte-Kurdische Volksmärchen*, Berlin, 1977. Joyce Blau, *Contes Kurdes*, Paris, 1986. Ordîxanê Celîl & Celîlê Celîl & Zîna Celîl, *Kurdiske Skazki, Legendi i Predaniya*, Moskov, 1992. Muhsine Helimoğlu, *Cigaramın Üstiünde Bir Topal Karinca – Türkçe’de İlk Kez 88 Yeni Masal*, Ankara, 1992 (Piraniya çîrokên ko di vê berevokê de cih girtine, li deverên Kurdistanê yên cida hatine berev kirin). *Der Löwe des Daragnos und andere kurdische Fabeln*, Wien, 1992.
- 2) Roger Lescot, *Çirokên kurdî*, Stockholm, 1986, rûp. 68–105.
- 3) Roger Lescot, rûp. 68–105, 106–140.
- 4) Heciyê Cindî, *Hikayatêd Cimaeta kurdîê III*, Erîvan, 1969, rûp. 71–83. (Ev xebata Heciyê Cindî ji pênc cildan pêkhatî ye ü her cildekî de gelek çîrokên kurdî cih girtine. Di nav xebatên ko heta niha hatine pêkanîn de, xebateke here berfireh û giranbiha ye. Berevkirina van çîrokan qasî bîst û pênc salên nivîskar giriye. Cildê yekemîn di sala 1961'an de hatiye weşandin, cildê pêncâ û dawî di sala 1986'an de der çûye).
- 5) Heciyê Cindî, *Hikayatêd Cimaeta kurdîê IV*, Erîvan, 1980, rûp. 72–74.
- 6) Ordîxanê Celîl & Celîlê Celîl, *Zargotina Kurda II*, rûp. 229–231.
- 7) Zeynelabidîn Zinar, *Xwençe I*, Stockholm, 1989, rûp. 116–119. (Zeynelabidîn Zinar ji sala 1987'an vir de heta niha şes cildên Xwençe weşandine. Di her cildekî de beşeke gelek çîrokên kurdî cih girtine, hemû li Stockholmê hatine weşandin. Cildê dawî 1993'ê de der çû).

- 8) Heciyê Cindî, *Hikyatêd Cimaeta Kurdiê I*, rûp. 201–210, Hikyatêd Cimaeta kurdî IV, rûp. 173–175.
- 9) Heciyê Cindî, *Hikyatêd Cimaeta Kurdiê IV*, rûp. 198–201
- 10) M. Emîn Bozarslan, *Masiyên Bejî*, Uppsala, 1987, rûp. 28–29.
(M. Emîn Bozarslan heta niha gelek pêkenokên gelî wek pênc pirtûkan weşandiye: *Masiyên Bejî* 1987, *Ji Dîna Dîntir* 1988, *Ilmê Tûrik* 1989, *Bûka Gulsûn* 1990, *Mela Kulî* 1991).
- 11) Hesenê Metê, *Ardu* (Ji Kurteçîrokên Gelêri), Stockholm, 1990, rûp. 104–106.
- 12) M. Emîn Bozarslan, *Masiyên Bejî*, rûp. 48–49.
- 13) Ordîxanê Celîl & Celîlê Celîl, *Zargotina Kurda II*, Moskov, 1978, rûp. 260–267.
- 14) Ordîxanê Celîl & Celîlê Celîl, *Gulançikzêrîn* (Berevokeke folklorik), Erîvan, 1984, rûp. 82–88.
- 15) M. Emîn Bozarslan, *Mela Kulî*, rûp. 28–34.
- 16) Heciyê Cindî, *Hikyatêd Cimaeta kurdîê IV*, rûp. 47–49.
- 17) Heciyê Cindî, *Hikyatêd Cimaeta kurdîê III*, rûp. 9–16.
- 18) Ordîxanê Celîl & Celîlê Celîl, *Zarotina Kurda II*, rûp. 205.
- 19) *Zargotina Kurda II*, rûp. 235–237.
- 20) Heciyê Cindî, Hikyatêd Cimaeta kurdîê IV, rûp. 52–54.
- 21) Zeynelabidîn Zinar, *Xwençe II*, rûp. 281–285.
- 22) M. Emîn Bozarslan, *Pepûk*, Uppsala, 1985, rûp. 53–66. (M. Emîn Bozarslan ew çîrokêñ ko li ser rawiran hatine gotin, wek pênc pirtûkan weşandiye. Wî ev çîrokan bi »meselokêñ lawiran« nav kiriye: *Mîr Zoro* 1981, *Gurê Bilûrvan* 1982, *Kêz Xatûn* 1982, *Serketina Mişkan* 1984, *Pepûk* 1985).
- 23) Selîm, Bakişik, *Surîeyar*, rojnama Azadî, Istenbol, 25–31.7.1993.
- 24) M. Emîn Bozarslan, *Bûka Gulsûn*, rûp. 70–82.
- 25) *Zargotina Kurda II*, rûp. 209.
- 26) M. Emîn Bozarslan, *Ilmê Tûrik*, rûp. 19–22.
- 27) Ordîxanê Celîl & Celîlê Celîl, *Gulançikzêrîn*, rûp. 114–130.
- 28) Heciyê Cindî, *Hikyatêd Cimaeta kurdîê III*, rûp. 203–207.
- 29) Heciyê Cindî, *Hikyatêd Cimaeta kurdîê III*, rûp. 84–95.
- 30) Zeynelabidîn Zinar, *Xwençe I*, rûp. 247–248.
- 31) Heciyê Cindî, *Hikyatêd Cimaeta kurdîê IV*, rûp. 123–134.
- 32) Zeynelabidîn Zinar, *Xwençe VI*, rûp. 155–166.
- 33) Heciyê Cindî, *Hikyatêd Cimaeta kurdîê IV*, rûp. 44–46.

- 34) M. Emîn Bozarslan, *Ji Dîna Dîntir*, rûp. 9–10.
- 35) Ordîxanê Celîl & Celîlê Celîl, *Gulançikzêrin*, rûp. 51.
- 36) Hesenê Metê, *Ardu*, rûp. 71–73.
- 37) M. Emîn Bozarslan, *Ji Dîna Dîntir*, rûp. 23–24.
- 38) Major E. B. Soane and Bazil Nikitin, *The Tale of Suto and Tato*, London, 1988. (Ev çîroka berî gelek salan ji aliyê van herdu kurd-nasan de bi zimanê Inglîzî hatiye çap kirin. Di vê çapa nû de ligel çapa Inglîzî, çîrok bi herdu zaravayê kurdî kurmancî – soranî jî hatiye wergerandin).
- 39) Hesenê Metê, *Ardu*, rûp. 118–121.
- 40) Alexandre Jaba, *Recueil de notices et de recits Kourdes*, St-Petersbourg, 1860.
- 41) M. Emîn Bozarslan, *Pepûk*, 1985.
- 42) Zeynelabidîn Zinar, *Xwençe II*, rûp. 185–237.
- 43) Zeynelabidîn Zinar, *Xwençe VI*, rûp. 145–152.
- 44) M. Emîn Bozarslan, *Kêz Xatûn*, rûp. 58–76.
- 45) Heciyê Cindî, *Hikyatêd Cimaeta kurdî IV*, rûp. 87–91.
- 46) A. Gernas, *Hemend I-II*, Rojnama Azadî, Istenbol, 6–12/2/1993, 14–20/2/1993.
- 47) Roger Lescot, *Çirokêñ kurdî*, rûp. 94.
- 48) Muhsine Helimoğlu, *Cigaramın Üstünde Bir Topal Karınca*, Ankara, 1992, rûp. 24.
- 49) M. Zahîr Kayan, *Di çanda me de motîva şahmaranê*, Rojnama Welat, Istenbol, 12–18/9/1993.
- 50) Roger Lescot, *Çirokêñ kurdî*, rûp. 38–67. Heciyê Cindî, *Hikyatêd Cimaeta kurdîê I*, 211–227.
- 51) Ordîxanê Celîl & Celîlê Celîl, *Çirokêd Cimaeta Kurda*, Erîvan, 1974, rûp. 106–137.
- 52) Zeynelabidîn Zinar, *Xwençe VI*, rûp. 189–209.
- 53) M. Emîn Bozarslan, *Ji Dîna Dîntir*, rûp. 30–32.
- 54) Ordîxanê Celîl & Celîlê Celîl, *Çirokêd Cimaeta Kurda*, rûp. 21–42.
- 55) Alexandre Jaba, *Recueil de notices et de recits Kourdes*, St.Petersbourg, 1860.
- 56) *Zargotina Kurda II*, rûp. 231–232.
- 57) M. Emîn Bozarslan, *Masiyên Bejî*, rûp. 60–64.
- 58) *Zargotina Kurda II*, rûp. 221.

- 59) Heciyê Cindî, *Hikyatêd Cimaeta Kurdiê II*, rûp. 72–78.
- 60) Heciyê Cindî, *Hikyatêd Cimaeta Kurdiê V*, rûp. 98–106.
- 61) Heciyê Cindî, *Hikyatêd Cimaeta Kurdiê I*, rûp. 17–42.
- 62) Stig Wikander, *Recueil de textes kourmandji*, rûp. 24–32.
- 63) Stig Wikander, *Recueil de textes kourmannji*, rûp. 35–38.

— BEŞ II —

Di gotinêñ pêşıyan de zihniyetêñ jinparêz

Gotinêñ pêşıya beşeke giring ya folklorâ kurdî pêk tînêñ. Ji van gotinan re carcar *bendêñ pêşıya* jî dibêjin. Ev berheman carcar jî *mesele û metelok* têñ bi nav kirin. Gotinêñ pêşıya yêñ kurdî gelek dewlemend û rengîn in, ji wan beşek şaxêñ wan yêñ cida jî hene. Heta niha hemû gotinêñ pêşıya di nav kurdan de nehatine berev kirin, nehatine şirovekirin û li ser wan xebatêñ zanistî û folklorîk zêde nahatine pêka anîn. Di vî warî de xebateke here fireh di sala 1985-an de ji aliyê Prof. Heciyê Cindî hat weşandin. Di nav vê berevoka ko bi navê *Meselok û xeberokêd cimaeta kurd* hat çapkiran, ji bîst pênc hezarî zêdetir gotinêñ pêşıya cih girtine.¹ Ev berevoka di vî warî de xebata here firehîn tê hesibîn. Ji der vê xebata Heciyê Cindî, çend xebatêñ herdu biran Ordîxanê Celîl & Celîlê Celîl di vî warî de hene.² Di van salêñ dawîn de, li Tirkîyê jî çend pirtûkêñ gotinêñ pêşıya ji aliyê Huseyin Deniz³ û A. Bal⁴ hatin weşandin. Ji aliyê din, çend berhem û lêgerîn çawa em dibînin bi serê xwe berevokêñ gotinêñ pêşıya nîn bin jî, di nav rûpelên van de gelek gotinêñ pêşıya hatine weşandin an jî zaniyariyêñ kurt li ser gotinêñ pêşıya hene.⁵

Gotinêñ pêşıya wek neynika felsefeya jîyîna gelê kurd gelek zaniyarî û agahdariyêñ giranbiha pêşkêşî me dikin. Bi taybetî di warê pêwendiyêñ civakî û mirovî de, ev gotinêñ kurt, têr û tijî û menakûr, gelek şîretan li me dikin. Kurdish bi kîjan felsefaya jîyînê ve li dorberê xwe, li cihanê nihêrîne? Başî û nebaşî, pakî û nepakî û rastî û nerastî bi ci awayî ji hev hatine cida kirin? Wek van pirsan mirov bersîvîn gelek pirsêñ mayî jî bi alîkariya gotinêñ pêşıya, bi awakî gelek kurt dikare bide. Civatê bi xwe qiyimetê gotinêñ pêşıya daye: *giliyê pêşıya, kevirê xaniya*.

Di nav gotinêñ pêşıya yêñ kurdî de, beşeke wan çawa em dibînin li dora tema jinan berev û lod dibin, bi sedan gotinêñ li ser jinan di zi-

manê kurdî de hene. Ev loda gotinên pêşîya derbarê rewşa jinan de, gelek agahdariyêن sosyolojîk pêşkêşî me dikin. Bi saya van gotinên pêşîya mirov xwe bi hêsanî dirêjî serboriya civata kurd dike, pêwendiyêن jin û mîran, rewşa malê, malbat û jinê çêtir analîz bike. Bi vî tehrî, em van berhemên folklorîk ji xwe re dikarin bikin pêlekan û li ser rewşa jinê kurd bîghêjin çend encam û nêrînêن sosyolojîk û etnografîk. Dîsa bi saya van gotinan em dikarin xwe wek civat baştı binasin û bidin nasandin. Ew wek neynikekê ne, bi her aliyan ve dikarin civata kurdî bînin ber çavan.

Bêguman her gotineke pêşîya yekten ji devê yekî/yekekê ji nişka ve derneketiye. Her gotineke pêşîya, serpêhatî û çîrokeke wê heye, di dawiya bûyerek giring de peyda bûne. Pêwistî û hewcedarîkê ew afîrandine. Dema em tecrûbe û ceribandinêن mirovan yên sedsale jî, li ser van etaban de zêde bikin, wê çaxê mirov dibîne ko her gotineke pêşîya li ser bingehê ked û zehmetekî aqilmendiyê peyda bûye, forma xwe ya dawî wergirtiye.⁶

Her gotineke pêşîya ya li ser jinan, raste-rast rewşa jinan tîne zimîn. Beşek ji wan jî, rewşa jinan dane ber çavan, lê belê li ser tiştên mayî hâtine gotin û wan tînin zimîn. Ji ber ko li ser tema jinan şax vedane û jin ji xwe re kirine bingeh, ev beşa duwemîn ya gotinêن pêşîya dîsa ji bala mirovan vedigerînin li ser rewşa jinan, wek misal dema mirov dibêje *qîz mîvanê malê ye*, mirov dixwaze bibêje keçek nikare heta mirinê di malê de bîmîne, ji aliyê din ji bona tiştên derbazok jî mirov dikare vê gotina pêşîya bi kar bîne. Dema mirov tenê vê mana duwemîn bide ber çavan, kok û binyata peydabûna vê gotinê mirov nikare (wek rewşa keçan) bavêje alîkî. Ev kok û binyatêن çend gotinêن pêşîya jî, bona ronîkirina vê analîza me ya li ser jinan gelek rênîşandar û kîrhatî bûne. Ji aliyê din, ji der gotinêن pêşîya, ji bo xurtkirina çend nêrîn û baweriyêن xwe, me ji ferhenga hevbêjeyêن (tabîr) kurdî jî gelek îstîfade kir.⁷

Di nav hevbêjeyêن kurdî de, gelek hevbêjeyêن derbarê jinan de hene, wek gotinêن pêşîya rê nîşanî me didin. Bi sedan gotinêن pêşîya yên kurdî nîşan didin ko civata kurd giringîke mezin daye jinan û babeta jinan.⁸ Li her heremê angorî zarav û devokan şax û guhartokêن wan jî hene. Hemberîhevkirin, danberhevîna wan bêguman gelek balkêş û kîrhatî ye. Xebateke wisan dikare gelek zaniyarî û ahahdariyan derxe holê. Lê belê ev yeka xebateke bi serê xwe ye.

Jin kaniya jiýînê ye

Ji nav gotinê pêşîya yên kurdî de dema mirov motîvên zihniyetêñ jinparêz (pro-jin) hildîçine, gotina ko bala mirov zêdetir dikşîne li ser xwe, bêguman gotina *jin kaniya jiýînê ye*. Gelo civata kurd çawa xwe gihandiye vê baweriye? Ji bo peydabûna nifşen nû û berdewambûna mirovatiyê, bi anîna zarokan ve, jin wek fakorekî produktîf, adan û fêkîdar hatiye hesibîn. Bi anîna zarokan, jin bûne nîşana bereketê, wan tam û lezeteke nû daye jiyanê. Wan mirovatî ji windabûnê xelas kirine, anîne vê rojê. Dema mirov malbatêñ kurdî yên pir-zarok dide ber çavan, ew hezkirina zarokan, wek evîn nêzîkî babet jinan bûye. Ev jinêñ pir zarok, ji aliyê civatê de awa hatina nasandin: *maka nodik nod canûyî*. Bi vî tehrî jinan, angorî civatê xemlek daye jiyanê, jiyan neqîşandiye. Ev hurmeta li dor jinan berev û tîr dibe, di gotineke din de dighêje dereceke here bilind: *jin bedewiya emir e*. Bêguman ev gotinêñ zêrîn, cihê jinan di civata kurdî de bi şemal û bi tîrejeke gelek tûj ve ronî dikan, serbilindî û rûmeta jinan zêdetir dibiriqînin, nîşan didin. Anîna zarokan ji aliyê jinan de pêşkêseke here mezin hatiye hesibîn, zarok parçek ji canê xwe hesab kirine. Vê yekê hîsêñ merhemat, dilşewatî, destvekiriyê, parastin û dilovaniyê li bal jinan zêdetir kiriye. Vê realîtê, jin bi malê ve girê daye: *jina bê zar dilê wê naşewite malê*. Heta mirinê jî, pey zarokêñ xwe dikevin. Bi kurtî, wek gotineke mayî dibêje: *jin sebir e*.

Di civata kurdî ya îro de carcar dibe mirov rastî rêç û şopa van peyvîn delal neyê, jiýîn dikare mirova dilsar û rûsar bike. Lê belê tev van gotinêñ pêşîya, folklor tenê şîreta me dike, riyêñ cihanake dilşa û şaneşîn nîşanî me dike, wek bîr û bawerî dimîne: *berê texte ya jinan bûye*. Ev gotina pêşîya ji alîkî de xirabiyêñ civata îro, kêmâsiyêñ navbera jin û mîran rexne (krîtîk) dike, ji alîkî de pirêñ duh-îro-sibê bi tehrekî folklorîk ava û xurt dike. Ji aliyê din ev gotina pêşîya derbarê lêkolîna bingehêñ malbatêñ maderşahî (jinhakim/dayîkhakim) de jî, derîkê li pêşîya me vedike, ji me re dibe alîkar.

Kurd zêdetir ci hez dikin? Bersîva vê pîrsê di nav romantîkiya kurdan de vejartîye: Kurd ji gişka zeftir jina xwe, hespa xwe û çeka xwe hez dike. Gotineke mayî vê gotina pêşîn hin jî zelaltir dike: *mîrê kurmanc gava têr xwar ya mirovan dikuje, ya jinekê direvîne*. Hemû ev gotinan, beşekî folklorê jî pêk bînin, dîsa wek xemlêñ jinparêz, der-

barê »siyarên rojhilate« de me gelekî ronî dikin, çend materiyalên folklorîk pêşkêşî me dikin.

Dema mirov dixwaze bighêje serfirazîkê û bibe xudanê cesaretekî mezin, civatê çend motîvên alegorîk ji rewşa jinê û bedewiya jinê hilçandiye, daye ber çavan. Ev gotinên pêşıya jî nîşan didin wekî civatê rûmeteke çawa bedew daye jinan, çima jin wek pîvan ji xwe re hilbi-jartiye.

- *Bi xweziya, dest nagihêje baqê keziyan.*
- *Dilê tirsonek sîngê gewr nabîne.*

Dema mirov hemû van gotinên pesndar yên ko derbarê jinan de hâtine gotin an jî rewşa jinan dane ber çav, ji xwe re xistine kok, lê belê babetên mayî tînin zimîn, berev dike, mirov dibîne ko, jinan di nav folkora kurdî de ji xwe re textek ava kirine, bi serbilindî dijîn û timê dilşa ne, rû bi ken in.

Jin wekî avakara malê

Çawa tê zanîn civatek, wek komên piçûk ji gelek malbatan pêk tê. Dema mirov hemû van malbatan berev dike û digihîne hev, wê çaxê civatek saz dibe. Gelo ji bo selamet û pêşeroja her malbatekê, erk (wazîfe) û berpirsiyariya mezin kî hildide li ser milênen xwe? Bersîva vê pirsê, mirov bi alîkariya gotineke pêşıya ve dikare bide: *avaya malê destê jinan e*. Ev gotina him erkekê, him jî berpirsiyarîkê dispêre jinan. Jin him ji bo parastina zarokan, him ji bo birêvabirina karêن hundirê malê, wek paqîjî, amadekirina xwarinê û him jî di afirandina berhem û mehsûlekê de timê aktîf e. Gotineke mayî dîsa dibêje: *avahiya malê kebanî ye*. Gotineke nêzîkî vê gotinê jî awa ye: *jin dike malavayî*. Dema mirov van gotinên pêşıya baş, hûr û kûr analîz dike, bi hêsanî dibîne ko jin ne tenê avakarê malê ye, wisan jî idara malê dike, malê diparêze: *jin gol e, mîr çem e*. Gotineke nêzîkî vê gotinê jî awa ye: *mîr kanî be jin lîç e*. Ango jin berev dike, depo dike û wek bankekê, roleke nîv-aborî dilîze. Peyva lîç bona golên piçûk û berevbûna avê tê bi kar anîn. Ev herdu gotin jî berpirsiyarîkê mezin dispêrine jinan, kebaniya malê dibe şenahiya malê: *mal têr e, kebanî şêr e*.

Rûmeta ko civata kurd ewqas daye jinan, nedaye tiştekî mayî. Civatê

jin wek nîşana namûsê ya here mezin hesibandiye. Peyva jin gelek caran cihê namusê de tê bi kar anîn. Peyvên namûs û jin ketine zikê hev, wek gotineke pêşıya dibêje: *mîrê kurmanc boy namusê kevçî av de dixeniqe*. Dîsa gotineke mayî giringiya namûsê tîne zimîn: *namûs û xîret ne bi peran e*. Mîr timê namûsa jinê xwe li ser her tiştî re digirin, ji bo namûsa xwe dikarin canê xwe jî bidin. Jin û namûsa wê pirseke hebûn û tunebûna mîran e, gotineke pêşıya vê yekê gelek vekirî eskere dike: *namûsa jinê, çeka mîr e*. Namûsa jinê dibe namûsa mîran jî: *namûsa mîr jin xweyî dike*.

Cihê dayikan tijî nabe

Dê (dayîk) di folklorâ kurdî de hurmeteke mezin dibînin. Di warê mezinkirina zarokan de keda dayîkan mezin e. Ev yeka ji ber çavêن civatê nereviye, ji ber vê yekê jî civatê di nav hemû kategoriyêن jinan de giramî û hurmeteke bêhempa ji bo dayîkan nîşan daye, wek gotineke pêşîyan dibêje: *dayîk hate derda Xwedê rabû berda*. Dema civatê dayîk û bav rûberî hev kirine, dane pêşberî hev, civatê li aliyê dayîkan cih girtiye: *dê ji bav şirîntir e*. Çima gelo ev bawerî bi salan wek gotineke pêşıya li ser zar û zimanê mirovan geriyaye? Bi çend gotinênen mayî ve, civatê bersîva vê pirsê jî daye:

- *Dê hejandiye, dê mîjandiye.*
- *Zarok li ser milê dê mezin dibil.*
- *Zarok ya dê ye, ne ya bavê ye.*

Di warê mezinkirina zarokan de keda dayîkan zêde ye, ev peyvên zêrîn ji bo dayîkan hatine gotin. Ji alîkî de her çiqas her jin dayîk nîn be jî, ev peyvan bi tevayî ji bo jinan jî hatine gotin. Çawa em dibînin ew rûmeta ko civatê daye dayîkan, ewqas nedaye bavan, civatê angorî keda mirovan adalet belav kiriye: *bav dimire zar nizanin bavê wan miriye, dê dimire stoyê wan xar dibe*. Ji bo bêşînoriya xirabiya mîrekî nîşan bidin, gotineke pêşıya awa dibêje: *mîrikê xirab, çiçikê diya xwe geztiye*. Her çiqas gotineke pêşıya nîn be jî, dema imkanekî mezin dikeve destê yekî, ji xwe re stareke germîn dibîne, ifadeke kurdî dibêje: *filankes kete zikê diya xwe*. Ji aliyê din, gelek mirov wek kevneşopîkê, erf û edetekî naxwazin nifirêن diya wan li ser wan bin,

dema dayîkan şîrê xwe li zarokekî xwe heram kir (wek *şîrê min te heram be!*), êdî ew nefer dikeve bin barekî giran yê ruhî. Dema karê wî di jîyîna rojane de bi hev ne hat, ew sernekeve, ew vê carê van nifirêن diya xwe tîne bîra xwe. Civat bi xwe jî van nifirêن davêje cihekî guhê xwe, di pêşerojê de kontrol dike, neheqiya li dijî dayîkan napejirîne. Bi kurtî angorî materiyalên folklorîk cihê dayîkan zû-zû nayê ti-jî kirin.

Di folklorâ kurdî de motîva jana damariyan wek motîveke bingehî tê hesibîn. Dema jîna yekî dimire, ew zarokêن ko bê dê dimînin, dikevene ber destê damariyan. Lê belê damarî tu wext cihê dayîkan nikarin tijî bikin. Di vê babetê de dayîk û damarî wek du hêzên li dijî hev in. Gotineke pêşîya cihê dayîkan gelek baş nîşan dide: *Wexta dê dimire, destê wê jêkin, pê etîma bikutin*. Ev gotina dixwaze bibêje ko zarokêن êtîm dimînin, bira nekevin ber destê damariyan.

Wekheviya jin û mîran

Bi kêmanî gotinêن pêşîya û folklorâ kurdî tu cidatîk wek mirov nexistîye navbera jin û mîran, herdu cins jî wek mirov hesibandiye. Jin, di folklorâ kurdî de tu wextan piçûk nehatine dîtin, rûmeta wan nimz nebûye. Her çiqas di jiyana rojane de jin carcar piçûk têن dîtin, têن zêrandin, pêpes kirin, hincirandin û ji aliyê mîran de zordestîke mezin dibînin jî, di jiyana folklorîk de em nikarin rastî dinyake wisan tarî bêن, xeletî ne xeletiya folklorê ye, ev rewşa xirab bi gelek faktorêن mayî ve girêdayî ye. Zordestiya li jinan dibe, gotineke pêşîya gelek vekirî eşkere dike, lê belê rûreş dike: *jin darê şkestî ye*. Ev gotina pêşîya, li ser hîmîn baweriya pakî û napakî, rindî û nerindiyê ava dibe, nepakî û nerindiyê protesto dike. Di malê de kesa here xebatkar bêguman kebanî ye. Civatê dîtiye ko, dîsa jî ew ji gelek tiştan bêpar e û ev yeka wek neheqîke mezin dîtiye, rexne kiriye:

- *Kebanî timê bêpar e.*
- *Kebanî ya melûn e, ya mehrûm e.*
- *Jin darê şkestî ye.*

Ev gotinêن pêşîya jî nîşanî me didin ko, civatê zordestî û neheqiya li jinan dibe, timê anîye zimîn û ev newekheviya li ber çavêن civatê nere-

viye, dest daye li ser vê rewşa xirab. Dema em çend gotinên pêşıya berçav dikan, em dibînin ko civatê timê wekheviya jin û mîran li ser her tiştî re girtiye û qet ne be ev wekheviya bi gotin be jî, hêvî kiriye:

- *Dê tev bavê cote bask e.*
- *Şêr şêr e, çi jin çi mîr e.*
- *Jin dîwarê hundir e, mîr dîwarê derva ye.*
- *Jin, mîr takî ne.*

Gotina şêr, şêr e, çi jin çi mîr e, çawa em di gelek serkaniyan de rastî wê dibin, êdî bûye nîşana wekheviya jin û mîran. Dema gilî tê ser jinan, bêguman cara pêşîn ev gotina tê bîra mirovan û di nav kurdan de gelek belav bûye, gotineke here populer e. Ev peyvîn zérîn, bawerî û dîtinên civatê yên li ser rewşa jinan gelek bi vekirî diyar dikan. Hemû ev gotinan nayê wê manê ko bi rûçik û karekterên xwe ve, jin û mîr yek in. Civatê ev cidatiya jin û mîran jî tespît kiriye û çend sînor jî kişandine: *jin jin gotî, mîr mîr gotî*. Di zimanê kurdî de peyva serjinik, hinekî jî nezelaliya van sînoran nîşan dide. Çawa tê zanîn ev peyva ji bo mîrê ko zêde serê xwe dixe karê jinan tê bi kar anîn. Ji aliyê din, civatê wekheviya jin û mîran bi zimanekî din, awa nîşan daye:

- *Jin heye ji mîran zêde ye.*
- *Kulfet heye ji sed mîrî zêde ye.*
- *Jina baş ji hezar mîrê xirab çêtir e.*
- *Ji kurê bêxîret, qîzeke kor paktir e.*
- *Qız hene heft kura nadîn.*
- *Qîza filankesê xûna mîrekî ye.*

Di hevbêjeke kurdî de, dema gilî tê ser jin an jî keçeke jêhatî û mîrxas, awa tê gotin: *caba heft mîra dide*. Jinên awa di nav kurdan de *keçebav* têni bi nav kirin. Bi xwe jin be, lê belê bi mîra çûbe, ji wan re jî mîre-jin dibêjin. Gelek gotinên pêşıya bi eşkere nîşan didin ko tu wext mîr jî jinan hêjatir nînin, ne hèztir û ne jî jîrtir in. Herdu cins jî mirov in û wek hev in, her jins jî angorî keda xwe, hêz û kabîliyeta xwe tevî avakirina malbat û civata xwe dibin. Ji aliyê din, civatê ev yeka jî nîşan daye, wekî him di nav jinan de, him jî di nav mîran de kesên nebaş hene, kesên xirab hene, hemû wek hev nînin.

Dema mîrek dikeve tengasiyê, bêgav û neçar dimîne, cara pêşin jin tê hewariya wî û mîr xwe davêje li ber bextê wê: *jin kela mîra ye*. Dema xûn dirije, mirov ji hev têñ kuştin û dijminatiyên mezin navbera malbat, eşîr û êlên kurdî de pêş da têñ, rola jinan mezin dibe. Ji bo sek-inandina şer, ew wek hêzên aşîtîxwaz, çareserkar xwe berpirsiyar dihe-sibînin, pêşiyê li van şerîn neheq digrin, xirabiyê naxwazin:

- *Kulfet diçe xûnê, xûn safî dibe.*
- *Mîra xiwe avîtin kewarê, jin şandin hewarê.*

Hemû ev gotinan nîşan didin ko ci jin, ci mîr, herdu jî can in, mirov in, herdu jî di tanga (alî) xwe de, dema imkan û mecal têkeve dêst, dikarin bîghêjine serfirazî û serketinêñ mezin, di avakirina civatekê de angorî hêza xwe beşdar û cih digrin. Dema wan dest da dest, pişt dan pişta hev heta mirinê jî, tu hêz bi wan nikare: *jin û mîr tevr û bêr*. Di nav xetêñ vê gotina pêşiya de jî, mirov dîsa rastî rêç û şopa wekheviya jin û mîran tê.

Motîva jina baş û jina xirab

Di folklorâ kurdî de civatê her çiqas cihekî bi rûmet daye jinan jî, di navbera jina baş û nebaş de sînorek jî daniye. Bi vî tehrî hertim jina baş rûspî kiriye, jina nebaş rûrêş kiriye. Civatê hemû jin nexistine takî ter-aziyê, ji vê xeletî û şaşiyê xwe parastiye, dûr maye. Ev herdu gotinêñ pêşiya derbarê vê yekê de me gelekî ronî dikin:

- *Jin jî heye, jinkok jî heye.*
- *Jin ser jinê re heye.*

Berî ko civat bala mirovan bikşîne li ser jinêñ nebaş, zêdetir rewşa jina baş raxistiye ber çavan û motîva jina baş afirandiye. Bi vî tehrî civatê xwestiye, bingeh û hîmîn her malbatekê xweş bêñ avîtin, sibê-dusibê, di pêşerojê de ji cihê xwe nelivin, neliqin. Çend gotinêñ pêşiya bi tay-betî li ser jinêñ baş hatine afirandin:

- *Jina ba şbêmene birê mîrê xwe ye.*
- *Jina baş namûsa mîrê xwe ye.*

- *Jina baş dûrva kivş e.*
- *Jina baş sebir e.*

Civatê timê baweriya xwe bi jina çê û baş anije, cesaret daye wan, şahsiyeta wan xurt kiriye û pêş da biriye:

- *Bira jina çê be, bira nav ordiya esker be.*
- *Keça bi esil li nav tabûra leşkerê Romî de be jî, kes pê nikare.*

Gelek gotinê mayî jî hene ko, cidatiya jinê baş û jinê nebaş eşkere dikan, li ser jinê nebaş, xirab rexnan dibarînin:

- *Axiriya diranê dêşe kişandin e, jina xirab berdan e.*
- *Jin heye gula mêtê xwe ye, jin heye kula mêtê xwe ye.*
- *Jin heye bira ye, jin heye birabir e.*
- *Jin jî hene, jan jî hene, merhema dilan jî hene.*
- *Jina çê merîva dike wezîr, jina xirab merivan dike rezîl.*
- *Kulfeta xirab mêtan serberjêr dike.*
- *Jina xirab bênamûsiya komê ye.*

Di civata kurdî de, her wisan jî di gotinê peşîya de komeke jin, jinê here xirabtir hatine hesibîn. Bi taybetî jinê xebergerok, virvirî, dikan bilebil, zêde xeber didin, kûdkudo û pîrhevok di folklorâ kurdî de timê di nav kategoriya »jinê xirab« de cih digrin. Carcar dema em rastî çend motîvên ko jina serberjêr dikan, rûmeta wan winda dikan têñ jî, ev gotinan ne hemû jinan, tenê ji bo jinê xirab hatine bi kar anîn. Ji ber ko dema em naveroka çîroka peydabûna van gotinan raçav dikan, em dibînin ko cara pêşîn jineke xirab bûye bayisê peydabûna van gotinan, ne jin bi giştî. Ji ber vê yekê jî element û motîvên li ser jinan timê pozitîf in, her çiqas çend motîvên negatif hebin jî, ev yeka jî mercen piçûkdîtina jinan yên dîrokî ve girêdayî ye, bi taybetî yên olî û pederşahî...

Salêñ keçîniyê

Di jiyanâ her jinekê de salêñ keçîniyê (keçtî) cihehî bi taybetî digrin û pişti gelek salan dîsa dem-dem têñ bîranînê: *pîri û kalî roja reş e, qîzti*

û xorî gula geş e. Di her malbatekê de hebûna keçan wek xeml, nexş, şenahî û dewlemendîkê hatiye hesibîn. Civatê keç ji hemû xirabiyê parastiye, nexwastiye navê wan xirab derkeve, di nav civatê de sosret û rezîl bin. Keç hene, di civatê de bûne xweyê rûmeteke mezin: *qîza filankeşê xûna mîrekî ye.* Ev guhdariya ko civatê li ser keçan pêk aniye, bêsedem nîne. Ji ber ko keç ji bo etabeke jiyanê ya nû xwe amade dikin, pêwist e ew di nav xweşî û selametiyê de mezin bibin, navên wan dernekeve xirabiyê:

- *Bira mirov ziyareta xirab bike, navê qîza xirab neke.*
- *Bira qîzê bibin ser xençerê, nebin ser xeberê.*

Dema keçek mezin dibe, tê salên mîrkirinê, gelo ev keça azep û xama nesîbê kê ye? Bersîva vê pirsê, çawa em dibînin di çend gotinên pêşıya de gihiştiye zelalîkê. Gotinek dibêje: *keç ziyaret e.* Çawa tê zanîn hejmara kesên ko diçin ser ziyaretan zêde ne. Di nav van kesan de, gelek dilketiyên keçikê hene, keç ji nav van kesan yekî ji xwe re wek mîr hildibêre. Civatê bi alîkariya vê tespitê xwastiye pêşıya mîrkirinên bêdil raweste, alternatifîn cida cida, imkanên teze pêşkêşî keçan bike, toleransekê peyda dike. Civatê xwastiye bibêje ko bi darê zorê tu tiştek naçe sérî:

- *Keçik wek sêva darê ye, herkes kevirê xwe davêjê, kî bixe wî re ye.*
- *Qîz heye dara rez e. Hatî û çûyî kewtiyê xwe davêjê.*

Ji aliye din li ser keçan pêkanîna zordestiyê û di malê de zêde hiştin û girtina keçan ji aliye civatê de baş nehatiye dîtin, ew wek mîvanên ezîz hatine ezimandin:

- *Qîz ewledê xelqê ne.*
- *Qîz mîvanê malê ne.*
- *Qîz zebeşê gihiştî ne.*
- *Keç hewsar nabe.*

Jiyan ji bo her keçekê wek xewnekê ye, xewnerojekê ye. Ji wana gelek dilçivîk in, di nav gelekan de xortxapînokî dibe edetekî, bi şeng û şepaliya xwe tê nasîn: *dengê qîzan zû diçe kuran.* Ev rewşa keçan ji ber

çavê civatê nereviye: *ro çû dîza, bû fitara qîza*. Çawa gelek zane dibêjin, bi hatina baharê ve hîsên evînê, hevhezkirinê zêde dibil. Gotineke pêsiya bandûra baharê li ser keçan bi vî awayî tîne zimîn: *bahar e, qîzik ci har e*. Peyva harbûnê, li bal keçan zêdebûna hîsên seksuel nîşan dide.

Bi kurtî ew qîmetê ko civatê daye keçan, tê wê manê ko daye jinan jî. Keç bûne nîşana hebûna mirovan û komê:

- *Bedew, gund tînin ber çav.*
- *Bavê bê qîz, çiyayê bê av e.*
- *Qîzê kê hene, ew padşa ye.*

Ji aliyê din civatê hebûna keç û kuran ewqas zêde mezin nekiriye, bi giştî zarok wek şîrînaya malê ditiye:

- *Qîz hene heft kura nadin.*

Şerê bûk û xwesûyê

Dema her keçek mîr dike, ji bo wê jiyaneye nû jî dest pê dike. Rojêن keçaniyê êdî xelas dibil. Bûktî jî wek keçaniyê di jiyanha her jinekê de dikare bibe perîyodeke dilşa. Eger di malê de xasî hebe, hejmara zarokan jî zêde be, êdî salêن keçanî û bûktiyê dûr dikevin: *qîztî çiqayî xweše, bûktî gula geşe -wexta dikeve ber darê derûşê, per û baskê wê diweše*. Di gotineke mayî de bûk dîsa gilî, gazin û loma dike: *bûme bûk, bûme pepûk*.

Di her malbateke nû pêkhatî de, di malê de li ser parevekirina îktîdarê û birêvabirina karên malê, gelek caran di navbera bûk û xwesûyê de dijayedî, nerehetî û şerên mezin dikarin dest pê bikin. Gelek caran dema keçek mîr dike, tê malê, ne tenê rastî mîrê xwe tê, wisan jî rastî diya mîrê xwe tê û ev pîrejjina dibe xwesûya wê. Angorî xwesûyê, ew rewşa malê ji bûkê çêtir zane û ji ber ko demekê di avakirin malê û mezinkirina zavê de keda wê zêde derbas bûye. Ew dixwaze hertim gotinêن wê bêñ cih, naxwaze ev bûka nû li ser wê re be. Ev rewşa nû gelek caran dibe bayisê parçebûna malbatan, sedemêm lihevnekirinêñ bûk û xwesûyê, bûk û zavê û dê û kur. Navê bûkê gelek caran xirab derdikeye: *bûka xeniqandiye heft xasî, ji bilqîniya cêr tirsî*. Carcar

pêwendiyên bûk û xwesûyê serast dibin, di malê de xweşî û rehetîk peyda dibe: *bûka çê ye, xasî dê ye*. Ji bo ko di malê de hertim xweşî û dilşahî hebe, diya kur berî zewacê çavê xwe digerîne wekî »bûkeke baş« ji »xwe« re û keçeve rind ji kûrê xwe re bibîne. Eger keça birakî wê hebe, vê yekê ji bona pêşeroja xwe, pişt guhê xwe re navêje. Çend gotinê pêşıya vê yekê gelek başeskere dikan:

- *Bûka xala delaliya mala.*
- *Bûka apê kete kapê, bûka xalê delaliya malê.*

Êdî »kesake xerîb« û »keçen xelqê« di malê de tune. Pêwendiyên bûk û xwesûyê angorî dê û bavê keçikê, rewşa malbata wê, ji hev cida dibin. Çi dibe, bira bibe şerê bûk û xwesûyê naqede, heryek tanga xwe de royê dibîne:

- *Bûk anî leze, da ga û peze, sivika malê dîsa eze.*
- *Bûkê tune zar û ziman, xwesûyê tune dîn û iman.*
- *Bûk heye tifaqa malê xweyî dike, bûk jî heye xirab dike.*

Demeke wisan tê êdî rehetiya bûkê qet namîne, xwaziya xwe li rojêن bîhûrî tîne, keçaniya xwe digere. Firsend têkeve dêst, iro jî dixwaze here mala bavê:

- *Bûk wisan mala bavê hez dike, wekî ïznê bidî wê pêxas jî here.*
- *Berê bûkê têkeve mala bavê wê - wê bi serserê xwe jî here.*
- *Mala mîrê jinê xezne be jî, dîsa çavê wê mala bavê ye.*

Bêguman ev daxwaziya vegera malê, ne tenê bi derdê xwesûyê ve girê daye. Gelek faktor û sedemên mayî jî li ser vê vegerê bandûrekê nîşan didin, wek bîranîna »rojêن keçaniyê«... Bi kurtî şerê bûk û xwesûyê, wek şerê hewiyan di folklorâ kurdî de cihekî fireh digire.

Neçariya jinebiyan

Dema mîrê jinekê dimire, ew jina bî dimîne, di kurdî de jê re dibêjin *jinebî*. Ji bo jinekê windakirina mîr, bûyereke gelek tîş û tal e. Çend dijwarî, serêşî û tengasiyan peyda dike. Tenêmayîn ewqas ne hêş ye. Ji

aliyê din ji nû ve mîrkirin û zewaceke nû jî ewqas ne hêsa ye. Eger mîr li pey xwe zarok jî hiştibin, wê çaxê rewşa jinebiyan hin jî xirabtir dibe. Tenêmâyîn bi serê xwe êşeke mezin e û bala her kesî li ser jinebiyan e: *jina bî nakeve tu mala*. Jinebî ji ber şikbirinê, ji ber navê wê xirab dernekeve û ji bo selameta zarokan gelek caran naçe der û cînarان, mala xwe dimîne: *jina bî zef jê tê xeberdan*. Ev dorgirtina civakî, gerîna gilî û xeberan lingê jinebiyan dikine soleke teng, neçarî û bêgavî wan gelek dişîne û ji şerma nizane ci bike: *jina bî dest ber rû ye*.

Ji aliyê din, piştî mirima mîr, civat berpirsiyariya parastina zarokan jî dispêre jinebiyan. Ev yeka bona wan barekî giran e. Rojên kîf, xweşî û eşqê êdî qediyane. Naxwazin bi dîtina mîrekî din, navê wan xirab derkeve. Çawa tê zanîn mesajên wek »jina bênamûs xirabiya komê ye« guhêن wan qûl dikin. Bi vî tehrî her tişt li ber çavêن wan reş dibe, bîna wan gelek caran teng dibe. Bi kurtî jiyan bona jinebiyan bi piranî tarî û sar dibe, nizanin ci bikin: *jina bî mîna meha Adarê ye, geh digrî, geh dikene*. Ji ber van êşen jinebiyan, ew navbera du avan de dimînin, careke din mîr bikim an na? Bersîva vê pîrsê, ewqas ne hêsa ye, ji ber vê bêgaviyê navê jinebiyan carcar xirab derdikeve: *jina bî du rû ye*.

Dema jineke yekî dimire, eger zarokên wê malbatê hebin, rewşa mîr jî wek jinebiyan gelek xirab dibe. Tijîkirina cihê jina berê ewqas ne hêsa ye, bi mirina jinê, per û baskê van mîrebiyan -j inmiriyan yekten dişkêن, diweşin: *jin dimire, mîr serbirî dibe*.

Protestoke dijî pirjiniyê

Di nav gotinêن pêşıya yên kurdî de beşek gotin jî, çawa tê xuyan li do-ra temaya pirjiniyê berev dibin. Em ji vê yekê derdixin ko, civatê ev tehrê zewacê nebaş dîtiye û serda çûye. Anîna jineke nû, ne ji aliyê zarokan de, ne jî ji aliyê dayîkê de hatiye pejirandin û ew li dijî anîna vê jina nû derketine. Ev jina nû ji aliyê zarokan de wek *jinbau*, ji aliyê dayîkê de jî wek *hewî* hatiye bi nav kirin. Hatina hewiyê di pêwendiyêن jin û mîr de qelîştekekê peyda dike û di malê de dibe sedemên dilsarîke mezin. Civatê zêdetir êrîş biriye ser bavê, ew protesto û rûreş kiriye, wek gotineke pêşıya dibêje: *mîrê du jina du rû ye*. Di malê de serdestiya kîjan jinê hebe, bêguman statûya jina din dikeve, qedrê wê namîne. Pêwendiyêن mîr bi kîjan jinê re xurt bin, bi kîjan jinê ve kîfa wî zêde tê, ew jina dibe jina here berbiçav û serdest.

Jina ko rûmeta wê zêde namîne, bi piranî jîna yekemîn e, wisan nîn bûya, mîr jîna duwemîn nedianî (hejmara jîna dikare bighêje sisê û çaran jî). Jîna ko dibe gula malê û şirîna malê, zêdetir jîna bedew, ciwan û jîna ko salê wê hindik in. Çi dibe bira bibe, bi taybetî jîna yekemîn, dema jîneke mayî tê ser wê, ji vê rewşê xirabtir, rewşike din nabîne: *Bira meriv here ser sêwiya, neçe ser hewiya.* Carcar herdu jîn jî, ji rewşa hewîtiyê aciz in. Nerazîbûna herdu aliyan qet nebe li ser tema pirjîniyê dibe sedemê hevra peyivîn û dîalogê. Lî belê tecrubê pirjîniyê çawa nîşan didin, jîna yekemîn hatina jîna duwemîn wek afatekê dibîne: *jin dibê bira bextê min hebe, bira çavekî min tune be.* Jîna paşîn ji bo ko xwe têxe çavê mîrê xwe, ji destê wê ci tê dike, bi mîrê xwe ve dizeliqe û vê gotina pêşîya ji xwe re dike guhar, dixe guhê xwe: *jin dikare mîra mîna destmalan li ser destê xwe bigerîne.* Ew, vê nêzîkayê hin caran li dijî jîna yekemîn bi hostatî û bi zanetî bi kar tîne, carcar mîr û jîna pêşîn berî hev dide, rûmeta wê hildide bin piyan, wê pêpes dike. Cîvatê bi çavekî baş hatina hewiyê nenihêriye û ew pîroz nekiriye: *jîna paşîn mîna pînê berovajî ye.* Jîna pêşîn bi hatina jîna paşîn ve, gelek diêşe, ber xwe dikeve, êdî dibe xulam û berdestîke malê. Ji aliyê din her çiqas, mîr çend rojên xwe bi kîf û eşq derbas dike jî, di malê de bêpergalîke mezin dest pê dike û rewşa malê serobino dibe: *Heçî merivê mala xwe bi destê xwe xirab bike, bira du jîna bîne.* Gotineke mayî jî awa dibêje: *kebanî bûn sêsê, kodik li ber sê.*

Wek jana hewiya, jîneke mayî jî jana jînen bira ne. Çawa tê zanîn gelek malbatêñ kurdî, malbatêñ fireh in, di malê de çend bira bi zar û zêçen xwe ve dikarin bijîn. Lî belê carcar dubendî û nerehetiyêñ navbera jînen wan her diçin mezin dibin. Li ser parvekirina karêñ malê bi hev nakin, dibin dijminê hev. Çend gotinêñ pêşîya li ser jînen bira ne, li ser jîntiyan in:

- *Jinê bira meriva dikin şîva gura.*
- *Jîna bira nola gura.*
- *Jîntiya hev ra kire bilebil, bira hev ra bûne derd û kul.*

Jin û namûs

Cîvatê sînorêñ namûsê û bênamûsiyê gelo angorî kîjan bingehan kişandiye? Dema mirov derbarê vê yekê de çend bawerî, agahdarî û

zaniyariyan ji nav gotinên pêşıya hildicîne, li ser kûr difikire, mirov dibîne ko him jin, him jî mîr piştî zewac û mîrkirinê pêwist in, hin »kincên nû« li xwe bikin, gavêن xwe bi pîvan bavêjin. Ew divê li pey jin û mîrên mayî negerin û çavêن wan ne li der be: *her kezîsorek, simbêlsorek li ber heye*. Şaxeke mayî ya vê gotinê jî awa ye: *her kezîzerek simbêlsorek li hember e*. Dema du kesan biryar girtin wekî bizewicin, pêwist e li ser biryarê xwe bisekinin. Di navbera wan de peymanek hatiye girêdanê: *jin û mîr ne finoyê sor in, hero serê yekî bin*. Ci jin, ci mîr be, herdu jî angorî vê peymanê nikarin wek rojêن keçanî û xor-taniyê pey yarêن teze bin, pey dilketiyêن nû bin. Dema jin û mîr ji hevre ne helal bin, wê çaxê dubendî û serêşiyêن mezin dikarin derkevin rûyê avê. Ev serêşî heta mirin û kuştinê jî diçin. Di rewşeke awa de dîsa em têن li ser motîva »jina xirab« û »mîrê xirab«. Ji bo çare-serkirina vê eşâ ko nayê kişandin, civatê derîk vekirî hiştiye: hevberdan (telaq). Gotineke pêşıya bi vekirî bona jin û mîrên ko hero dikevine qirika hev, ji wan re riya xelasiyê nîşan dide: *berdana jinê edetê dinê*. Mirov nikare bibêje timê jin dîbin sedemên malxirabî û hevberdanê, civatê wisan jî kêmasyiyêن »mîrê xirab« jî nîşan daye. Gotineke pêşıya derbarê vê yekê de çarçavekê pêşkêşî me dike, bi kêmânî jinê rûspî derdixe: *çiqas jine rind be, dîsa mîrî tol e*. Çawa tê xuyan ne tenê jin, dema li malê de nerehetî peyda bûn, mîr jî dîbin sedemên hevnekirinê. Li ser bênamûsiya »jina xirab« gelek gotinên pêşıya hene:

- *Kulfeta bêesil pêşa xwe davê li ser serê xwe.*
- *Dêlik ne bi ba be, kûçik nare cem.*
- *Jinê dil kir dîwar qûl kir.*

Tiştekî balkêş jî ew e, di nav gelek bêjebendêن (tabîr) kurdî de, jinêن xirab ji aliyê namûsê de bi tehrekî gelek tûj hatine rexne kirin, cidatiya wan û heyanan tune ye, ew wek *dêlik, kelb, çêlekan* hatine bi nav kirin. Ji ber ko li bal heyanan pîvanên edeb û ehlaq ji ortê rabûne, jinêن xirab jî wek wan heyanan hatine dîtin:

- *Çêleka nava boxa.*
- *Çêleka çil boxe.*
- *Kelba heram.*
- *Dêlka nava gund.*

- *Dêlka doxê.*
- *Bûye dêla ser cewra.*

Dîsa çend bêjebend ji aliyê namûsê de jinan rûrêş dikin, rexnan li wan dibarînin, wek:

- *Dawa xwe avêtine ser serê xwe.*
- *Delinga xwe herimandin.*

Gelo van jinê ko ji aliyê civatê de hatine gunekar kirin, navê jinan bi giştî çiqas xirab derxistine? Gelo hemû jin wek van jinê xirab hatine dîtinê? Gelo tevlihevîke awa, yekkirineke awa, li ser pêkanîna suretekî jina xirab di nav civatê de bandûreke çawa hiştiye? Bersîvên van pîrsan, dikarin cihê jinan gelekî zelatir û baştir bidin xuya kirin.

Ji aliyê din carcar mîr bêsebeb, bi jinê re şer dike, gelek tiştan ber xwe derdixe û dikare îftirayên mezin jî bavêje jinê: *li jina xwe meniyan bû, digot gava tu hevîr dikî quna xwe dihejînî.* Kumreşî, dexesî, çavnebarî û hesûdî di nava cotêñ wisan de gelek fire ye. Behecokî canê herdu aliyan jî dixwe û timê herdu alî jî şikê dibine hev: *dilê wî baltûza wî girtiye, meniya jina xwe digere.*

Civat di nav gelek salan de gihaye wê baweriyê ko ji alîkî de zewac, ji alîkî de yartî bi hevre nameşin. Hebûna her pêwendîkê, tunebûna pêwendîya din bi xwe re tîne, civatê gotina xwe awa kurt biriye:

- *Kî hêviya yarê ma, bê jin ma.*
- *Jin, mîr ne finoyê sor in, hero serê yekî bin.*

Çend gotinêñ pêşıya ko hene erk û berpirsiyariyê jin û mîran yên şevê, yên cînsî (seksuel) bi vekirî tînin bîra wan:

- *Jina zû radize mîrê xwe zû kal dike.*
- *Zilam hertim dixwaze, lê hertim nikare, pîrek hertim dikare, lê hertim naxwaze.*

Serkanî

- 1) Heciyê Cindî, *Meselok û Xeberokêd Cimaeta Kurda*, Erîvan, 1985.
- 2) Ordîxanê Celîl & Celîlê Celîl, *Mesele û Metelokênd Kurdî*. Weşanên Ronahî, Zurîh, 1976.
- Ordîxanê Celîl & Celîlê Celîl, *Mesele û Metelokê Cimaeta Kurd*, cilt I-II, Erîvan, 1969-1971.
- Ordîxanê Celîl & Celîlê Celîl, *Gotinê Pêşîyan* (bi rûsî), Moskova, 1972.
- 3) Hüseyîn Denîz, *Gotnê Pêşyê Kurda*, İstenbol, 1991.
- 4) A. Balî, *Gotinê Pêşîyan Ên Kurdî*, İstenbol, 1993.
- 5) Zeynelabidîn Zinar, *Xwençe*, cild I, Stockholm, 1987, Gotinê Pêşîya: rûp. 10-30.
- 6) Mele Mehmed Dêrşewî, *Miştaxa Çiya-Ji Gotinê Pêşîya*, Stockholm, 1989.
- 7) M. U. Xamoyan, *Ferhenga Kurdî-Rusîye Firazêologî*, Erîvan, 1979.
- 8) Ji bo ko xwendevan wan gotinê pêşîya yên ko li ser babeta jinan hatine gotin bi hêsanî bibînin, li ber destêwan bin, em piraniya van gotinê pêşîya angorî rêza alfabetê li jêr pêşkêşî xwendevanan dikin:

Avaya mala destê jinan e.

Avaya malê kevanî ye.

Axiriya diranê dêşe kişandin e, jina xirab berdan e.

Bihar e, qîzik ci har e.

Bav dimire, zar nizanin bavê wan miriye, dê dimire stoyê wan xar dibe.

Bayê gurkirî, jina virkirî, ji wanen tiştek dernayê.

Bavê bê qîz çiyayê bê av e.

Bavê pak mezelê wî ber derê qîzê ye.

Bedew gund tînin li ber çav.

Berê texte ya jinan bûye.
Berdana jinê edetê dinê.
Berê bûkê têkeve mala bavê wê - wê bi serserê xwe jî here.
Bextê dê cihêzê qîzê ye.
Bi xaziya dest nagihêje baqê keziyan.
Bila jin çê be, bira nav ordiya esker be.
Bila keç be, bira pîr be.
Bira kurek bibe, navê qîza lê daynin.
Bira li xêra birê bûna, jina birê mehir nedikir.
Bira meriv here ser sêwiya neçe ser hewiya.
Bira meriv ziyaretê xirav bike, navê qîzan xirav neke.
Bira serî hebin, kum gelek in.
Bira qîza bibin ser xençerê, nebin ser xeberê.
Bûk bi dilê zavê ye.
Bûk heye, kula xwesûya xwe ye.
Bûk heye tifaqa malê xwey dike û bûk jî heye bela dike.
Bûk li hespê ye, kes nizane nesîbî kê ye.
Bûk li me şerm dike, rû digre, zik vedike.
Bûk li hespê ye, kes nizane kesîbê kê ye.
Bûk siyarê hespê ye, kes nizane qismetê kê ye.
Bûk wisân mala bavê xwe hez dike, wekî ïznê bidî wê pêxas jî here.
Bûka apê kete kapê, bûka xalê delaliya malê.
Bûka malê rewşa malê.
Bûka malê raza qîz anî , gotin gunekarî ya xulam e.
Bûka malê şuxil de xwe dixapîne, xortan re kefçî û kodika tîne.
Bûka çê ye û xasî dê ye.
Bûkek anî leze, da ga û peze, sivika malê dîsa eze.
Bûkê tune zar û ziman, xwesûyê tune dîn û iman.
Bûkê xala, delaliya mala.
Bûkê xeniqandiye heft xasî, ji bilqîniya cêr tirsî.
Bûme bûk, bûme pepûk.

Çavê melle ser bûka cînara ye.
Çiqa jina rind be, dîsa mîrî tol e.

Damarî nabe dê û dak.
Dayîk hate derda, xwedê rabû berda.

Dê bû, lê bû dêmarî.
Dayê bibîne, dotê bistîne.
Dengê qîza zû diçe mala kura.
Dê bibîne û qîzê bihebîne.
Dê bû dêmarî, bav bû filê Kavarê.
Dê çî ye, dot jî ew e.
Dê, dotê şer kir, kêmaqila bawer kir.
Dê hejandiye, dê mêjandiye.
Dê ji bavê şirîntir e.
Dê û law şer kir, bêaqila bawer kir.
Dê tev bavê weke cote bask e.
Dêlik ne bi ba be, kûçik nare cem.
Dilê tirsonek sîngê gewr nabîne.
Dilê wî baltûzê girtiye, meniya jina xwe digere.
Dilê dê dotê jî hev dimîne.

Eger ez bibim keç ez zanim ezê doxîna xwe çend cara girê bidim.
Eva dil e ne savar e, parîkî lêdixe dibuhir e.
Ew pîreke zemanî ye, gelek gilî bin wê de hene.
Ez dibêm: xadimim, ew dibê: ji lawik û qîzikan ci xeber.

Ga bide ga miriya, jin bide jinmiriya.
Gerekê bûk bi dilê zavê be.
Gotin »apo jina te kevir e«, got »ji minetê çêtir e«.
Gula sûretê jinan, mîr e.

Her kezîzerekê, simbêlsorek li ber e.
Her kezîsorek, simbêlsorek li hembere.
Heta dilê dê nekevê, qîzê nadê.
Heta xanim xemîlî, def û dewat kemîlî.

Jin bedewiya emir e.
Jin çav li der e, mîr xalî li ser e.
Jin dara şkestî ye.
Jin dîwarê hundur e, mîr dîwarê derva ne.
Jin dibê bira bextê min hebe, bira çavekî min tune be.
Jin dikare jina rê dagerîne, mîr nikare jina rê dagerîne.

Jin dikare mîra mîna destmala ser destê xwe bigerîne.
Jin dike malavayî.
Jin dimire, mîr serbirî dibe.
Jin dinê de tu tiştî dizîva cem xwe xweyî nake, xenjî dilketiyê xwe.
Jin gol e, mîr çem e.
Jin ew e, zarê xwe xweyî ke.
Jin hene, beranberî sed mîrî ne.
Jin heye gula mîrê xwe ye, jin heye kula mîrê xwe ye.
Jin heye, ji mîran zêde ye.
Jin heye bira ye, jin heye birabir e.
Jin heye, zeviya ber gund e.
Jin jî hene, jan jî hene, merhema dila jî hene.
Jin jî heye, jinkok jî heye.
Jin jin gotî, mîr mîr gotî.
Jin kela mîra ye.
Jin kaniya jîyînê ye.
Jin kela ye, mîr girtî.
Jin ko heye nola marê nîvkuştî ye.
Jin ko hez bike dikare kevir qûl bike.
Jin mîr rûspî dike.
Jin mîr takî ne.
Jin mîra natirse wekî şerma wê tune be.
Jin ser jinê re heye.
Jin stûna malê ye.
Jin şûrê pişta mîrê xwe ye.
Jin û mîr, tevr û bêr.
Jina başbêmene, birê mîrê xwe ye.
Jin tenê xwe şerm dike, kesekî şerm nake.
Jin û mîr ne fînøyê sor in, hero serê yekî bin.
Jina başji hezar mîrên xirab çêtir e.
Jina baş sebir e.
Jina bedew bela seriyan e.
Jina bêxwedî har dibe, mîrê bêxwedî jar dibe.
Jina bêxweyî şerm nake.
Jina bê zar dilê wê naşewite malê.
Jina bî nakeve tu mala.
Jina bî zef jê tê xeberdan.

Jina bî mîna meha Adarê ye, geh digrî, geh dikene.
Jina bî dest ber rû ye.
Jina çê mîr radike.
Jina çê meriva dike wezîr, jina xirab meriva dike rezîl.
Jina du dotan, dide xwe du lotan, ne li vir ne jî li Cizîra Botan.
Jina kê baş e, mala wan timê dewat e.
Jina kudkudo nekeve destê dijminê min.
Jina kotî mîrê baş kotî dike. Jina baş mîrê kotî baş dike.
Jina mîr be, dibê: dûrî min here hespê min texe.
Jina nedelal çavê mirovan diêşîne, jina delal dilê mirovan diêjîne.
Jina paşîn mîna pînê berovajî ye.
Jina xirab, ne tê kuştin, ne jî tê berdan.
Jina şermîn bi milletekî, mîrê şermîn bi kirasekî.
Jina qenc seyd e, ya xirab qeyd e.
Jina te kîderê, tu jî ji wê derê.
Jina xirab bênamûsiya komê ye.
Jina xelkê ramûsanek, hespê xelqê meyîdanek.
Jina wî jin e, loma mala wî rengîn e.
Jina zû radizê, mîrê xwe zû kal dike.
Jinê bira meriva dîkin şîva gura.
Jinê bira nola gura.
Jinê dil kir dîwar qûl kir.
Jinê dil kir mêtê xwe sil kir.
Jinê go: Bira ez jina mîrê çê bûma, bira ez rojekê rûyê dinê bûma.
Jintiya hevra kire bilebil, bira hevra bûne derd û kul.

Kebanî timê bê par in.
Kebanî ya melûn e yan mehrûm e.

Keç hefsar nabe.
Keça mîran bi qelendê gavanân nayê.
Keçik wek sêva darê ye, herkes kevira davêjê, kî bêxe wî re ye.
Keçik ziyaret e.
Kî hêviya yarê maye, bê jin maye.

Kulfet diçe xûn, xûnê safî dibe.
Kulfet şurê dudev e li pişta mîr.

Kulfet ko heye parsûyê xar e.
Kulfet neynika malê ye.
Kulfet heye sed mîrî zêde ye.
Kulfet heye ceh dike genim, kulfet heye genim dike ceh.
Kulfeta bêesil pêşa xwe davê li ser serê xwe.
Kulfeta bî durû ye.
Kulfeta çê be, mîr jî pê re çê dibe.
Kulfeta destdirêj timê, rûreşe.
Kur darê bavê hiltîne, qîz teşîya dayê hiltîne.
Kulfeta dizî kir, wê bê berdanê.
Kulfeta eslê wê cî, tî be an birçî, bikujî cîkî de naçî kulfeta xirab mîran
serberjêr dike.

Kur li bavan diçin, qîz li diyan diçin.
Kurd ji gişka zeftir jina xwe, hespa xwe xwe û çeka xwe hez dike.

Li jina xwe hêcetê dibêjît: Tu çîma qûna xwe li ber bêjingêra dihejînî.

Mal têr e, kebanî şêr e.
Mala bê jin mîna aşê xirabe ye.
Mala mîrê jinê wekî xezne be jî, dîsa çavê wê mala bavê ye.
Mala ko jin nexwaşe, derê xwe kilît e.
Malê de tune arvanok, navê jinê dînanok.
Memikê qîza zeynet in, kelaxê pîrê robet in.
Mêrê kurmanc gava têr xar ya mirovan dikuje, ya jinekê direvîne.
Merikî xirab e, ewî çiçikê diya xwe gestiye.
Meriv ser xîret û namûsa xwe dimire.
Mêr jî hemû ne yek in, jin jî hemû ne yek in.
Mêr û jin hevra rik, xirab dibe ew malik.
Mêr kanî be, jin lîç e.
Mêra xwe avîtin kewara, jin şandin hewara.
Mêrê başjîna wî xurt e.
Mêrê du jina durû ye.
Mêrê Kurmanc boy namûsê kevçî av de dixeniqe.
Mêrî du jinik hêsîr e.
Mêrik li jina xwe meniyan bû, digot gava hevîr dikî qûna xwe dihejînî.
Mirikê xirab, çiçikê diya xwe geztiye.

Namûsa jinê çeka mîr e.
Namûsa mîr jin xweyî dike.
Ne jina belaş, ne xulamê be meaş, ne erdê kaş.
Ne jina kenokî, ne mîrê şermokî.

Parsûya jinê xar e, loma îtîbara wê tune.
Pîr bi ganekî nabe qehbik.
Pîrê bawer ne dikir mîr ke, ko mîr kir dewa heftek û heştekan kir.

Qîz ewledê xelqê ye.
Qîz çîra xelqê ye.
Qîz hene heft kura nadîn.
Qîz ko heye dara rez e, hatî û çûyî kewtiyê xwe davêjê.
Qîz mîvanê malê ye.
Qîz zebeşê gihiştî ye.
Qîza bêqelend zimandirêj e.
Qîza filankesê xûna mîrekî ye.
Qîzek nazand û gundek bezand.
Qîzê kê hene, ew padşa ne.
Qîzê dil kir, tas avît, dîwar qûl kir.
Qîztî çıqayî xweşe, bûktî gula geşe, wexta dikeve ber darê dergûşê, per
û baskê wê diweşe.

Reva jinê edetê dinê.
Rewşê jinan kofî ye.
Rewşê qîza kezîn e.
Ro çû dîza, bû fitara qîza.

Şêr şêr e, ci jin ci mîr e.
Şerê kûçikan li ser dêlan in.
şêwra jina bêriya bizina.

Usa milahîm e, mîna qîza kezî.

Xew nema li piçûka, fedî nema li bûkan.

Yekî jîna xwe berdabû, digot were bibe yara min.

Yê jinê berde li paniyê nanêre.

Wextê dê dimire, destê wê jêkin, pê êtîma bikutin.

Zar ya dê ye, ne ya bavê ye.

Zarok ji bavê de êtîm namînin, ji dê de êtîm dimînin.

Zaro li ser milê dê mezin dibe.

Zilam hertim dixwaze, lê herim nikare. Pîrek herim dikare, lê hertim naxwaze.

— BEŞ III —

Di destanê kurdî de serdestîke jinan

Di destanê (beyt, serpêhatî) kurdî de gelek realîteyên jîyînê hene. Jîyîn timê dikele û jîndariya van berheman me gelekî ronî dikan, şemal û tûrêjîn berfireh belav dikan. Ji bo ko dinya me hîn jî xweşiktir bibe, me di nav ronahîke mezin de dihêlin û mesajên gelek xurt dîghînin me. Di rojêng teng de têñ hawariya me mirovan, ji me re dikarin bibin referansên pir giranbiha. Ji bo ronîhîkirina cihê jinan di civata kurd de, ev destanan gelek rênîşandar in. Çawa em ê paşê jî bibînin cure cure materiyal folklorik û edebî pêşkêşî me dikan.

Dema mirov destanê kurdî baş analîz dike û tê de kûr dibe, di nav van destan, serpêhatiyêñ nav û deng de em rastî serdestîke jinan têñ. Jin di van berheman de xwedî erk û berpirsiyar in, hevsazî û pêşketina bûyerêñ van destanan de roleke mezin dilîzin. Ew, timê li dijî neheqî û bêdadiyê radiwestin, ber xwe didin. Di van destanan de tekoşîneke jinan heye. Jinan bi xwîna xwe ve be jî, di dinya van destanan de ji xwe re textek ava kirine. Ji bo bicihanîna daxwazî, hêvî û xewnerojêñ xwe timê ya xwe kirine. Bêdilî, dudilî an jî bêgavî di biryarêñ wan de kêm tê dîtin. Ew di vî warî de gelek serhişk in û gelek caran ji bo dilketiyê xwe dimrin, canê xwe didin. Ji ber vê yekê jî, di van destanan de em rastî tradejiyêñ mezin têñ. Di destanê kurdî de reng û tehrê bûyerêñ bingehî, çawa em dibînin bi destê wan diguhirin an jî ew bi xwe dibin bayisê bûyerêñ giring. Di pêkanîna avahiya bûyerêñ destanê de û di warê zelalbûna mesaja van berheman de, em dikarin bêjin ko mîrxas-êñ jinîn roleke berbiçav dilîzin. Hemû şax û guhartinokêñ van destanan de, jin di rêke rast û qenc de dimejin. Him ji bo azadiya xwe (emancipation), him ji bo azadiya welatê xwe, him jî bona mafêñ mirovî, çawa em dibînin ew xwe davêjin nav agirêñ mezin. Dema mirov hemû van destanan û şaxêñ wan rûberî hev dike, hemberî hev dike, mirov dibîne ko gelek babetê hevpar û hevreng di naveroka

wan de hene. Gelek caran mîrxaşen jinîn, mîrxaşen mîrîn dixin bin bandûr û kontrola xwe, mîran ji xirabiyê, ji rojêñ reş diparêzin û riyêñ rast nîşanî wan didin. Heta niha rûberîhevkirina destanêñ kurdî zêde nehatine pêkanîn. Ne tenê rûberîhevkirina wan, ev berheman îro çawa em dibînîn hê nehatine berev kirin, derbasî li ser kaxiz jî nebûne. Ji ber van dijwariyan, imkan û mecalâ li ser van berheman kar kirin, lêkolîn çekirin jî bêguman jar û qels dikeve an jî pêk nayêñ. Dema mirov van berheman rûberî hev dike, mirov rastî zaniyarî, agahdarî û encamên gelek giranbiha tê. Ji ber ko ev hezaran sal e, ev berheman li ser zar û zimanê gel digerin, gel jî bawerî, gotin û ceribandinêñ xwe yêñ bi salan tevî van berheman kirine, ew dewlemend kirine, tehr û rengekî nû dane wan. Di dawiyê de ev berheman bûne dewlemendîke folklorîk.

Di vê lêkolîna xwe de em dixwazin qasî 20 destanêñ kurdî û serpêhatiyêñ gel yêñ navdar rûberî hev bikin û di naveroka van berheman de tenê cihê jinan, serdestiya wan, rol û berpirsiyariya wan tespît bikin û xwe bigihînêñ çend nêrîn û baweriyêñ hevpar û giştî. Motîva jinan, evîn û zewac û mîranînê di folklora kurdî de motîveke gelek xurt û fireh e. Le belê di vê lêkolîna xwe de zêdetir em dixwazin li ser destan û serpêhatiyêñ gel, beytên kurdî bisekinin. Berhemên ko li ser babeta jinan agahdarî û zaniyariyêñ balkêş tê de hene, di nav folklora kurdî gelek in. Di van destanan de babeta jinan babeteke bingehî e: Memê Alan û Zîna Zêdan, Siyabend û Xecê, Ker û Kulik, Binefşâ Narîn û Cembelyê Hekkarê, Mem û Eysê, Zembîlfiroş, Sêva Hecî, Menşa Eliyê Selim Axa, Kela Dimdimê, Filîtê Quto, Bişarê Çeto, Salih... Ji der van destanan çend destanêñ mayî jî, bi taybetî din av kurdêñ Îranê de belav bûne, paşê hatine berev kirin, gelekî balkêj in, wek Ferx û Xatun Astî, Şor Mehmûd û Merzingan, Mehr û Wefa, Behram û Gulendam...¹ Lêkolînvanê elmanî Oskar Mann, cara pêşîn bi firehî çend destanêñ kurdî him berev kirin, him jî ew wergerandin zimanê almanî, wek du pirtûk çap kirin, wek Laz û Xezal, Nasir û Malmal, Qer û Gulîzer. Çend destanêñ heta niha neberekirî weşandin.² Bêguman gelek destan û serpêhatiyêñ gel yêñ mayî jî hene ko dikarin di vê babetê de alîkariya me bikin û me ronî bikin. Bi taybetî çend destanêñ ko di nav gelên rohilatê de belav bûne, wek Leyla û Mecnûn³, Usif û Zelêxe⁴ û Rustemê Zal⁵ gelek destan hatine ketine zimanê kurdî. Ji der şaxêñ destanêñ kurdî, çawa em dibînin çend şaxêñ van

destanan yên edebî jî, paşê ji aliyê nivîskarên kurd de hatine amade kirin. Rûberîhevkirina şaxên folklorîk û edebî jî angorî her destanekê dewlemedî û rengînîkê pêşkêşî me dikin. Ji aliyê din çend destanên ko di zimanê kurdî de zêde belav nebûne, ji aliyê kurdan de hatine wergerandin, jîyîna folklorîk û edebî di nav kurdan de ji bêtamî û ri-jîtiyê hatiye parastinê, wek destana Ferhat û Şîrîn... Angorî çend serkaniyan vê destanê, Ferhat bi xwe ji malbateke kurdî hatiye.⁶ Lê destan bi xwe gelo di nav kurdan de çîma ewqas belav nebûye? Bersîva vê pirsê jî gelek balkêş e. Dengbêj û destanbêjên kurd, gelek destanên rohilatê bi motîvên kurdî ve dewlemend kirine, xemilandine, li gelek cihêن Kurdistanê şaxên van destanan peyda bûne. Ji van destanan û şaxên wan beşek hatiye berev kirin, êdî bûne kerîkî edebiyata kurdî ya anonîm. Lê belê vê lêkolîna me ya bi sînorkirî, wek xebat, armanceke wisan fireh nedaye pêşıya xwe, ji bo ko hemû destanên kurdî yên naskirî şaxên wan yên folklorîk û edebî pêşkêşbike, rûberî hev bike. Ev xebata me di vî warî de tenê gavek e, bêguman gaveke pêşîn û piçûk e, ji kurtenotan pêk tê, divê gavêن mayî bêن pêkol kirin. Ji ber ko lêkolînên li ser destanên kurdî, ne tenê problematîka folklora kurdî, wisan jî dikarin gelek pirsên, edebî, civakî, etnografîk, dîrokî ronî bikin, sînorêن van warêن lêgerînan nêzîkî hev bikin.

Di destanên kurdî de struktura bingehî – dijayetiya sêserî

Destanên kurdî de babeta ko bala me zêdetir dikşîne li ser xwe, ev ser-pêhatiyê evîndariyê yên romantîk in ko li ser sînorêن mirin û kuştinê şax vedidin. Piraniya wan bi bûyerên rûsar, xemgîn û nedilşa ve xelas dibin. Beşen van berheman yên finalê, encamê gelek dramatîk in. Bayîs û sedemên pêşketina van bûyeran, bi baweriya me, di nav van destanan de peydabûna rekabeta destxistina jinê ye. Bi taybetî du mîr (dilketi) dibine evîndarê keçekê, bi keçikê ve dibin sê kesan, ev pêwendiyêن sêserî û sêber demek tê, êdî her diçin berbi xirabiyê dimeşin. Ji van hersê kesan re tu rêke xelasiyê namîne. Ji herdu raqîbên mîrîn yek tu gavekê şunda navêje. Hebûna yekî tunebûna yê mayî bi xwe re tîne. Carcar him jin, hem jî dilkiyê yekemîn di vî şerê sêserî û sêber de têن kuştin an jî, ji qehra dijwariyê mayî can didin, dimrin. Raqîbê duwemîn çawa em dibînin, pêsist nîne dilketîk be,

carcar jî ew dê û bav, ap an jî hêzên mayî in. Ew nigê dilketiyê yekemîn û jinan dixine soleke teng, dijwarî û serêsiyên mezin peyda dikan. Ji bo ko du dil nebin yek, gelek caran jî xwîn dirije an jî dilketik ji ber êş û jana dilan dimire. Di destanê kurdî de bêguman gelek strukturên mayî jî hene. Lê belê struktura here balkêş struktura dramên sêserî an jî sêber in.

Di dawiya destanê kurdî de, evîna du dilan gelek caran dibe sergêjî û serêsiyê mezin. Ji bo çareserkirina van serêsiyan çawa em dibînin mîrxasên van destanan canê xwe didin, dîbin gorî, di nav van goriyan de hejmara jinan zêdetir e. Ji ber ko ew di bin zordestîke mezin de ne. Di navbera du avan de dimînin, nizanin ci bikin û dihelin diçin. Ew, mirinê wek riyekê xelasiyê hildijbêrin. Di destana şêx Ferx û Xatûn Astî de her çiqas motîvên pro-jin hebin jî, bi taybetî mirina Astiyê, vê struktura pêwendiyêne dilketiyan gelek vekirî nîşan dide, bi taybetî beşa dawiyê. Dema Ferx û Astî mezin dîbin, dilê wan dikeve hev, çawa em ji destanê fêr dîbin, ew gelek ji hev hez dikan. Dilê yekî bi navê Uso jî dikeve Astiyê, ew hertim li pey Astiyê ye. Du xuşkêne Astiyê jî hebûne, navê wan Naz û Nazdar in. Rojekê ev hersê xuşk û Ferx bi tevayî diçin hewz, avjenî dikan, xwe rût û tazî dikan dikevine avê. Ji ber ko Ferx avjenî nizanibûye, ew li qiraxa hewz disekine, li wan mîze dike. Piştî demekê bavê Astiyê, ji keça xwe dipirse wekî ew dixwaze mîr bike an na, eger dixwaze, bi kê re? Keça wî her çiqas dibêje ez mîr nakim jî, paşê bav jê derdixe ko dilê wê di Ferx de heye, dibêje »evîn ji xwedê ye« û keça xwe dide Ferx. Paşê Ferx diçe Bexdayê, demeke dirêj li wir dimîne, Astî ji derdê Ferx ker û gêj dibe. Rewşa bavê jî xirab dibe, ji ber neçariyê mecbûr dimîne keça xwe Astiyê dide şivanê xwe, navê wî Şaxol bûye. Ferx bi alîkariya qulingan bi Astiyê re deng dike, jê re naman dişîne. Ji derdê dilan, Astî nexwaş dikeve. Piştî demekê jî dimire, wek destana Leyla û Mecnûn ew kincên Leylayê xwe dike û xwe reş girê dide. Paşê Ferx vedigere, berî ko bê cihê mala bavê Astiyê, ew rastî şivanekî tê, ew şivan Şaxol bûye, şivanê ko Astî bêdil girtine danê. Paşê Ferx ji vî şivanî fêr dibe ko, Astiyê can daye, çûye dilovaniya xwe. Destan, bi vê xebera tîrşû tal ve xelas dibe, êdî em pê nizanin ci tê serê Ferx? Piştî mirina Leylayê çawa Mecnûn jî dimire, sedî-sed dinya Ferx jî serobino dibe. Kes Astiyê nakuje, ew bi xwe can dide.⁷ Lê belê dema mirov rewşa Astî di nav de maye, mîze dike, wê çaxê mirov dibîne ko ew nemiriye, derdê dilan ew kuştiye, ew hatiye

kuştinê. Ji ber ko berî nexwaş bikeve, can bide, ew bi xwe re şer dike, bi mercên dorberê xwe ve şer dike, berxwe dide, êdî dora wê ewqas teng dibe, dinya wê tarî dibe, tu rêke xelasiyê namîne, nikare ji êşa dilan bifilite. Ji ber vê yekê jî mirov nikare bibêje Astî miriye, bi rastî Astî hatiye kuştinê. Bi vê perspektifê, bi vê nêrînê ve mirov rewşa ko jin di nav de nin, çêtir û baştır fam dike.

Tiştê herî balkêş, di nav vî şerê sêserî û dijwariyê mezin de çawa em dibînin jinêñ kurd dîsa jî ya xwe dikin, mirin jî tev hemû rîsk û telukeyan didin ber çavan. Ji bo ko bigihêjin bext û mirazên xwe, ew her riyên xelasiyê diceribînin, baweriya xwe winda nakin, dilketiyê di-wemîn, dê û bavê xwe, apêñ xwe û hemû hêzên mayî yên ko li pêşberî dilşahiya wan dibin asteng, davêjin alîkî û riya xwe de dimejin. Ev babetâ, di tekoşîna xelasiya jinan de wek gaveke giring dikare bê hesibîn.

Di hemû destanê kurdî de ev tekoşîna azadiyê, wek mesajên protestoyê û wek rûreşkirina erf û edetêñ kevn, li dijî hêzên feodal, hêzên zordar bi rastî hêjayî peydaniyê ye. Di destanê kurdî, di ser-pêhatiyê kurdî de, beşeke problematîka xelasiya jinan jî, rev e, ne reva bi zorê, reva ji du dilan pêkhatî. Dema keç ji xelasiya xwe re rêkê nabîne, vê carê bi dilketiyê xwe re direve, bi gotineke mayî hev di-revînin, dema mirov li ser vê struktura xelasiyê difikire, mirov dibîneke ko rev ji alîkî de protestokirina pêwendiyêñ nemirovî û paş damayî ye, kakîlê tekoşîna xelasiya jinê ye. Ji ber vê yekê jî her revek, di nav van mercan û rewşê de riya xelasiya jinan fireh dike, riya zewacêñ bêdil dixitimîne, zihniyetêñ paşverû dirizîne, diqelêşe û pûş dike. Her çiqas di dawiya revê de serêsiyêñ nû peyda bibin jî, di vî warî de gava here çêtir rev e. Ji ber ko tu rêke mayî namîne, dora cotan tê girtinê, çembera zordestiyê her diçe teng dibe. Di çend serpêhatiyan de çawa em dibînin êdî roj, roja revê ye. Di serpêhatiya Hesenê Mûsa de rojêñ revê nêzîk dibin, nefreta li dijî bav her diçe zêde dibe:

*Wele bi xwedê min didinê û min nadînê
Min nadînê ezê kincê xwe bişînim
Ser boyaxê reşkirinê,
Ezê mara mîra piştî çavê reş û belek,
Li xwe heram kim li darê dinê.
De hey wax, mala minê.
Sola torinê mala Mûsa qetiya ji çûyînê, ji hatinê.*

*Cilê mala bavê min qetiyan ji danînê, ji raxistinê,
Guhê dêka min quł kırın bi galgalê, bi gotinê...⁸*

Ev berxwedana vê keça bi navê Hedo, gaveke gelek radîkal dikare bê hesibîn. Hesen kesekî xerîb bûye, diçe gundê mala Qaso cîwar dibe û dilê wî dikeve keça wî Hedo. Ji ber ko kesekî xizan û kesîb e, keçikê nadînê, paşê bi hevra direvin û çîrok her diçe dirêj dibe. Di her destan, her serpêhatîke kurdî de nefreteke mezin li dijî zewacêñ bêdil heye. Di stranekê de ev hêrs û rik dîghêje xizemên poza, wan dilivînin, keç naxwaze wê bidin van kesêñ li mala wan berevbûyî, hatine xazgînî:

*Xwazgînçiyê li mala bavê min rûniştî
Qelendê min digot, xelatê min dibirî
Xizemê bozê min mîna çerxa felekê li hev dizvirî.⁹*

Dema mirov destana Memê Alan û Zîna Zêdan (Mem û Zîn) mêze dike, tiştê bala mirovan zêdetir dikşîne ser xwe, bêguman pirsa azadiya jinan e. Zîn, di vê destanê de nîşana azadiyê ye. Ev keça kurd, ji bo ko bigihêje mirazê xwe, li dijî birayê xwe – mîrê Cizîra Botan, fend û fêl, dek û dolavêن Bekoyê Eyan bi xurtî radiweste, van pêwendiyêñ nemirovî bi mirina xwe ve protesto dike. Ev serhildana keçekê li dijî mîrekî karekî ewqas piçûk û hêsa nîne. Dîsa jî ew ya xwe dike, ji bo evînê ker û gêj dibe. Di dawiya destanê de çawa em dibînin, ew vê dînyayê protesto dike û jê bar dike, can dide.

Di destana Mem û Zîn de tiştekî balkêş yê mayî jî, dema Mem diçe dîtina Zînê, dibe mîvanê hersê biran (Hesen, Çeko, Qeretacîn), ev biran ewqas bînteng û aciz nabin, çawa tê zanîn Zîn dergistiya birayê piçûk, Çeko ye, ew sê sal in dergistî ne. Dema Mem quitiya dilê xwe vedike, qala Zînê dike, di vê malê de em rastî tu serhişkî, nerazîbûn, dexesi (hesûdî) û serhişkîkê nayêñ. Di vê beşê destanê de tolerans, ner-mayê û hevtêgihiştineke bêhempa peyda dibe, serî şkandin, çav derx-istin, boz jê kırın nayê bîra tu kesî, her tişt bi hemdî xwe dimeşe. Çeko jî tev, ev hersê biran naxwazin serêşiyêñ mezin peyda bibin (her çiqas Zîn dergistiya wî be jî). Ez bawer dikim, di dawiyê de Çeko jî têdîghê, wekî dema Zîn yekî dinê dixwaze, wê çaxê tiştekî mirov bike êdî nemaye, ew wisân difikire. Ji aliyê din ev hersê bira jî derbarê Mem de dîghêjin bawerîkê: »...ji bo evînekê welatê xwe berdaya«.¹⁰ Ew xorêtê ko

ji Yemenê " rê dikeve dilezîne, hespê xwe çargava dajo, wekî zûtirekê dilketiya bibîne, tempoya jîyînê di destanê de ji yekten bilind dike. Ew naxwaze agirê evînê vemire, dixwaze vî agirî bike agirekî herdemî di jîyîna keç û xortan de. Ji ber van rastiyan ev hersê bira jî, bi çavekî filozofîk hêjabûna evînê dipîvin, dinirxînin û evînê li ser her tiştî re dibînin. Ev hersê biran angorî van realîtan pêwendiyêن xwe bi Mem ji nû ve careke din berçav û serast dikan. Ji aliyê din jîna birayê mezin Hesen, ew jîna bi navê Stî hemû imkanan ji Mem re amade dike. Hesen, Mem dibe »hêla jinan«, nasiya wî û jinan dide hev. Di destanê de rola Styî tim û tim qenc û pozitîf e. Hesen û jîna wî dixwazin ji hevevîniya van herdu dilketiyan re bibin alîkar û tu alternaîfeke mayî nabînin. Di vê beşê destanê de hurmeteke mezin ji bo jinan peyda dibe. Dema Zîn biryarê xwe diguhirîne – Çeko berdide, dilê wê dikeve Mem – ev biryara dijayedikê di nav vê malbatê de peyda nake. Hemû ev yekan nîşan didin ko, wê demê gotin »gotina jinan« bûye.

Di destanên kurdî de gelek caran em rastî rûçik û sûretên civate maderşahî – civata ko bandûra dayîkan û jinan lê zêde ye – têñ. Di çend destanan de serdestiya jinan zêdetir e. Ew xwe nadin hincrandin, eşandin û zêrandinê. Ew di her wargê jîyînê de xwedî maf in, serbest in. Di destana Laz û Xezal de, em rastî civateke wisan têñ li wir jîn hakim in. Xanzad, piştî mirina bavê xwe dibe seroka eşîra Balekiya. Hejmara malbatên vê eşîrê hezar hefsed bûye û hemû rêvabirina karêñ eşîrê dikeve li ser milê wê. Ev yeka jî nîşan dide ko di salê gelek kevn de serdestîke jinan hebûye.

Di destana Laz û Xezal de strukturekî pêwendiyêن cida peyda dibe. Vê carê du keç (Xanzad û Xezal) dixin evîndarê Laz. Ji der pevcûna ser keçan, ve carê em rastî pevcûn an jî rekabeteye li ser xortan têñ. Herdu keç jî bi aktîfi tevî vê rekabetê dixin, giranî û bandûra xwe nîşan didin. Ji ber vê yekî jî, ev destana ji destanên kurdî yên mayî parîkî cidatir e. Laz û Xanzad kurap û dotmamêñ hev in, nîşaniya wan dibe, piştî mirina bavêñ Laz û Xanzadê, rêvabirina karêñ malbatên eşîra wan dikeve li ser milê Xanzadê (nîşaniya Laz). Ji ber ko Laz vê nîşaniya xwe ber dide, vê carê dibe evîndarê keçeye ji eşîreke mayî, navê wê Xezal e. Dilê wan gelekî dikeve hev, nazewicin, lê bi hevra radizêñ, bi hevra dimînin. Di navbera van herdu keçan de bivê-nevê dilsarîk peyda dibe. Lê belê herdu jî heta mirina Laz pêwendiyêن xwe, silavêñ xwe ji wî qût nakin. Ev ev herdu keç her çiqas ji hev sar bûne, dijî hev in û

naxwazin Laz ji destê xwe derxin jî, dîsa jî roja mirina Laz, di şîna wî de beşdar dibin, bi tevayî wî hildidin, dikine gorê. Paşê Xanzad lêdixe diçe nav eşîra xwe, Xezal li wir dimîne.¹² Destana Laz û Xezal, ji alîkî de wek destana Ferx û Astî ye. Di herdu destanan de dijayedîke sêserî heye. Di destana Ferx û Astî de struktura mîr û jin û mîr, di destana Laz û Xezal de struktura jin û mîr û jin, pêwendî û bûyerên ko di van destanan de hene, di bin bandûra xwe de dihêlin, ji hev cihê dikin. Ji aliyê din di herdu destanan de evîndarîke romantîk heye. Herdu destan wek stran, dilok û helbestan gelek lîrîk in. Ji aliyê din, di salêن kevn nav civata kurd de ji bo ronîkirina cihê jinan, ev destanan gelek hînkar û rênîşandar in.

Dijminêن du dilan û çar çavan

Bêbextî, nokerî, xayîntî, dilreşî û fêlbazî wek element û motîvên negatîf di destanê kurdi gelek caran dibin sedemên bêmirazî û bedbextiyê. Di destana Mem û Zînê de, serpêhatiya Bekoyê şeytan, çawa me li jorê jî got, di jîyîna Mem û Zînê de dibe sedemê felaketeke mezin. Di destana Şor Mehmûd û Merzingan de, ev herdu dilketî jî dibin gorîyê dek û dolab û fend û fêlan. Angorî destanê Şor Mehmûd û Merzingan di zaroktiya xwe de dest pê dikin hev hez dikin, bi hev re mezin dibin û di dawiyê de dizewicin. Şor Mehmûd dibe kesekî gelekî jîr û mîrxas. Apê wî Mamereş mîze dike ko Şor Mehmûd hêdî hêdî dibe telukekî ji bo wî. Ew ditirse, wekî rojekê Şor Mehmûd serkariya êla wî têxe destê xwe û wî bêrûmet bihêle. Demek tê Şor Mehmûd dixwaze dergistiya xwe Merzinganê hilde here. Ap naxwaze Merzinganê bidê. Gelek difikire, di dawiyê de dibêjê, eger tu herî şer zora dijminê min bibî, bi serfiraz vegevî ezê Merzinganê bidime te. Dema Şor Mehmûd ji şer bi serfirazî vedigere tê, piştî çendekî dema ew ji xwe re diçe nêçîrê, Memereş ji vê herêmê mala xwe bar dike diçe, welatekî mayî. Merzinganê jî dibe û destê evîndaran ji hev diqetîne. Di rê de Merzingan bi dizika diçe li ser pirekê, ji kendalekî de xwe davêje nav gêjavê diqeniqe. Berî ko xwe bavêje ew bi pirevan re deng dike, wekî eger yek bipirse bira bibêje Merzinganê xwe avîte nav gêjavê. Paşê Şor Mehmûd tê wekî Merzinganê xelas bike, ew jî xwe davêje nav avê, avjenî nikaribûye bike û di dawiyê de ew jî dixeniqe. Dema bavê wê pê dihise tê li dor avê ji pirevan dipirse, wî Merzingan dîtiye

an na? Pirevan vê bersîva jêrîn dide:

*Birao, derdê min giran e,
Nizanim li kê bikim nifirane,
Qîza tu dibêjî navê wê, Merzingan e,
Rawesta bû li ber van qiraxane,
Nifîr dikirin li dayîk û bavane,
Ji derdê evîndariyê xwe avîte nav pêlên van avane,
Ji ber wê Şor Mehmûd jî xwe avîte nav gêjavane,
Niha gora wan bûye zikê masiyane.¹³*

Heft xarziyê Memereş hebûne. Ew gelek mîrxas û cengawer bûne. Wan gelek Şor Mehmûd hez dikirin. Dema ew dibîsin ko ev bela mezin hatiye serê Şor Mehmûd û Merzinganê, hespên xwe siyar dibin, diçin pêşîra Memereş digrin, bi şûr û xenceran wî parce parce dikin. Paşê diçin cenazê wan ji nav avê derdixin, mîze dikin ev herdu dilketî di paşa hevda, hev hemêz kirine. Ji wan re dewateke bi nav û deng çê dikin, dibêjin ew li vê dînyê dilşa nebûn, qet nebe bira li dinya dinê bi hev şâ bin.

Çawa tê xuyan, ev destana kurdî ji alîkî de wek destana Mem û Zîn di dawiyê de dibe destaneke bêmirazan. Di destanê de xayîntî û bêbextî tê protesto kirin, li dijî nepakî, neqencyî dengê gelek xurt hene. Bi taybetî xwe xeniqandina Merzinganê di vî warî de wek protestoke mezin dikare bê hesibîn. Di destanê de dinênasiya kesên wek Memereşyên xayîn tê rûreşkirin.

Çend keçperî û pîrejin

Di destana Memê Alan û Zîna Zêdan û çend destanên mayî ji der mîrxasên mirovî, em çend mîrxasên wek cin, keçperî û kesên nexuyanbar jî dibînin. Ew dikevine dilqê (rol) jinan. Di destanan de roleke alîkarî û piştevaniyê dilîzin, wek pîrhevoka bi tirs û xof nîn in. Ev mîrxasên çîrokî, pêwendiyênen dilketiyan re gelek caran dibin alîkar, nasiya wan didin hev û van dilketiyan dixin xewnê hev. Di destana Mem û Zînê de navên sê keçikêن padişahê periyan derbas dibe: Tavbano, Hîvbano, Stêrbano. Ev keçen dilsoz û evînparêz biryar dîgrin ko bifirin herin Cizîra Botan. Ew dişin dikevin oda Zînê, wê hil-

didin tînin dixin xewna Memê. Piştî vê bûyerê Memê, li ser Zînê dibe evîndar û ker û gêj dibe. Çawa di destanê de tê xuyan, ev hersê keçê periyen guneyên van herdu keç û xortan (Mem û Zîn) hildidin li ser stoyê xwe. Di destana Sêva Hecî de jî, em rastî çend keçen wek van periyen tê. Di şaxeke vê destanê de navê yekê Gulçîçeka Dilan¹⁴, di şaxeke mayî de navê wê Pîra Miraza¹⁵ û di şaxeke mayî de jî Qîza Qenc¹⁶ derbas dibe. Gulçîçeka Dilan, diçe Mîr Mehmûdê Cindî tîne, dixe oda Sêva Hecî, wan bi hev dide nasîn.

Ev periyen jinîn (femînîn), di çend destanên mayî de jî çawa em dibînin enînivîs, bext û mirazê keç û xortan tayîn dikin, evîn, merhamet û alîkariyê li ser mirovan de dibarînin. Ji der van periyen, di çend destanên mayî de, em rastî çend motîvên wek pîr û pîrejinan jî tê ko mirazan dîghînin hev, di pêwendî û kontaktê navbera jin û mîran de roleke aktîf dilîzin. Ew gelek rîsk û telukayan jî didin li ber çavan, xwe davêjin nav êgir, di navbera dilketiyan de, ji ber ko zêde şik naçe li ser wan, xeberan dîbin û tînin û dîbin serkaniyên îstîhbaratê. Ji bo ko salêن wan bihurîne, tecrubeyên wan yêñ jîyînê zêde ne, di van destanan de gelek caran keç û xort xwe davêjin pêşîra wan û alîkariyê ji wan hêvî dikin û baweriya xwe jî, bi wan tînin. Di destana Mehr û Wefa de, dema Wefa diçe hawariya dilketiyê xwe – Mehr, ew tê girtin, wê bi darê zorê direvînin, di rê de ew rastî pîrejinekê tê, hal û hewalê xwe jê re dibêje, ev pîrejina van gotinan paşê dibe dîghîne Mahir.¹⁷ Di destana Rustemê Zal de, Rustemê Zal berî ko bavêje li ser dijminêن xwe, cara pêşîn dibe mîvanê van pîrejinan. Bi kurtî di destanên kurdî de ev figurên jinîn yêñ ko di beşeke van destanan de derdikevin pêşberî me, di warê pêkhatina kontaktên giring de cihekî yekemîn di-grin û rolêن aktîf dilîzin.

Jin di rîke rast de dimeşin

Di destanê kurdî de dûrdîtiniya jinan, çawa di van berheman de diyar dibe, gelek tûj e. Ji ber vê yekê de jî, ew di rîke rast de dimeşin. Piştî destana Memê Alan û Zîna Zêdan destana ko di nav kurdan de zêdetir belav bûye, destana Siyabend û Xecê ye. Destan, li ser evîna Siyabendê Silîvî û Xeca Resûl ava dibe. Wek gelek destanên mayî, di vê destanê de jî Siyabend û Xecê nagihêjin mirazê xwe. Lê belê ew evîna ko di vê destanê de pêl û pêl mezin dibe, hemû dijwarî, xirabî û

tiştên neçê di bin siya xwe de dihêle, wan difetisîne û bêrûmet dike. Dema mirov vê destanê baş analîz dike, mirov têdighê ko mîrxasa jînîn – Xecê paşerojê angorî Siyabend baştir dibîne û gavêن xwe bi pî-van davêje. Di beşeke vê destanê de Xecê xewnekê dibîne û dikene, vê xewna xwe ji Siyabend re şiro vedike, Siyabend bêsebeb, vê xewnê şaş fam dike. Pey wan pezkuviyêن ko Xecê di xewna xwe de dîtine, dikeve. Ken û gotinêن Xecê şaş fam dike, hildide li ser xwe, diltenikiya xwe zû eşkere dike û vî kenî bi keçeliya xwe re girê dide. Ji nav wan duwanzdeh pezkuviyân yekî digre dikuje, pezkûvî jî lêdixe wî ji kendalekî de davêje, dikuje. Paşê navê wî dibe: *nêçîrvanê ko ji aliyê nêçîra xwe de tê kuştinê*. Ev beşa dawîn ya destanê, mesaja destanê gelek bi vekirî radixe li ber çavan, Siyabend xeletiya xwe, bi zimanê xwe eşkere dike:

*Çawa min ji hev qetandiye destê nêrî û bixinê
Ewî usa ji hev qetandiye destê mîr û jinê.¹⁸*

Dema Siyabend dixwaze nêrî bigre, wê demê nêrî û bixin li bal hev bûne, zirareke wan negihiştiye tu kesî. Ev serhişkiya Siyabend ji ko tê? Çawa em ji despêka destanê de fêr dibin, zaroktiya wî qet baş derbas nebûye, bêdê û bêbav mezin bûye. Ew di zaroktiya xwe de kesekî şerût bûye, bi dorberê xwe, bi hevalên xwe re zêde bi hev nekiriye, wek misal riya jina gavanê gund digre... Ji aliyê din ew keçel û gurî bûye, bêgu-man wî ev yeka wek kêmâsîkê di xwe de dîtiye û xwastiye vê kêmasiyê bi tehrekî mayî, bi rêke din tijî bike. Bi çi tehrî? Siyabend çawa em dibînin dibe kesekî problematîk. Ev şahsiyeta wî ya parçekirî di dawiyê de dibe bayisê mirina wî û mirina Xecê jî. Xecê naxwaze wekî Siyabend here wî pezkûvîyî bikuje, gunê wê bi van pezkuviyân tê, lê belê Siyabend wê guhdar nake, ya xwe dike.

Ev serhişkiya Siyabend, di destana Ker û Kulik de serhişkiya van herdu birayan tîne bîra mirovan. Di vê destanê de diya van herdu kuran naxwaze wekî kurê wê herin bi her heft birayên wê re şer bikin. Lê belê ew gotinêن diya xwe guhdar nakin, diçine şer. Çawa tê zanîn di dawiya destanê de Kulik tê kuştin, gotinêن diya wan Werdekê rast derdikevin. Dûrdîtinî, rastzanîn û famdariya Werdekê wek Xecê vê yekê nîşanî me didin wekî di destanên kurdî de jînên kurd hertim serdikevin û di rêke rast de dimeşin. Ew rênîşandar in, bi şîretên xwe

ve pêşengiya mîrxasên van destana yên mîrîn dîkin.

Ji aliyê din, him di destana Siyabend û Xecê de, him jî di destana Ker û Kulik de zordestîke mîrîn ereban jî heye. Xecê berî ko bi Siyabend re bireve, çawa tê zanîn dergistiya kurê mîrê ereban bû. Ker û Kulik jî, bona herin hespekî bi navê Bêcan jê re bînin, ji aliyê mîrîn ereb de tê seferber kirin, mîrîn ereb van herdu xortan li ser xalêwan de dişînin wekî bi xalan re bikevin şer. Lê belê Ker naxwaze diya wî tenê bêxweyî bimîne. Ji ber vê yekê jî kuştina heft xalêwan xwe nafikire, wê çaxê diya wî dikare bikeve destê mîrê Ereban. Angorî Kulik, Ker çêtir difikire û gavêwan xwe bi pîvan davêje. Di dawiya destanê de, çawa em dibînin Kulik tê kuştin, keça mîrê ereban –Têlî Rewşen Xatûn jî para Ker dikeve.

Di destpêka destana Ker û Kulik de, dema bavê Werdekê naxwaze keça xwe bide Silêman, Silêman Werdekê direvîne. Bav pey keça xwe dikeve, Werdek kevirekî hildide bavê dixe, dikuje.¹⁹ Ev yeka jî nîşanî me dide ko, dema keça kurd dil kir, dilketiyyê xwe û mirazê xwe ji ser her tiştî re digre, xwe davêje nav agirêne mezin. Ew dikarin li dijî bir-yarê dê û bavêwan xwe jî derkevin. Ew di vî warî de serhişk in û gelek caran ber xwe didin. Di çend destanên mayî de jî, çawa em dibînin li dijî dê û bavêwan neheq mixalefeteke mezin heye. Ev dê û bavêwan neheq neyên kuştin jî, nifîrên mezin li wan têne kirin, ev nifîran angorî çend destanan têne cih jî. Di destana Ferx û Astî de, Ferx nifîrên mezin li dê û bavêwan xwe dike, di nav heftekî de him dê, him jî bavê wî dimire.²⁰ Bi saya motîva nifîran, mirov fam dike ko, kî dibe bira bibe, pêwist e kes nekeve orta du dilan û çar çavan. Ev bawerî di destanên kurdî de gelek xurt e. Çima piraniya nifîran ji devê jinan, bi taybetî ji devê dayîkan derdikevin û ev nifîran têne cih? Bersîva vê pirsê diçe dighêje mezînbûna neheqîya li jinan têne kirin. Jin hêrs, nefret û rika xwe di pratîk de nîn be jî, bi zar û ziman (verbal) diyar dîkin. Ev yekan realîteke jîyînê ifade nekin jî, wek realîteke zimanî, gelek caran rastî realîteyêne jîyîne jî têne, dîbin bûyer. Ji ber ko kesen xirabiyê dîkin, di pêşerojê de ci wê bê serê wan, mirov kêm û hindik, sedî sed nîn be jî, jê derdixe. Jin bi vê baweriyê ve nifîran dîbarînin. Ji ber tecrubeyêne jîyînê, jin di warê nifîrbarînê de dighêjin aqilmendîke mezin û tenik.

Di vê babetê de serpêhatîke here balkêş jî, serpêhatiya Filîtê Quto ye. Angorî vê serpêhatiyê li welatê Mamê Etmanîk xela hebûye. Wan nikaribûne debar û abora xwe bikin. Ew ji eşîra Reşkota bûye.

Karvanê xwe amade dike, diçe bajarê Batmanê wekî aborî û debara zarokên xwe bike. Lê belê ev navça di bin konrola Filîtê Quto de bûye, bac û bertîl ji karvanê ko dihatine vê navçê distend. Ew rîbirekî nav û deng bûye. Dema dibhîse ko Mamê Etmanîk hatiye hêla Batmanê, mirovîn xwe berev dike, diçe li ser wî. Şerekî mezin di nav wan de dest pê dike. Di dawiya vî şerî de him Filîtê Quto, him jî Mamê Etmanîk tênu kuştinê. Piraniya stranê ko li ser Filîtê Quto hatine gotin, ji devê diya wî Şemê derketine. Ev jinika, kurê xwe neheq dibîne, pişta kurê nake, kirinênu wî cih de nabîne. Her çiqas kurê wê nîn be jî, ew pişta Mamê Etmanîk digre. Filîtê Quto guh nadе şîret û gaziyêni diya xwe, di dawiyê de tê kuştin û diya wî dilorîne: »*Filîto lao, were neçe pêşîya vî kervanî!...*²¹

Ji aliyê din ev dayîka kurd ji vî şerê xwexwetiyê jî nerazî ye. Ew zane ko ev şerên neheq tenê kêfa hêzên dijmin, hêzên neyar û dewletê tîne:

*Bitlîsê dergevana derge vekir
Donzde beyraqê Alî-Osman şede, îspat,
Şerê Filîtê Quto, Memê Etmê temâşe kir.*²²

Ji bo mîran danîna çend merc û hoyan

Di destanên kurdî de dema kesek daxwaziya zewacê dike, ji aliyê jînê de çawa em dibînin hin merc û hoy tênu pêşkêş kirin. Pêwist e ko mîr zîrekî û jîrîtikê nîşan bide. Ew pêwist in ya herin li ser dijmin an jî karekî mezin biqedînin. Eger ew di van seferan de sernekevin, ji wan re imkana keçdayînê namîne. Çima ev dijwarî û zehmetî tênu pêkanîn? Bersîva vê pirsê mirov dikare bi sê tehrî şiro veke:

- A) Bi pêkanîna micizeyan ve destan tempoke bilind bi dest dixe.
- B) Bi van pêşdanînan ve, dê û bav dixwazin, zavayênu xwe yênu nû, jîn jî dixwazin dilketiyan xwe biceribînin, başbûnu û qenciyâ wan bi çavênu xwe bibînin.
- C) Di hin karên pratîk de ji van dilketiyênu nû îstîfade bikin.

Di destana Ker û Kulik de, ji bo keça mîrê eraban ji xwe re bixwazên, ew pêwist in, herin hespekî navdar ji nav eşîreke mayî birevînin bînin. Diya wan Werdek jî, dema dixwaze namekê bi rê bike, diçe bal sofîkî, bi wî re tu dibêjî peymanekê girê dide. Dibêje wî eger tu vê namê bibî

bighînî xwedanê wê, ezê bi te re mêt kim.²³ Di destana Sêva Hecî de, ew kesê dilê wî ketiye Sêva Hecî pêwist e here cihekî qeytana Memûdî (di şaxeke vê destanê de qeytana Hemedanê tê nav kirin) bîne wekî ji bavê wê yê kor re bibe derman. Êdì Sêva Hecî ya wî.²⁴ Di destana Nasir û Malmal de, vê carê em rastî hoy û mercên mayî tê. Herdu keç (Taurezî û Esmer) dixwazin wekî ev herdu xort (Nasir û Malmal) herin Bexdayê çend sala bimînin, bibin kesên mezin, paşê bi wan re bizewicin. Berî ko ew bi rêkevin, ev herçar keç û xort di nav xwe de sond dixwin.²⁵ Di destana Şor Mehmûd û Merzingan de jî, bavê Merzinganê ji Şor Mehmûd tiştekî mayî hêvî dike, eger ew here dijminê wî bindest bike, ewê keça xwe Merzinganê bide Şor Mehmûd...

Wek van misalan gelek merc û hoyen mayî jî di destanan de tê pêşkêş kirin. Bi kurtî mirov dikare bibêje pêkhatin û bicihanîna van merc û hoyan cihê qelend (next) digre. Hemû ev merc û hoyan bi çi niyetê hatine gotin? Ji devê kê derketine? Angorî vê jî, dema mêt karêñ xwe diqedînin tê, ew vê carê dikarin rastî çend dijwariyêñ mayî jî bêñ. Vê carê serêsiyêñ nû di destanan de peyda dibin. Hertim, her tişt bi hemdî xwe nameşe.

Çima mêt dikevin rola şivanan

Di destanê kurdî de çawa em dibînin stûnê van berheman yên here xurt ji aliyê jinan de hatine dayîn. Jin mîrkirinê bêdil û reva zorê tu wext qebûl nakin. Sal derbas bin jî, ew nedilشا ne, dîsa jî riya xelasiyê digerin, timê bendewarê avakirina jîyîneke nû in. Di destana Binefşâ Narîn û Cembeliyê Hekkarê de ev realîta gelek eşkere ye. Binefş, ji aliyê Derwêş Axa de bi destê zorê tê revandin. Ji ber ko birayêñ Binefşê li dijî vê zewaca bêdil derdi Kevin, ew têñ kuştin. Derwêş Axa kesekî zordar û kal e. Tê gotin ko ew nod salî ye. Binefş mirinê ji mal, milkê dinyayê çêtir dibîne. Ji ber ko Binefş ewqas zêde ji Cembeliyê Hekkarê hez dike, navê kurê xwe yê Derwêş Axa bûyî jî, datîne Cembelî, Cembeliyê piçûk. Ev nav bêguman nîşana evîna Cembeliyê mezin e. Cembeliyê Hekkarê dikeve dilqê şivanan, kulavê şivanan xwe dike, wekî here bibe şivanê Derwêş Axa. Ew dixwaze bi dilketiya xwe re deng bike, wê bibîne û birevîne. Di dawiya destanê de bi xwe wisan dibe û ew bi hevra direvin. Bi vê kirina xwe ve Binefşâ Narîn zewacêñ bêdil protesto dike û di dawiyê de dighêje mirazê xwe.

Di destana Binefşa Narîn û Cembeliyê Hekkarê de çawa me li jorê jî got, dema Cembeliyê Hekkarê dixwaze here Binefşa Narîn bibîne, dikeve dilqê şivanan. Di çend destanê mayî de jî em rastî vê motîvê tê. Çima şivan, ne kesekî din? Ji ber ko di nav kurdan de û di jîyîna rojane de kesê ko zêdetir kontak û pêwendiyên wî bi jinan re hene şivan in. Bi taybetî danê nîrvô û berbi êvarê dema pez tê bêriyê, kesê serê pêz digre şivan e. Bi bêrîvanan re kontaktên wan yên dîrek hene, mesafa di navbera wan de gelek hindik e û imkana hevdudîtinê û hevraxeberdanê gelek zêde ye. Ji aliyê din şivan zêde şikê jî nabin li ser xwe. Ji ber ko ev karê pezdottedinê ji du kesan pêk tê (şivan û bêrîvan) kesê ko pêz dajo bêriyê, gelek caran zarok in an jî pez bi xwe du hev rêz dibe, dikeve dorê. Di destana Qer û Gulîzerê de, Qer dibe waliyê Sonduzê, dilê wî dikeve keçeye bi navê Gulîzer, dema mîze dike bav keça xwe nadê, ew dibe şivanê mala bavê Gulîzerê.²⁶

Berî ko Cembeliyê Hekkarê xwe bîghîne dilketiya xwe ew di rê de rastî kesên mayî jî tê. Carekê dilê keça şêxekî ereban dikeve Cembelî. Navê vê keçikê Wedîha bûye.²⁷ Wedîhe bi dilekî na hezar dilî dibe evîndarê Cembelî. Ji bo ko ew û Cembelî timê hev bibînin, hev şâ bin, ew rêkê difikire, diçe bal bavê xwe wekî Cembelî hilde ser karekî û di mala wan de bîmîne. Lê belê Cembelî ji vê yekê re razî nabe. Ci dike nake ji destê vê jînikê naftile. Demekê bi hevra dimînin, şevekê Cembelî bi dizîka ve ji mala vê keçikê direve, tevî tariya şevê dibe, pey rêça mala bavê Binefşa Narîn dikeve. Ev serpêhatiya di vê destanê de wek beşeke bingehî cih nagire, wek bûyereke duwemîn dikare bê hesibîn. Lê belê ev beşa destanê tiştekî nîşanî vê keça şêxê ereban dike, wekî bi zorê du dil nabine yek, bi hevdudîtineke derbazok û tesadûfi mirov nikare dilşa bibe. Ev beşa destanê, bûyerên ko di destana Zembîlfiroş de derbas dîbin tîne bîra mirovan û wek hev in. Ji bo kêfa xwe, ev keça ereban û ew Xatûna ko navê wê di destana Zembîlfiroş de derbas dibe, jînê dewlemend, arîstokrat û xorxapînok in. Dorberên ko tê de mezin bûne, bajarî ne, gelek bi serbestî dijîn.

Sînorênamûs û bênamûsiyê

Destaneke ko di nav kurdan de gelek belav bûye, destana Zembîlfiroş e. Zembîlfiroş debara xwe tenê bi firotina zembîlan (sêlik) ve pêk tîne. Kesekî belengâz û kesîb e. Ew tax û tax, kuçe û kuçe digere, zembîlan

difroşे. Kesekî çeleng, spehî û xweşik bûye. Angorî şaxeke vê destanê Zembîlfiroş berê mîr û dewlemend bûye, paşê jîyîneke sade ji xwe re hilbijartiye û xizan ketiye. Rojekê tê bajarê Sîlvanê cîwar dibe, li vir xwe re zembîlan difroşe.²⁸ Ji ber çelengbûn, bejn û bala wî, rojekê dema ew dîsa kuçe û kuçe digere, rastî jina mîrê bajêr tê. Dilê vê jinikê dikeve Zembîlfiroş û pêşîra wî ber nadе. Zembîlfiroş bi xwe jî kesekî xwedî jin û zarok e. Çavê wî ji jinêñ kesî tune ye, kesekî serbilind, xwedî nefş e. Jina mîr ci dike nake, nikare wî ji rê derxe, bi wî şâ be û rojên xweş bi hevra derbas bikin. Çawa em ji naveroka destanê û gotinêñ jina mîr fam dikin, ew mîrê xwe davêje alîkî, dixwaze Zembîlfiroş kaşî nav cî û nivînêñ xwe bike. Her çiqas ew bi gotinêñ xwe yêñ şehwtî ve dinya Zembîlfiroş serobino dike, dîsa jî Zembîlfiroş li ber xwe dide, nêzîkê wê nabe. Ew zarokêñ xwe difikire. Dilpaqijî, helalî û namûs, çawa em dibînin kakilê felsefeya jîyîna Zembîlfiroş pêk tînin.

Di dawiya destana Zembîlfiroş de ci tê serê Zembîlfiroş û Xatûnê? Bersîva vê pirsê angorî şaxêñ vê destanê ji hev gelek cida ne:

A) Dema Xatûn pey Zembîlfiroş dikeve diçê mala wî, çawa em dibînin Xatûn jina Zembîlfiroş dixapîne, dikeve nav cihê mîrê wê. Ew lempê vedimirîne, Zembîlfiroş dema tê dikeve nav cihê xwe wekî razê, Xatûn ji bîr dike xirxalê lingê xwe derxe û Zembîlfiroş wê çaxê fam dike ko ew ne jina wî ye. Ew Xatûn e. Zembîlfiroş dibe teyrekî ji kulekê re difire diçê. Xatûn heft sal li pey wî digere, li serê çiyakî rastî şopa wî tê, dibine xuşk û bira, piştî çendekî, Xatûn dimre.²⁹

B) Li ser kanîkê rastî hev têñ, Xatûn dixwaze Zembîlfiroş ramûse, dema Xatûn zimanê xwe dixe devê Zembîlfiroş herdu jî dimrin.³⁰

C) Agir devê Xatûnê derdikeye, herdu jî dişewitin.³¹

C) Diçin cennetê, digihêjin mirazê xwe.³²

D) Mîr dema pê dihese wekî jina wî çûye li bal Zembîlfiroş, lêdixe Zembîlfiroş dikuje.³³

E) Zembîlfiroş xwe ji qesrê de davêje perçê-perçê dibe.³⁴

F) Dema mîr dixwaze Zembîlfiroş bikuje, Xatûn dikeve navberê. Kêrê ji destê mîr digre, zikê mîr re dike, ew tê kuştin. Paşê Xatûn, Zembîlfiroş û jin û zarê wî bi tevayî diçin, cihekî wisân dengê axa û mîran li wir nayê.³⁵

G) Jina Zembîlfiroş û Xatûn dibine hewiyêñ hev, wek jina mezin û jina piçûk bi hevra dijîn.³⁶

H) Zembîlfiroş û Xatûn di nav xwe de peymaneke gîrê didin wekî dest ji pêşîra hev berdin. Paşê Zembîlfiroş ji ber daxwaziya bavê, diçe bajarê Diyarbekirê dibe mîr.³⁷ Ev şaxa dawîn, ne şaxeke folklorîk e, wek şaxeke edebî ji aliyê Mirad-Xanê Beyazidî de hatiye nivisîn.

Çawa tê dîtin heta mirinê, li dinya mayî jî Xatûn li pey Zembîlfiroş dikeve, pêşîra wî bernade. Di çend şaxên destanê de çawa tê xuyan, Zembîlfiroş her çiqas ji ber Xatûnê direve jî, wisan tê xuyanê bi kêmanî dibin xuşk û bira. Ji aliyê din dema em zordestiya mîrê Xatûnê didin ber çavan, ew dibînin ko hevkarîk û dostanetîk di navbera Zembîlfiroş û Xatûnê de li dijî mîr peyda dibe, Zembîlfiroş û Xatûnê nêzîkî hev dike. Ji aliyê din ji ber xizanî û belengaziyê, jina Zembîlfiroş jî, li dijî Xatûnê stoxar e. Ev yeka jî wek faktorekê, pêwendiyê Zembîlfiroş, jina wî û Xatûnê ji dijminatiyê diparêze û wan di xalekê de dighîne hev û dijayetiya van hersê kesan kêmtür dike. Bêguman ev hemû baweriyêن mesaja destanê yên li ser helaliyê û dilpaqijiyyê ava dibin, nahejîne. Ji ber ko di destanê de ev motîvan gelek xurt in. Lê belê hevbandûriya bûyeran bivê-nevê çend dijwariyan ji bo Zembîlfiroş peyda dike wek hebûna du jinan û newekhevdîtina Xatûn û mîrê wê... Li dijî mîrê Xatûnê mixalefetek peyda dibe, wê çaxê Xatûn wek dijmineke yekemîn nayê hesibîn. Di herdu şaxên dawîn de Zembîlfiroş jî êdî hatiye guhartin.

Destana Zembîlfiroş ji alîkî de destana Usif û Zelêxe tîna bîra mirovan. Xatûna ko navê wê di destana Zembîlfiroş de derbas dibe gelekî li Zelêxê çûye, dirûvê wê lê dikeve, wek hev in. Zelêxe jî wek Xatûnê jina mîrekî ye, mîrê Misirê. Dema Usif, kurê Aqûb pêxember dibin Misirê, dilê Zelêxê gelekî dikeve Usif. Di şaxên Usif û Zelêxê yên folklorî de, çawa em dibînin ko dema Zelêxe, Usif ji xwe re dikire, dibe, Usif riya revê digere, lê belê ji destê vê jinikê xelas nabe.³⁸. Zelêxe tîne vê carê Usif şikyatî mîrê xwe dike, mîr jî tîne wî dike zîndanê. Ev destana di nav kurdan de gelek belav bûye, gelek şaxên wê yên edebî û folklorîk hene.

Destaneke ko di naveroka wê de babeta namûsê cihekî bingehî di gre, destana Mem û Eysê ye. Kurekî pîrejjinekê heye, navê wî Memê ye, diya wî kurê xwe dizewicîne, navê bûka wê jî Eysê ye. Piştî demekê Memê dibine leşkeriyê, heft salan li leşkeriyê dimîne, çavê vê dayîkê timê li rê ye û li bûka xwe xweyî derdikeve. Ji ber ko bi salan ev mala

bêmêr e, berpirsiyariya mezin dikeve li stoyê vê pîrejinê. Ew li ber mala kurê xwe dimîne, cihê wî digre. Piştî vê leşkeriya dûr û dirêj, êdî çavê wê li rênêrînê diqerime. Rojekê destûra Memê derdikeve, nîvê şevê lêdixe tê mala xwe, ew û dergistiya xwe dikevine nav nivînan, ew diya xwe hişyar nake. Diya wî mêze dike, di oda Eyşê de dengê mîran tê, dinya vê dayîkê tevilihev dibe, nizane ko kurê wê ye, leşkeriyê hatiye. Yekten serobino dibe, bi nezanî lê dixe kurê xwe dikuje.³⁹

Him di destanê Zembîfiroş û him jî di destana Mem û Eyşê de her çiqas bûyerên kuştin û mirinê peyda dibin, lê belê ji bo namûsa xwe biparêzin, yek jina xwe difikire, ya din jî kurê xwe difikire, naxwazin navê wan xirab derkeve, mirinê ji vê yekê çêtir dibînin. Herdu destan jî, li ser hîm û bingehênamûsê ava dibin.

Di salêن kevn de ji ber dirêjbûna leşkeriyê, çawa em dibînin ev salêن dirêj bûne sedemên parçebûna gelek malbatan, jin û mîr, keç û xorêtê nûzewicî bi salan ji hev dûr mane. Her çiqas dayîka Memê kurê xwe ji bîr nekirebe jî, ev dayîka bi salan hêviya hatina kurê xwe maye. Ji alîkî de ker û gêş bûye, mirov dikare bibêje wekî ew ji bîr kiriye, hatina kurê wê ji bo bûye micizekê, ev micize çawa em dibînin li bal vê pîrejinê nebawerîk peyda kiriye, wê bawer nekiriye rojekê kurê wê û bûka wê bibin yek, têkevin nav nivînan. Di hişê wê de hertim îmaja bûkeke tenêmayî cîwar bûye, tu car ev tabloya nû ji hişê xwe re derbas nekiriye.

Nefreta kontra-mîlîter

Çawa em dibînin gelek malbatên kurd ji ber leşkeriyê, timê rojêñ tirş û tal derbas kirine. Ji ber vê yekê jî di folklora kurdî de element û motîvîn kontra-mîlîter cihekî bingehî digrin. Li welatêniyanî, li weletâniyan dûr, kirina leşkeriyê ji bo her kurdekkî wek cezakî giran hatiye dîtin.

Destaneke ko tê de li dijî hêzêñ mîlîter protestoke mezin heye, destana Menşa Eliyê Sêlim-Axa ye. Kîkî paşa, paşayê dewletê dixwaze keçeke çardeh salî (Menşê) ji xwe re wek jin bîne. Lî belê dema keçik û heft birayê wê vê yekê qebûl nakin, ev paşa heft birayê Menşê bi darê zorê dixe girtîgeha Diyarbekirê. Heta Menşê nedîne wî, ew biryar di gre ko van heft birayan di girtîgehê de girtî bihêle, wek lîstikekê, entîka û santajekê girtina van heft biran li dijî Menşê bi kar tîne. Di

destanê de çawa em dibînin Menşê stoyê xwe li dijî vê zordestiyê xar nake, ji bo birayên xwe azad bike, ew dikeve ser rê diçe xelasiya wan. Di dawiyê de ser dikeve, birayên vê Keça Merdînî tên berdanê.⁴⁰

Serpêhatiya Menşê, serpêhatiya Saliho tîne bîra mirovan. Çawa Menşê dixwaze heft birayên xwe ji zîndanê derxe, azad bike, Nûrê ji dixwaze dilketiyê xwe Saliho xelas bike. Dilketiyê wê ji wek heft birayên Menşê di girtîgeha Diyarbekirê de hatiye girtin. Salih hejdeh salî ye, sed sal ceza danê. Nûrê, gelek ber xwe dide wekî Salihê wê bê berdanê, di stranên xwe de gazî Reisê Cimhuriyetê Kemal Paşa û pêx-emberan dike, ji ber dergehê kela Diyarbekirê dûr nakeve, heta ko Salih bê berdanê:

*Nûrê divê: Saliho pizmamo, bejna min zirave,
Têlek ji têla vê rihanê,
Hêşîn dike ser xopana Diyarbekir,
Pêşberî hepisxanê...⁴¹*

Jinê kurd di şerê li dijî hêzên dewletê û hevalbendên dewletê de timê li bal mîrên xwe, lawên xwe cih girtine. Bi mîran ve tevayî li dijî ne-heqî, zordestî û li dijî êrîşen dewletê şer kirine. Di serpêhatiya Bişarê Çeto de, Gozê, çawa em dibînin li bal kurê xwe cih digre. Li dijî Bişarê Çeto derdiikeve, ji wan çend kesan dikujin. Wek tê zanîn Bişarê Çeto hêzên dewletê yên leşkerî hildide bal xwe li dijî Emê Gozê şer dike. Hevkariya Bişarê Çeto bi dewletê re wisan pêş da diçe, ew dibe êrîşkarekî navdar. Emê Gozê bi mîrxasî û bi dilsoziya xwe ve tê nas kirin. Bi kurtî ev serpêhatiya wek destanekê bûye nişana şerê pakî û nepakiyê, heqî û neheqiyê, qencî û xirabiyê. Gozê, di vî şerî de timê qencyî dixwaze. Dema Gozê li dijî hêzên dewletê kurê xwe diparêze, ew, nefer, leşker û serokên wan yên zabit ji hev cida dike, gunê wê bi van neferan tê, paşê şîretan kurê xwe dike û gazî wî dike: »Çavê maliya wan li riya wan e«.⁴² Di cihekî mayî de jî awa dibêje: »De nekuje nefera, nefer kurê xelqê ne, nanxurê dewletê ne«.⁴³ Ev mirovheziya Gozê, wek dilpaqijîkê dibe kakilê dinênasîke gelek pêşketî.

Destana ko tê de zordestî, hovîtî û lêdanêni li ser jinê zêdetir dibin, destana Mehr û Wefa ye. Hêzên leşkerî di vê destanê de bi darê zorê şahsiyeta wê keça bi navê Wefa pêpes dikin, keçikê wek dîl (hêsîr) di-grin. Angorî destanê, kurekî padışahê Muxirzemîn hebûye, navê wî

Mehr bûye, dilê wî dikeve keça berdestiyê padişah, navê wê Wefa bûye. Ew bi hevra diçin dibistanê, di navbera wan de evîna dil roj bi roj zêdetir dibe. Rojekê padişah kurê xwe Mehr dike serleşker, wî dişîne Hîcazê wekî tevî şer be. Mehr û Wefa bi alîkariya mamosneyê xwe bi hevra naman dînivîsin, xeberan ji hev digrin. Rojeke Wefa xewnekê dibîne, wekî Mehr di şer de hatiye birîndar kirin. Dema ew hişyar dibe, tividarekê xwe dike, diçe hawariya dilketiyê xwe. Ev keça diçe derdikeve hizûra Melikşah, Melikşah vi keçikê bernade, bi xwe re dibe, dike bûka xwe. Di wê demê Mehr jî, jî leşkeriyê vedigere tê mal. Paşê pê dihese ko dilketiya wî çûye hawariya wî. Mehr careke din vedi-gere, pey Wefayê dikeve. Diçe mala wê pîrejina ko Wefayê xeber li bal hiştibû, paşê fîr dibe ko, Melikşah dilketiya wî Wefa ji kurê xwe re biriye. Mehr dema diçe bajarê Melikşah, mêze dike ko dîlan û dewata Wefayê tê kirin. Ew dilketiya xwe ji nav govendê direvîne. Mirovên Melikşah pey wan dikevin, di rê de wan herduyan jî didin ber gullan, dikujin.

Destana ko, cengawerî, egîti, welatparêzî û mîrxasiya jinê kurd bi vekirî pêşkêş dike, destana *Dimdim* e. Ev destana bi navekî mayî destana *Xanê Lepzêrîn* an jî destana Xanê Cengzêrîn tê nasîn. Di destanê de li dijî ordiyên Faris di nav kelakê de berxwedana gelê kurd tê zimîn. Ev bûyera wek bûyereke dîrokî li dorberê kela Dimdimê di sala 1608–1610-an de qewimiye. Kurdan li dijî hêzên şah Abbas I şer kirine. Dema ordiyên Faris êrifê dibine li ser vê kelê, kurd di hundirê kelê de dicivin, bi mehan li ber xwe didin, teslîm nabin, heta ko koka wan tê. Di gelek şaxên vê destanê de em rastî berxwedan û tekoşîna jinê kurd jî tê, ew di vê berxwedanê de bi aktifî cih digrin. Bi taybetî di dawiya destanê de diya Xanê Lepzêrîn, jin, bûkên wî û jinê mayî bi cengawariya xwe ve çavê dijmin gelek ditirsînin. Ji bo ko ew bi can nekevin destê hêzên neyar, dema dijmin dixwaze dikeve kelê, ew bi destê xwe êgir berî xwe didin, xwe dişewitînin. Di şaxeke vê destanê de, jina Xan bi qîrînan ve gel hişyar dike û dibe pêşeng. Di şaxeke mayî de vê carê diya Xan li mirovan şîretan dike, navê wê Guher Xanim bûye, ew nîşan dide ko mirin ji teslîmbûnê çêtir e.⁴⁴ Angorî gotinên Guher Xanimê herkes tividarekê xwe dike û xwe amade dike. Dîsa di vê şaxê de dema jina Xan mêze dike wekî dijmin hewl dide, bikeve hundirê kelê, ew êgir berdide cebirkhana kelê, kela ji nêşkêva diteqe, di nav dumanê de dimîne, navê wê angorî vê şaxê destanê Asîme Xanim bûye.⁴⁵ Ji aliyê din bûyera kela Dimdimê derbarê dîroka tevgera jinê Kurdistanê de jî bûy-

ereke giring e. Ji ber ko ev bûyera him wek berhemeye folklorîk, him jî wek bûyereke dîrokî tê zanîn.

Civata kurd timê bi jinêng cengawer û bêtirs ve serbilind bûye. Ew timê hatine pesinandin. Di destana Rustemê Zal de, em rastî çend jinêng wisan hêzdar têng. Ji van jinan yek jî ew keça bi navê Rûdeve ye. Tu pelewana pê nikaribû. Ew û bavê Rustem gulaş digrin, ew zora Zal dibe û Zal bi wê re dizewice. Paşê Rûdewe diwelide, Rustem jê dibe. Di şaxeke mayî de, dema Rustemê Zal dinêre, keça wî li pêşberî xulamê wî Gurgîn pozê xwe xar dike, dibêje ezê te bikujim. Keça wî kincê pelewana xwe dike, diçe dikeve şikeftê serê dêwekî jê dike. Ew dêwê ko berê Rustem bi xwe cesaret nekiriye serê wî jê bike. Piştî vê bêtirsiya keça xwe, ew dibêje »heyfa vê qızê ez bikujim«, paşê dest ji kuştina keça xwe ber dide. Di destana Rustemê Zal de, jin, bûk û keç hertim bi destê Rustem têng rizgar kirin, dema ew dikevin tengasiyê, cara pêşîn ew xwe davêjin li ber bextê Rustem. Ji ber ko ew pelewan e, kes nikare nêzîkî mala wî bibe. Ew dibe parêzkarê jinêng bindest, gelek caran wan xelas dike. Dema dêwê firinde jina yekî direvîne, xarziyê wî Bêjeng, vê jinê ji dest dêw xelas dike, teslîmî mîrê wê dike. Di şaxeke mayî de, Rustemê Zal dibe serdewatiyê kurê Selmiyanî Sind, tividarekê xwe dike, diçe dewatê, xeber tê ko Dêwê Heftserî (tenê serîkî wî hebûye, serê din bi kincan ve çêkirine) bûk revandiye, ji xwe re biriye. Navê bûkê jê şimikzêr bûye. Ew lêdixe Dêwê Heftserî dikuje, bûkê hildide, vedigere tê dîghêje cihê dewatê. Di şaxeke mayî, xortek keçekê direvîne, tîne mala Rustemê Zal. Pismamên keçikê davêjine li ser mala Rustem. Rustem bi wan re dikeve şer, lê belê Rustem zora wan dibe, ji wan gelek şunda direvin. Paşê Rustemê Zal, xort û keçikê di mala xwe de xweyî dike. Di gelek şaxên destana Rustemê Zal de dema Rustem pey dijminê xwe dikeve an jî dixwaze yekî/yekê xelas bike, cara pêşîn ew diçe dibe mîvanê pîrejinekê, bi wan dişêwire, gotinê wan jî xwe re dike şîret. Ew, gelekî alîkarî û piştgirtiya Rustemê Zal dikin.⁴⁶

Welatê şahiyê

Çawa tê xuyan hemû ev destanê kurdî bi mirin û kuştinê ve diqedin. Him destanê evînê yên romantîk, him destanê namûs û helaliyê, him jî destanê cengawariyê li ser van pêwendiyêñ tirş û tal û bûyerêñ

tradejîk ava dixin. Jinên kurd jî çawa em dibînin ji van bûyeran nesîbê xwe distînin û zû-zû nagihêjin mirazê xwe. Evîna navbera du kesan ji ber gelek dijwariyan naçe sérî û sernakeve. Destana ko di naveroka wê de mirov rastî rêça mirin û kuştin û malwêrankirinê nayê, destana Sêva Hecî ye. Di vê destanê de dilê kesî ji tu kesî namîne, kêm û zêde her kes dilşa ye. Warên ko bûyerên destanê tê de derbas dixin wek cenneteke derewîn û welatê xweşiyê, şahiyê timê mirov bi mirazê xwe şâ dixin. Piştî sefereke dûr û dirêj bi zehmet, bav Sêva Hecî dide Mîr Mehmûdê Cindî. Ew, dema dilketiya xwe Sêva Hecî dibe welatê xwe, di rê de rastî şivanekî tê, ew şivan, şivanê mala bavê Sêva Hecî bûye. Heft sal şivantıya wan kiriye, angorî gotinên Sêva Hecî bavê wê bîryar girtibû wekî piştî salekê keça xwe bide vî şivanî. Bo vê yekê jî gunê Sêva Hecî gelekî li vî şivanî tê, dilê wî jî di Sêva Hecî de hebû ye. Mîr Mehmûdê Cindî ji ber zanebûna eş û jana dilan, dibêje dergistiya xwe wekî ramûsanekê bide şivîn û xatirê xwe jê bixwaze. Demek be jî Sêva Hecî û şivan hev radimûsin. Çend sal derbas dixin, ji Sêva Hecî re keçek dibe, navê wê datînin Sêva Sêvê, ew keç mezin dibe, dibe keçekte xama. Ew şivanê ko demeke berê bibû evîndarê Sêva Hecî, hê Sêva Hecî ji bîr nekiribû. Rojekê diçe Sêva Hecî birevîne. Wê çaxê xeberê hildide ko keçekte wê bûye. Vê carê tînin vê keçikê Sêva Sêva didine vî şivanî, ew jî dîghêje mirazê xwe. Di şaxeke mayî ya vê destanê de çawa em dibînin, Mîr Mehmûdê Cindî bi Gulçîcka Dilan re jî dizewice, wê jî bi xwe re dibe. Gulçîcka Dilan ji der dîtina qeytana Hemedanê (ji bo çavê bavê Sêva Hecî bibîne, wî nikaribûya bidîta), keçekê jî bavê Sêva Hecî re tîne. Çawa tê xuyan hemû kesen ko di vê destanê de hene, hemû jî dîghêjin mirazê xwe, dilşa dixin, dilê tu kesî ji kesî namîne. Bavê Sêva Hecî, Sêva Hecî, keça wê Sêva Sêva, Mîr Mehmûdê Cindî, şivan, Gulçîcka Dilan hemû bextewar in, destan bi tehrekî dilşa diqede.⁴⁷

Destaneke mayî ko bi şahiyê ve diqede jî, destana Behram û Gulendam e. Dema Behram ji raw û nêçîrê vedigere, di rê de rastî dewrêşekî tê. Navê wî Şah Mensûr bûye. Ew padişahê Helebê bûye. Behram mîze dike, rewşa Mensûr şah qet ne baş e. Di ber dilê wî de tê û sedemên bedhaliya wî jê dipirse, ew dibêje derdê dila ye. Piştî van gotinan ew ji berîka xwe du sûretan derdixe yek Gulendam e, yek jî sûretê Firîdayê bûye. Gulendam û Firîda pismamê hev bûne û gelek bedew bûne. Ji her derê kes dihatine dîtina wan. Dilê Mensûr di

Firidayê de hebûye. Dema ew van sûretan nîşanî Behram dide, Behram wê dibîne hişê serê wî diçe û dibe evîndarê Gulendamê. Bi vî tehrî Behram û Mensûr şah dibine heval, pey rêça Gulendam û Firidayê dikevin. Piştî rîwîtîke dirêj û zehmet, ew digihêjin mirazê xwe. Gulendamê didine Behram, ji ber ko gelek mîrxas bûye. Gotinê wî timê dihatin qebûl kirin, li ser daxwaziya Behram, Firidayê jî didine Mensûr Şah. Çil rojan û cil şevan dîlan û şahiya dikin.⁴⁸

Serkanî

- 1) Qanadê Kurdo, *Beytêd Kurdî* (destnivîs, xebateke neçapbûyî).
Qanadê Kurdo, ev berevoka destanê kurdî berî mirina xwe amade kiriye, di nav vê destnivîsê de heft destanan cih girtiye, ji aliyê din bo vê xebatê pêşgotinek jî nivîsiye. Di nav van destanan de çar destan, ji zaravê soranî wergerandiye zaravê kurmancî. Ev herçar destan cara pêşîn, ji aliyê Qadirî Fettahî Gazî de li Iranê di nav weşanên Unîversîta Tebrîzê de hatine weşandin, wek *Ferx û Astî, Şor Mehmûd û Merzingan, Mehr û Wefa, Behram û Gulendam*. Qanadê Kurdo sê destanê ko newerger in, wek Elî şêr, *Zembîfiroş, Hespê Resjî* aniye di nav vê berevoka bi navê *Beytêd Kurdî* de cîwar kiriye. Angorî her destanekê hejmara rûpelan dayê, wek pirtûk hejmar nedane rûpelan.
- 2) Oskar Mann, *Die Mundart der Mukri Kurden I-II*, Berlin, 1906, 1909. Oskar Mann di cildê yekemîn de çend destanê ko di nav kurdên Iranê de belav bûne, civandiye, bi kurdî, bi tîpêñ latînî çap kiriye. Di cildê duwemîn de jî, Almaniya van destanan cih girtiye, 302+478 rûpel. Ev xebata, di dema xwe de xebateke here fireh û pêşîn e ko li ser destanê kurdî hatiye amade kirin.
- 3) Heta niha çend şaxên Leyla û Mecnûnê yên folklorîk hatine berev kirin. Heciyê Cindî, *Kurdsâ Epiçeskie Pesni-Skazkî* (Beyt-Serhatiyêd Kurdî Yê Epîkî), Moskova, 1962, rûp. 163–169 (Di vê şaxê de navê destanê *Leylî û Mecrûn* derbas dibe). Ordîxanê Celîl, Celîlê Celîl, *Zargotina K'urda*, Erîvan, 1982, rûp. 132–138 (Di vê şaxê de navê destanê *Leylî û Mecrûn* derbas dine). Ji aliyê din çend şaxên vê destanê yên edebî jî hatine nivîsîn. Ji van şaxan yek ji aliyê Xarîs Bîtlîsî de, di sala 1758'an de hatiye nivîsîn. Ev şaxa paşê di di sala 1963'an ji aliyê M. B. Rudenko de ji nû ve li Moskova çap bûye. Paşê şaxeke vê destanê ya edebî bi firehî ji aliyê Şêx Mihemed Can de, li dora sala 1884'an de hatiye nivîsîn û bi tîpêñ latînî ji nû ve ji aliyê Zeynelabidîn Zinar de hatiye çap

kirin: Şêx Mihemed Can, *Leyl û Mecnûn*, Stockholm, 1993.

- 4) M. B. Rudenko, *Literaturnaya i Folkloristische Versii Kurdske Poemi »Yusuf i Zelêxe«* (Şaxên Poema Kurdî Usif û Zelêxe Yêne Edebî û Folklorîk), Moskova, 1986. Rudenko, di vê lêkolîna xwe de, şax-ekê vê destanê ya kevn ko ji aliyê Selîm Sileyman de hatiye nivîsîn bi kurdî û rûsiya wê ve tavayî çap kiriye û çend şaxên folklorîk jî pêva kiriye.
- 5) Heciyê Cindî, *Saxêd Eposa »Rustemê Zale« Kurdî*, Erivan, 1977. Heciyê Cindî, di vê berevokê de 24 şaxên destana Rustemê Zal weşandiye.
- 6) Destana Ferhat û Şîrîn her çiqas di nav kurdan de zêde belav nebûbe jî, wergerên vê destanê yên kurdî hene, binêre Berhem, hejmar 2, 1992 (Ehmed Şerîfî, *Hekîm Şêx Eliyas Nîzamîyê Kurdi*). Ehmed Şerîfî, di vê lêkolîna xwe de çawa diyar dike, Nîzamî – nivîskarê Xusrew û Şîrîn ji aliyê dê de kurd bûye. Çawa em ji *Şerefnamê fêr dibin*, mîrxasê vê destanê Ferhat jî Kurd bûye. Ji kurdên kelhor bûye: *Şerefname*, Istanbul, 1971, rûp. 23.
- 7) Qanadê Kurdo, *Beytêd kurdî* (Destnivîsa wergera Şêx Ferx û Xatûn Astî ji 30 rûpelan pêk tê).
- 8) Cigerxwîn, *Folklor Kurdi*, Stockholm, 1988, rûpel 118.
- 9) M. Ararat, *Dengbêj Kerem*, Roja Nû, hejmar 8, 1985.
- 10) *Destana Memê Alan*, Istenbol, 1978, rûp. 117.
- 11) Angorî çend şaxên Memê Alan û Zîna Zêdan, Mem ji Yemenê tê ji bo dîtina Zînê hatiye: binêre Oskar Mann, 1909, rûp. 42. Angorî vê şaxê, Mem, kurê padişahê Yemenê – İbrahîm bûye.
- 12) Oskar Mann, *Die Mundart der Mukri Kurden II*, rûp. 135–165
- 13) Qanadê Kurdo, *Beytêd kurdî* (Destnivîsa wergera destana Şor Mehmûd û Merzinganê ji 27 rûpelan pêk tê).
- 14) Ordîxanê Celîl & Celîlê Celîl, *Zargotina Kurda*, cild I, rûp. 149.
- 15) Heciyê Cindî, *Beyt-Serhatiyêd Kurdi Yêne Epîkî*, rûp. 153.
- 16) Ordîxanê Celîl & Celîlê Celîl, *Zargotina Kurda I*, rûp. 171.
- 17) Qanadê Kurdo, *Beytêd Kurdi* (Destnivîsa wergera destana Mehr û Wefa 23 rûpelan pêk tê).
- 18) Ordîxanê Celîl & Celîlê Celîl, *Zargotina Kurda I*, rûp. 147. Ji der şaxên destana Siyabend û Xecê yên folklorîk, çend şaxên vê destanê yên edebî jî hatine weşandin: Sîabandov Semend, *Siyabend û Xecê*, Erivan, 1959. Zeynelabidîn Zinar, *Siyabend û*

- Xecê, Stockholm, 1993. Koyo Berz, *Siyamed û Xeca* (bi zaravê dimilî), Stockholm, 1993.
- 19) Heciyê Cindî, *Beyt-Serhatiyêd Kurdî Yê Epîkî*, rûp. 171
 - 20) Qanadê Kurdo, *Beytêd Kurdî* (destana Şêx Ferx û Xatûn Astî, rûp. 8).
 - 21) Ordîxanê Celîl & Celîlê Celîl, *Stranê Zargotina Kurdaye Tarîqiyê*, Erîvan, 1977, rûp. 271.
 - 22) Eynî berhem, rûp. 249.
 - 23) Ahmet Aras, *Destana Ker û Kulik*, İstanbul, 1993, rûp. 54.
 - 24) Ordîxanê Celîl & Celîlê Celîl, *Zargotina Kurda I*, rûp. 160 (Navê vê Qeytana Hemedanê, di şaxeke mayî ya destanê de wek Qeytana Memûdî derbas dibe, binêre, Heciyê Cindî, 1962, rûp. 154).
 - 25) Oskar Mann, 1909, rûp. 166–205.
 - 26) Eynî berhem, rûp. 404–429.
 - 27) Roger Lescot, *Binevşâ Narîn û Cembelyê Hakkare*, Hêvî, Hejmar: 2, 1984.
 - 28) Muhsine Helimoğlu Yavuz, *Diyarbakır Efsaneleri II ve Diyarbakır Üzerine Sekiz Bildiri*, Ankara, 1990, rûp 142.
 - 29) J. S. Musaelyan, *Zembîlfiroş-Kurdskaya Poema i ee Folkornie Versii* (Zembîlfiroş – Poema Kurdî û Şaxên Wê Yê Folklorîk), Moskova, 1983, şaxa I.
 - 30) J. S. Musaelyan, *Zembîlfiroş*, şaxa II.
 - 31) J. S. Musaelyan, *Zembîlfiroş*, şaxa IV.
 - 32) J. S. Musaelyan, *Zembîlfiroş*, şaxa VI.
 - 33) J. S. Musaelyan, *Zembîlfiroş*, şaxa VII.
 - 34) J. S. Musaelyan, *Zembîlfiroş*, şaxa IX.
 - 35) Şaxa Emînê Evdal (Di nav pirtûka Musaelyan de cih girtiye).
 - 36) Qanadê Kurdo, *Beytêd Kurdî* (Ev destnivîsa şaxa Zembîlfiroş ya ko Qanadê Kurdo xwe berev kiriye ji 16 rûpelan pêk tê).
 - 37) Ev şaxa destana Zembîlfiroş wek şaxeke edebî hatiye amade kirin, di nav pirtûka Musaelyan de cih girtiye. Ji aliyê Mirad-Xanê Beyazidî de hatiye nivîsîn. Li ser vê destanê lêgerînek di kovara Pale de hatiye weşandin, binêre hejmar 3–4, 1979.
 - 38) M. B. Rudenko, *Şaxên Poema Kurdî Usif û Zelêxe Yê Edebî û Folklorîk*, rûp. 297.
 - 39) Heciyê Cindî, *Beyt û Serhatiyêd Kurdî Yê Epîkî*, rûp. 139–146.

- 40) Celîlê Celîl, *Zargotina Kurdên Surîaê*, Erîvan, 1985, rûp. 79–95.
- 41) Ordîxanê Celîl & Celîlê Celîl, *Stranê Zargotina Kurdaye Tarîqiyê*, rûp. 238.
- 42) R. Dengîr, *Berxwedankarî Gerdenezadiya Emê Gozê û Du gotin li ser Bişarê Çeto*, Rewşen, hejmar 5, 1990.
- 43) Ordîxanê Celîl, *Stranê Zargotina Kurdaye Tarîqiyê*, rûp. 304.
- 44) Ordîxanê Celîl, *Kurdskiy Geroyiçeskiy Epos »Zlatorûkiy Xan«* (Eposa Kurdî Ya Mêrxasiyê »Xanê Lepzêrîn«), Moskova, 1967, rûp. 74. Di vê berevokê de çend şaxên destanê hatine weşandin.
- 45) Eynî berhem, rûp. 119
- 46) Heciyê Cindî, *Şaxêd Eposa »Rustemê Zale« Kurdî*, Erîvan, 1977.
- 47) Heciyê Cindî, *Beyt-Serhatiyêd Kurdî Yê Epikî*, rûp. 156.
- 48) Qanadê Kurdo, *Beytêd Kurdî* (Destnivîsa wergera Behram û Gulendamê ji 56 rûpelan pêk tê).

— BEŞ IV —

Di stranên kurdî de navçeveke erotîk: memik

Di nav sedsalêن bihûrî da civata kurdî bi ci çavî pirsa jinan nihêriye? Bi alîkariya materiyalên folklorâ kurdî mirov dikare bersîva vê pirsê jî bide. Jina kurd heta ji destê wê hatiye, ya xwe kiriye, dema xwastiye, bi dilketiyê xwe re reviye, bi vê yekê ve mirov dikare bibêje hemû dijwarî û tengasiyê li pêşîya xwe protesto kiriye. Ev meteloka jêrîn vê dilsoziya jinê kurd gelek baş eşkere û îspat dike: *reva jinê edetê dinê*. Lê belê ew dorgirtina civakî, aborî û polîtîk timê riyên xelasiyê ji wê re girtine û çembera li dor wê her çûye teng bûye. Ji aliye din jina kurd stoyê xwe li hemberî van êrîşan xar nekiriye. Bi taybetî êrîşen feodalî, nîv-feodalî qet nebe bi saya folklor, stran, destan, gotinêن pêşîya û berhemêن mayî hatine protesto kirin. Jinan bi kêmanî di folklorê de ji xwe re textek ava kirine, deng û rûmeta xwe bi saya van berheman bilind kirine.

Dema mirov naveroka stranê kurdî raçav dike, mirov dibîne ko tema evînê, temake here xurt e. Di nav vê temayê de, motîva memikêن jinan cihekî bi taybetî pêk tîne. Tu beşeke bedena jinê di folklorâ kurdî de wek memikan motîveke wisan xurt û rengîn nîne. Di çend stranan de em rastî motîva lêvan jî tê. Lê belê lêv wek memikan ewqas ne balkêş in, di planeke duwemîn de dimînin û gelek caran bi peyva ramûsanê ve dikevine zikê hev, gazî hev dikan. Hejmara van stranê ko li ser memikan şax vedane, di zargotina (folklor) kurdî de digihêje dereceke bilind. Kêm û zêde her straneke kurdî ya ko li ser evînê û viyanê hatiye gotin, tê de qala memikan tê kirin. Ev stranan di nav folklorâ kurdî de bingehêne edebiyateke erotîk ya xurt pêk tînin. Bêguman nîşanêن pêl û cereyaneyeke erotîk bi tehrekî baştirîn di stranê kurdî de xwe nîşan dide. Di van stranan de hemû motîv û nîgarêne derbarê memikan bi zimanekî gelek bilind, folklorîk û giranbiha ve tê pêşkêş kirin, wek misal, keç timê dixwaze dilketiyê xwe wek

»dost« bibîne, keç wî wek »mêvan« bi nav dike û evînê li ser her tiştî re dibîne, malê dinyayê davêje alîkî:

Ha wer delal

Emîno kuro, tu şevkê

Were mala bavê min mêvanî,

Tu were tewafa cotê memikê mi zeriyê,

Ji ter re pir xwestir e, ji axatiya Remaniyê...¹

Çavê min li rênga te qerimî

Lawiko, were de tu were,

Bira serê min qurbana serê te be,

şevek şevêvan payîzan,

Mêvanê sîng û berê dosta xwe be...²

Erotîsîzm bi taybetî di stranê kurdî yên evînê de gelek xurt e. Di nav van stranan de mirov nikara rastî şop û rêçen vulgarismê û devjiheviyê bê, ebesor û pêxas, efrandarê van stranan nînin, gel bi xwe ye. Ji aliyê din dema mirov van stranan baş analîz dike, ew ji sînorê motîvên pornografîk dûr dimînin. Çawa tê zanîn armanca »edebiyata pornografîk« qamcîkirina hîsên xwendevanan yên cînsî ne. Lê ev stranê kurdî, bi hêjabûna xwe, ji sînorê vê edebiyata pornografîk gelek dûr ketine. Her çiqas carina sînorê navbera efrandinê erotîk û pornografîk dem dem zîrav dibin jî, lê belê çawa em dibînin van stranan hêjatiya xwe ya edebî wek tê xuyan bi dirêjiya salan winda nekirine, ev yeka jî bi serê xwe pîvanek e. Wek misal di nav mîtolojiya kurdî de, mîrxasa destana Mem û Zîn ya jînîn û keça Kurd Zîn, mirov çawa lê dinêre mîna Xwedake wek *Erosa Yunanî* û *Amora Romenî* bûye nîşana evînê û bi salan li ser zar û zimanê kurdan digere, ji rûmeta xwe tu tiştek winda nekiriye.

Dema gilî ji Mem û Zîn hatiye vekirin, di berhema Ahmedê Xanî de em rastî çend ıfadeyêni li ser memikan jî têñ, wek »keçen memikhinar« û »keçen memikgilover...³ Ev yeka jî nîşan dide ko, tema memikan ji berê de di nav edebiyata kurdî ya devkî û nivîskî de cih girtiye, bûye babeteke erotîk. Ji aliyê din ev dirûvlêxistinê Ahmedê Xanî, çawa

emê paşê jî bibînin, di warê navkirina formên memikan de cihekî bingehî digrin.

Peyveke erotîk: memik

Memik nîşana, zanav, kîtiya (huviyet) jinan e. Bi salan di nav her çiqlê hinerên cida de memik wek nîşana bereket û bedewiyê hatiye hesibandin. Ji der fonksiyona memikan ya mijandina zarokan, fonksiyona memikan ya here mezin bêguman erotîk e. Wek baqe gulên ko dema mirov serê xwe dixe nav, bîn dike, bi bîn û nermikiya wan mest û serxweş dibe, memik wisan di jîyîna mirovî ya cînsî de bandûrhişt in û roleke gelek mezin dilizin. Bi taybetî memikên keçan wek dewlemendî û zeynetekê hatine hesibandin. Ev bedewiya memikan bûye babeta metelokeke kurdî jî: *memikên qîza zeynet in / kelaxê pîrê robet in.*⁴ Di vî warî de bêjebendeke kurdî jî me gelekî ronî dike: *memkê xatûnê*. Bêjebenda »memkê xatûnê« bi taybetî ji bo tiştên xweşik tê bi kar anîn.⁵ Dîsa gotineke pêşıya, ev beşê bedenê, hêjayî beşê herî bedew dîtiye, wek pîvan hatiye hesibîn: *dilê tirsonek sîngê gewr nabîne*. Ji bo bal û dêna mîran bikşînin li ser xwe, jinan hertim mezinbûna »taxima memikan«ji xwe re kirine pîvan û nîşaneke jinîn. Bi saya memikên xwe yên mezin, jinan xwastine jîyîna seksuel hin jî seksueltir bikin. Di çîroka pêşketina mirovatiyê de çawa em dibînin nîşandayîna memikan di sedsalên kevn de gelek hêsa bûye û ev rehetiya jinan tu wext nebûye sedemê serêşîke civakî. Heta niha jî carcar çawa em di televîzyon, rojnama û kovaran de dibînin jinê çend êl û eşîrên afrikî bêtirs û bêşerm memikên xwe dikarin nîşan bidin. Gelo bermayîn û nîşanên vê toleransa berî hezar salan çiqas şop û rîçênen xwe di nav stranên kurdî de hiştine? Her çiqas bersîva vê pirsê armanca lêkolîna me nîn be jî, lê belê ev lêkolîna qet nebe bersîvdayîna vê pirsê hêsanter dike an jî dibe referanseke folklorîk.

Di zimanê kurdî de gelek peyvîn ko cihê memikan digrin, hene. Bikaranîna van peyvan, angorî fonksiyona memikan li gelek cihên Kurdistanê diguhirin. Peyva *memik* ji peyveke latînî tê: ango ji peyva *mamma*. Di gelek zimanîn de ev peyva li cihê dê/dayîk jî tê bikaranîn, dema zarok gazî dayîkên xwe dîkin, dibêjin »mama«... Ji ber ko memikên mîran kor bûne, pêş da neçûne, piçûk û bêfonksiyon mane, çawa em dibînin pêwendiyêن peyva memik û mîran qet tune ne. Di

hin zimanan de xwarinên ko ji bo zarokan amadebûne, tên firotin jî, bi »mama« tên bi nav kirin. Bi kurtî bingehê van hemû peyvan diçin digêjine peyva »mamma«: (dê/dayîk). Di zimanê kurdî de çend peyv hene ko gelek dişibînîn peyva mamma, wek *mak* (zaravê kurmancî), *mad* (zaravê dimilkî). Ji ber ko zimanê kurdî, zimanekî indo-ewropî ye, çawa em dibînin qet nebe koka van hemû peyvan wek hev e. Di zimanê farisî de jî, çawa tê zanin li şuna dê/dayik peyva *mader* tê bi kar anîn, ew jî nêzîkî peyva mamma ye. Ev peyva latînî angorî avahiya zimanê kurdî, bi alîkariya formê diminutif (bi saya parkîta -ik) bûye: *memik*. Di zimanê kurdî de li şuna memik carcar jî ev peyvan tên bi kar anîn: *çığık*, *bistan*, *sîng*, *pêşîr*, *paşîl*, *sîngber*, *guhan*, *hingil*... Peyvîn guhan û hingil zêdetir di zimanê argoyê de, di zimanê ebesor û pêxasan tê bi kar anîn. Ji aliyê din, çawa tê zanîn peyva *guhan* bi taybetî ji bo memikên heywanan tê bi kar anîn, wek guhanên çelekan. Peyvîn pêşîr û paşîl her çiqas li şuna memik tên bi kar anîn jî, ev peyvan zêdetir wek beşeke bedenê an jî bona kincê li dorberê memikan, derbas dibe, wek »pêşîra xwe bigrel!« (ango bişkokên li dorberê memikan bigre), an jî »perên xwe têxe paşila xwe!« (wek cihekî parastina tiştan)... Di çend stranên kurdî de emê çawa paşê jî bibînin wek misal mirov rastî îfadêن wek »paşîl tijî xurme ye« û »paşîl tijî êmîşe« tên... Li vir peyva »xurme« û »êmîş« bi tehrekî sembolîk memikên jinan îfade dîkin. Angorî cih û dema karanîna van peyvan maneyên wan jî tên guhirîn. Bi vî tehrî mirov dikare ji bo mîran jî peyvîn pêşîr û paşîl bi kar bîne. Li çend cihan misal wek dorberê Qonyayê li şuna zarok dema jîr ji memikên diya xwe dimêje, ew dibêjin »pêşîr dimije«... Di gelek stranên kurdî de em rastî îfada »sîng û ber« tên, ji vê îfadê em jê derdixin ko qala memikan tê kirin. Peyva sîng him ji bo beşê bedenê yê jorîn (ji qırıkê heta nava mirovan), him jî, ji bo cotê memikan tê bi kar anîn. Di gelek zimanan de him ji bo vê beşa bedenê, him jî ji bo cotê memikan tenê peyvek tê bi kar anîn, lê belê di kurdî de gelek peyv hene. Çawa em dibînin di zimanê kurdî de carcar ev beşan bi du peyvan ve tên bi nav kirin: *sîng û memik*. Ev peyvan wek du peyven hevnaverok (sînonîm) jî tên bi kar anîn. Bi kurtî bi peyvîn memik û sîng wek du peyvîn evînê û erotîk di stranên kurdî de zêdetir derbas dibin. Di gelek stranên kurdî de em rastî îfade »sîng û ber« jî tên. Gelo peyva ber ji ko tê? Di zimanê kurdî de peyva ber carcar ji bo fêkiyan û ji bo »pêş« (wek beşê pêşîn yê bedenê!) tê bi kar anîn. Dema mirov

maneyên vê peyvê bi memikan ve girê dide, mirov rastî şopên hevgirêdanekê tê, di vê navkirinê de mantiqekê jî dibîne. Di zimanê devkî de her çiqas peyva çıkış li şuna memik tê bi kar anîn jî, di zimanê nivîskî de em ewqasî rastî vê peyvê nayên. Di stranê kurdî qasî memikan, em rastî ifada serê memikan (bi latînî mamillan) jî tê. Serê memikan him ji aliyê tehr, reng, tam, him jî bi fonksiyonên xwe ve di van stranan de cihekî taybetî digrin. Çawa tê zanîn li dora serê memikan beşike wek baxçekî ji gupik û xalan pêkhatî jî heye, jê re bi latînî dibêjin »areola mammae« (baxçê xalan). Di straneke kurdî de qala vî »baxçê gulan« tê kirin: »Taximê sîng û berê Eyşana min gihiştine / xalêñ zer û sor ketinê«.⁶ Di çend stranan de em rastî ifada »xal û xetê memikan« tê, ev ifada wisan tê xuyanê ko ji bo van gupikêni li dora serê memikan cih digrin, hatiye bi kar anîn.

Pêşkêşkirina memikan

Di stranê kurdî de tiştê herî balkêş, piraniya stranê ko li ser memikan hatine gotin, ji devê jinan derketine. Ev yeka derbarê şkandina çend tabûyan, cihê jinan û derbarê aktîfbûna jinan di pêwendiyên cînsî de an jî derbarê rola wan di civatê de, me gelekî ronî dîkin. Di çend civatêñ islamî de li ser memikan peyivîn, stran gotin û besndayîna wan ewqas hêsa nebûye, wek çawa di zimanê tirkî de jî tê xuyan tema memikan, temake ewqas berbiçav, xurt nîne, wek stranê kurdî ewqas bi vekirî ev tema di stranê tirkî de cih nagire. Gelo mirov ji serdemêñ kevn heta niha vê yekê wek serdestîke jinan dikare bihesibîne an jî nîşan bide? Bersîva vê pirsê babeta vê lêkolîna me nîn be jî, lê belê ev yeka babeteke gelek balkêş û hêjayî lêkolîneke berfireh e.

Dema dilê keç/jineke kurd dikeve yekî, li ser bangîn dibe cara pêşîn di van stranan de, em dibînin ko ev jin memikêni xwe pêşkêşî dilketiyêñ xwe dikin, destûrekê derdixib, hemû tîrsê ji ser xwe davêjin û memikêni xwe pêşkêşî »helaliyê canê xwe« an jî »xelqê delal« û »xelqê telî« dikin. Jin van dilketiyan di kategorîke taybetî de (xelqê delal, xelqê telî) cîwar dikin û dilketiyêñ xwe ji ser her kesî re dibînin:

Dewrêşê Evdî

Minê destmala sor gul-gulî anî,

*Çifta zer memika navda girêda
Ü ber delalê dilê xwe pêşkêş danî...⁷*

Ahmedo ronî

*Ahmedo ronî, heyran navê min Besna ye,
Tili, pêçiyê mine, marmutî al şema ye,
Sîng û berê min evdala xwedê koşk sera û çîma ye,
Serê qiranê pezê xwe serda gêr ke,
Minê hemdê xwe te re destûr daye...⁸*

Ji bo ko delaliyên xwe dilsa bikin, jin hemû imkanên xwe pêşkêş dikan, pêşkêşa here giranbiha, bêguman di van stranan de cotê memikan e. Ji ber vê yekê jî gaziyên jinan tehrê xwe diguhirînin, rengekî erotîk werdigrin. Di vê strana jêrîn de de ci ji destê jinê tê pêşkêş dike:

Hey lo lo delal

*De lê lo heyran
Wezê delalê malê birêkim,
Wezê taştêkê ji delaliyê malê re çêkim
Wezê temamê rûnê Xinisan jê re lêkim,
Eger qîma delalê malê pê neyê
Wezê cotê memikan jê re pêşkêş kim.
Hey lo lo delal..*

*De lê lo heyran,
Berika Mêrdînê berikî dûz e.
Pozê Qerecdaxa şewitî li serda xûz e.
Nava sîngê mehbûbê min, evdalê
Temam zîv û zér û altûn e...⁹*

Dema kesek mizgîniya hatina lawikê (dilketiyê) keçekê jê re bîne, keçik dikare! ji cotê memikan yekî pêşkêşî kesê ko mizgînî anije, bike. Ev yeka bêguman xurtbûna evîn û hezkirina dilketiyan nîşan dide, misala kesê mizgîn tîne çawa tê xuyan ne dilketiyê keçikê ye, lê belê ew dikare memikekî xwe pêşkêşî wî kesê xerîb! bike (bêguman tenê bî riya folklorê), ev yeka jî, di realîte de xurtbûna evîna jinê temsîl dike:

*Lawiko qurba, Girîdaxa berbi welat,
Heçî kesê bibêje -Gede lawikê te hat,
Ezê çevê çepê, memikê rastê
Bidim pêşkêş, xelat...¹⁰*

Di vê strana jêrîn de, vê carê keçik amade ye wekî »ramûsana rûyê rastê« jî pêşkêşî kesê salixdayî bike:

Delalê beriyê

*Minê sonda mezin xwariye
Heçî saloxekê ji delalî malê ji me re bîne
Ezê bidim heft aşê mala bavê xwe rebenê
Li ber çemê Nisêbînê.
Eger pê razî nebû, ezê ramûsana rûkê rastê,
Bidim bi mizgînî.
Hey lolo...¹¹*

Carcar di van stranan de jin bo dilketiyê xwe hertim amade ye da lawkê wê, xwe bigihîne cotê memikan, merc û xoyan bi xwe amade dike, bêsebiriya jinan carcar ji sînoran derbas dibe. Dema ji aliyê dê/bavan de, ji aliyê mîrên xirab de tengasî û dijwarî peyda dibin, jin ji bo dilketiyê wê, xwe bigihîne cotê memikan gelekî serê xwe li ser planêن cida diêşîne. Jin naxwaze kes ji vê hevdudîtinê agahdar bibe. Dema mirov rastiyê digere jina kurd evîna du kesan ser her riştî re dîtiye, ev yeka bûye wek hîmekî felsefîk: *Kesê orta du dila û çar çavan xeber dide, bira xêrê-wayê qet nebîne.* Dema mirov li ser van peyvîn zêrîn! difikire, mirov dibîne ko jina kurd ji aliyê serbestî û daxwaziyêن xwe de çiqas rehet fikiriye. Lê dîsa jin, ji ber çend dijwariyan mecbûr dibîne xwe diparêze, wek misal jin dema »hîv winda bû« dorber tam tarî bû, wê çaxê dilşa ye û êdî »fitara xwe« dike, xwe emîn dihesibîne:

*Hîva gundê me derketiye, hîva sava
Hîv xeyidiye, tela bextê min û te re naçe ava,
Lawko qurba, hîv çû ava, paşê were,
De tu were, ser sîngê min evdala xwedê veke,
Forma toyê pêz, mastê medaka şekir ser e.¹²*

Herê de mîvan

*Mêvan, qurba herkê tu pirsa tamê mala bavê min dikî,
Tamê herî pêşin e,
Du cêrge dîwarê wî ne
Çargoşe danîne.
Paşıya tewla mala bavê min qul e,
Şev nîveke şevê tê de werê xarê.
Herke dê û bavê min pê hisyan,
Ezê bêjim - ne mîvanê sîng û berê min e,
Qerewilê şevê ye,
Şas bûye,
Hatiye avê digere, tî ye...¹³*

Di çend stranan de hevdudîtina keç/xortan bi saya pêşkêşkirina memikan, dibe edetekî nûjen û hevdem. Çawa tê xuyan, vê carê keç li diya xwe şîretan dike û ya dilê xwe venâşêre:

*Were mala bavê min keçikê bi şeve,
Ezê ciya ji xwe û delalê malê re daynim tev li heve,
Heger diyam go: »Çi bû, ci çiriya?«
Ezê bêjim: »Porkurê, edetê xort û keçê vî zemanî yek jî ev e.
Yadê, iro sê ro delalê dilê min xeyîdiye,
Ezê cotê memika bavêm deve«.¹⁴*

Di nav stranê kurdî de pêşkêşkirina memikan hemû şik, dijwarî û nebaweriyên navbera jin/mêran yekten ji ortê radike, ev ıfadeyên pêşkêş û xelatan mirov dikare bêje, di van stranan da dibin manîfestoyen evînê. Ji aliyê din çawa em paşê jî bibînin, jin dikarin van manîfestoyan biqelêşin û bavêjin alîkî. Ev yeka jî di folklorâ kur-dî de nîşanên dilsarı, heznekirin û bêdiliyê raberî me dikin. Ev protesto û dijîderketinan dîsa derbarê rola jinan de me gelekî agahdar dikin. Dema jin memikên xwe pêşkêş dike, ne tenê pêşkêşkirin, carcar qala »tapokirin«ê û »tanzîm«ê jî dikin:

Bavê Seyro
Bavê Seyro qurba! çima tu deynakî?

*Her çar malê Aluca li quna diyêr demam nakî?
Sîng û berê min keçikê weke bexçê Zinara Mêrdinê
Ji xwe re tapo nakî...¹⁵*

Di şaxeke vê stranê de ev wekî »tapo û tenzîm« derbas dibe ¹⁶.

Barîkatêñ edebî û memik

Çawa tê xuyan, dema keçekê dil kir, bêtirs dikare bi dilşahî memikên xwe pêşkêşî delalîyê canê xwe bike. Di merc û hoyêñ zewaca bêdil de, êdî keç vê comerdiyê nîşan nadîn, ewqas »sîngvekirî« nînin. Memik para kê ye? Bersîva vê pîrsê bi daxwaziya keçê ve gîrêdayî ye. Di ser-pêhatiya Hecî Mûsa û Gula Ermenî de, Hecî Mûsa tê protesto kirin, Gulê tê rûspî kirin. Ji ber ko Gulê naxwaze bibe jîna Hecî Mûsa, dilketikî wê heye, navê wî Mîksî ye. Ev keçka Ermenî enînivîsa xwe ji zûda kivş kiriye: ...*heta ez li darê dînyayê sax bim, cotê memikê min, wê ji Mîksiyê lawê apê min re be...*

*Hecî Mûsa begê ban kir:
Eman Gulê ev sibe ye, xweş sibe ye,
Tu kerem ke ezê biskê werim hinda te ye,
Ezê maç kim cotê memikê te ye.
Mîrin heye, qebra tarî mala me ye.
Gulê ban kir: Eman bego wer mebêje,
Ji dînê bavê min re pir xerab e.
Keşê rabû ji ber rahib e,
Heta ez li darê dînyayê sax bim,
Cotê memikê min wê Mîksiyê lawê apê min re be...¹⁷*

Di çend stranan de, dema dilketiyê keçekê ji meydanê vedikişe, bar dike an jî diçe dilovaniya xwe, keç sond dixwe wekî êdî sîng û berê xwe veneke, ji bo bîranîna dilketiyê xwe, ew mecbûr dimîne vê gavê davêje: ...*Ezê sîngê xwe bikim hepîxane / Destê xelqê neçe nav memikan.*¹⁸ Venekirina memikan di dawiyê de dibe beşike şînê:

*Ez ad dikim, paşî te ez sîng û beran venakim,
Por û gulîyan şe nakim,*

*Bisk gulinan dirêj nakim ji badanê,
Çavan kil nadim ji kildanê...¹⁹*

Di çend stranan de çawa pêş da tê, jin dikarin heta roja mirinê sîng û berê xwe perde kin, veşérin, çarmedora sîng biparêzin. Ji bo ko kesekî mayî destê xwe dirêjî sîng û beran neke, derî û kulekan digrin. Jin çeperan, heseran dikşînin dora memikan, wek bax û bostanekî. Lê belê dema dil kir, wê çaxê her tişt diguhire:

*Kerem ke jorê bibe ezîz mîvane,
Ji seferê hatî, eziyet dîne, ezebê girane,
Emê şermiyê bavêjin ber piyane,
Gerdana min kupî hingivîne,
Şirîn-şirîn bimijîne.
Perda edebê ji ber hilîne,
Bax û bostanê min gihiştîne.
Hesar kirî bo te min hîstine,
Bikeve nave, gul sosinan jê biçîne...²⁰*

Di van xetan de derbasbûna »perda edebê ji ber hilîne« û »emê şermiyê bavêjin alîkî ber piyane«, wek du nîşanên serbestî û rehetiya jiyana seksuel gelek giring in. Hildana perda edebê mirov dikare wek çend nîşanên jîyîna evîndariyê û jîyîna seksuel yên here bingehî, here radikal bihesibîne. Dema mirov li ser pêwendiyên jin û mîran yên cînsî difikire, ev rîzan gelek hînkar û perwerdekar in.

Fonksiyonê memikan yên din

Memik wek destxistina hewcedariyên seksuel organeke bingehî e, ji bo ko herdu alî (jin û mîr) di warê seksual de têr bin, xwe rehet bihesibînin, memik roleke mezin dilîzin, ev wek fonsiyona memikan ya yekemîn dikare bê nav kirin. Bi memikan şabûn, maçkirina wan, tevdan, gezkirin, birin û anîn û mîzdana wan, rehetîke mezin dide herdu aliyan. Ji der vê fonsiyona memikan, dengbêj çend fonksiyonê mayî jî spartiye memikan an jî memik dibin nîşanên hewcedariyên mayî, wek derman, xarin û vexwarin û mijûlî...

A. Wek Derman: Ji bo qenckirina birînên mîrên xwe, dilketiyên

xwe, di çend stranan de çawa em dibînin jinan xwastiye memikên xwe bikin derman û melhem têxin devê birînan. Him mîr, him jî jin her yek ji aliyê xwe de gihiştiye bawerîkê: *memik derman e*. Ji bo ko ber dilê birîndar de bê, stranbêja jinîn ji ser cotê memikên xwe re tu tiştekî giranbiha nedîtiye wekî pê birînên birîndaran bipêçe:

Bavê Fexro

*Ez çûme Bolindê Sebriyê Hecî ne li mal e,
Dibêni li şerê tirkâ, li pira Batmanê birîndar e,
Nizanim ci steqlala Şêx Sehîd, fermana kurdan rabûye,
Berê Sebrî tev birine dane elemane,
Ditirsim birîna Sebriyê Hecî li binya xetê,
Bê hekîm û bê derman e,
Minê cotê zermemikê xwe biqelaştı,
Jê re bikira mîl, melhem û serdermane...²¹*

Ev stranan ji alîkî de nêzîkî stranên şînê dîbin, her çiqas mirin û kuştin tune be jî, çawa tê xuyan şîn û girîk heye. Di rewşike awa de qala memikan kirin, ez bawer dikim zêdetir bi daxwaza zû qencbûna birîndar ve girêdayî ye, keçîk dixwaze bi motîva memikan hêviya xelasbûnê li bal birîndar zêdetir bike, bîna wî fireh bigre, bo vê yekê jî diçe bal hekîmê filleh (Erakêl):

Bavê Fexriya

*Bavê Fexriya qurba!
Ji înê heta înê,
Îro sê ro bavê Fexro birîndar e,
Di nav nivînê, wey li minê!
Ezê rabim daw û delingê xwe hilgêvîm,
Herim Hadbaka xopan, mala Erakêlê hekîm,
Ezê bêjim: Erakêlo qurba! sîng û berê min keçikê,
Bike melhema devê vê birînê...²²*

Di çend stranê mayî de jî, em rastî îfada wek »memik derman in« têñ. Bi taybetî kesê ko ji dilketiya xwe dûr dikeve, diçe xerîbistanê, gelek

caran bedhal dikeve, ker û gêj dibe. Keçik ji ber vî derdê dûrketinê, bi stranekê be jî, diçe hawariya wî, di ber dilê wî de tê, dixwaze timê bîna lawikê xwe fireh bigre:

Lawiko

*Dilê min li ser dilê min re kale-kale,
Îro cabek ji min re hatiye, dibê lawikê te,
Li welatê xerîbiyê nexwaşe, pir bedhal e.
Li welatê xerîbiyê ne balgî ye, ne doşek, ne perpale,
Ezê iznê ji dê bavê xwe bixwazim,
Herim welatê xerîb, xwe jê re bikim balgî,
Sîngê xwe bikim perpale,
Bila lawkê min bi kêf be, êdî menale...²³*

B. Wek Star: Memik him ji aliyê nermbûna xwe, him jî bi germbûna xwe ve wek stareke giranbiha hatiye hesibandin, wek koşk û serayê hatiye bi nav kirin. Angorî van stranan mirov tenê di nav sîng û beran de dikare bîna xwe derxe, an jî şevê zivistanê xwe di nav de germ bike: *Xwezila şevekê ji şevê cilê kanûna zivistanê / di ber sîng û berê xelka têlî de bibûma mîvan...*²⁴ Ji aliyê din di çend stranan de memik wek balgî an jî wek mesken hatine bi nav kirin:

*Çavêd xwe jê re bikim saqî wextê şerab geranê,
Sîngê xwe jê re bikim balgî wextê palvedanê...²⁵*

Di straneke mayî de jî keç sîngê xwe dike mesken wek cihekî starê:

*Sîngê mi ji te re baxçe ye,
Gul û rihan têda ye,
Meskenê min û te ye...²⁶*

Hembêzkirin ji aliyê jin û mîr de wek avahîke evînê hatiye dîtin, de-ma mîr dikeve nav sîng û beran, ev avahî hemû şana xwe di van stranan de nîşan dide:

Heso

Heso, îşev şev e, şev wê bi şili ye,

*Guhêra hogîçê te av e, avherî ye,
Were têkeve nav dest orxan-doşekê qastûkiye,
Herge qîma te dest orxan-doşekê qastûki nayê,
Ber serê te cotê zer memika serî sorî, binî spî ye...²⁷*

C. Wek Ronahiyê: Di çend stranan de memik şemal didin, wek »şemala şevê«²⁸ hatine dîtin, ronahî û tîrêjên li dorberê memikan peyda dibe, angorî baweriya dengbêj tariya şevê belav dike :

Eyşê

*Eyşê qurba, dilê min qız û bûkê van koçera,
Sîng û berê Eyşa min usa ne,
Nola hîverona van payîza ser bêderâ...²⁹*

Gelo stranbêj çawa ev ronahî û şemala memikan kivş kiriye? Bi baweriya me, ev yeka bi avahiya memikan ve dikare bê şiro vekirin. Ji ber ko di şevê tarî de angorî besên bedenê yên mayî memik baştır xwe nîşan didin (wek du çiyayên mezin) angorî besên mayî, memik wek bilindcihekî çêtir xuya dibin an jî bi peyvên stranbêj »şemal didin« wek »hîveronê« ronahiyê dibarînin.

D. Wek Mijûlî: Dema bîna lawik teng dibe, xew nakeve çav an jî li ser rî ye, diçe xerîbiyê an jî şevê dirêj dema wext derbas nabe, keç di gelek stranan de gazî lawikê xwe dike wekî bê têkeve nav sîng û beran, ji xwe re mijûl be, bi memikan şâ be, pê bilîze. Bi kurtî memik wek serkanîke bînfirehiyê û çerezê şevbihuriyê di van stranan de derbas dibin:

Şahîno

*Şahîno, dîno tu dîn î, tu ne mi distînî, ne direvînî,
Nextikê mi giran e, tê ji kû bînî,
Tu ji xwedê natîrsî etfa zîvî li ser sîngê mi dihejînî,
Sîngê mi baxşê gulan û sêvan e, dema bîna te teng bî,
Werê demekê, da tu xemên dilê xwe jê birevînî...³⁰*

Du zerî

*Canê canê,
Du zerî ber derikê mala bavê min rêze,
Xwîşka mezin ya piçûk re digot:
»Îşev mîvanekî hatiye mala bavê min û te
Rebenê pir ezîz e.
Ezê nizanim jê re çi pêşkêş, çi layîqî, çi cayîz e,
Ezê ji şekekê, nîvê şevanî,
Pêda jê re teslîm bikim cotê zer memikan,
Şevê çilan û kanûnan dûvedirêje,
Rabe, rûnê û pê bilize«.³¹*

Ji aliyê din dema dilketiyê keçekê diçe xerîbiyê, leşkeriyê an jî welatên dûr, wê demê keç memikên xwe pêşkêşî bîntengan dike:

Gondera reşê

*Wekî tê carekê mala bavê mi bivî mîvandarı,
Ezê cihê te daynim yalê odê,
Ezê cotê zer memika pêşkêşî nefsa canê tekim,
Xwe re têr şabe, hetanî sibê...³²*

Stranbêj, memik carcar jî wek besteke gerê û seyranê hesibandiye, mirov dikare têda bîna xwe derxe, kêfa xwe binêre: *Sîngê min ji xwe re bike baxel nav bigere tax bi taxe.*³³ Ji bo beden mest bibe, rehet bibe, memik wek besteke sportîf dikarin fonksiyoneke mayî jî bilîzin: ...*Delalê dilê min hatibû min bibîne/ Xwe di nav bax û bostanê min de bive û bîne.*³⁴ Ev imkana peydabûna ger, seyran û sporê, bi baweriya me, ji hebûna zêdebûna memikan tê, dilketiyê mîrîn yek çep, yek rast lê dixe, mecbûre e xwe bigevizîne, dema dil bike herdu memikan, navmemikan, serê memikan binêre, ev yeka jî hereket dixwaze, pêwist e xwe bilivîne an jî memikan yek yek bileqîne. Dema dibêjin »memik derya xorta ne«, bingehê vê baweriyyê, li ser vê rastiya jorîn ava dibe. Dema yek avjenî dike, nikare cihê xwe de bisekine, ew pêwist e xwe bilivîne. Stranbêj hemû ev rûçikên jîyînê û avahiya memikan daye li ber çavan, xwe gihandiye dinya fantaziyan.

D. Wek Çerez: Di gelek stranan de memik wek xwarinên cida derbas dibin. Em ji van stranan fam dikin ko tam û xweşiya memikan li ser zarê dengbêj demeke dirêj maye, jê têr nebûye. Çawa emê paşê ji bibînin, di gelek stranan de memik wek fêkiyan hatine nav kirin. Ji der fêkiyan em rastî ıfade û xwarinên mayî ji tên wek taştê, firavîn, şîv, paşîv, dimis, çerez, to, kebab, hingiv... Di stranekê de memik wek taştê û firavînê hatine dîtin: *Ezê serê memikê xwe biçilpînim / ji kalan re bikim taştê, ji xorstan re bikim firavînê...*³⁵

Motîva »mêtren ji heqê memikan dernakevin«

Di çend stranên kurdî û şaxên wan de çawa em dibînin, jin ewqas ji zewaca xwe dilsa nînin, mêtren wan an ji dilketiyênen wan: »mêtren ji heqê memikan dernakevin« tên bi nav kirin. Ev mîran ji aliyê jinan de carcar wek mêt nayênen hesibandin, navênen mayî li wan tên kirin, wek *mêtren çeper, şindo, şindonek, kund, kundo, nemîr, şilek, mêtren kotî, melmelestî, serjinik, pintî, serhevde, mêtren kotî, dewar, mêtren şil û şêt, mirdar...* Sedemên vê dilsariyê gelek in, wek bi darê zorê ve hatin revandin, zewaca bêdil, hewî anîn, çavderiya mîran, ji mîrtiyê ketin û gelek faktorênen mayî... Di dawiyê de, ev sartiya malê di pêwendiyênen cînsî de digihêje dereceke bilind. Êdî rehetî ji jinan re namîne:

*Yadê, navê min keçikê Besna Besnayê,
Weyla min porşorê por belayê,
Teniya Mûşê, heşa Helebê li xwe dayê,
Bavê min xêrê bikî bi çavê serê xwe nebînî.
Çawa nedame xortekî ji mala Hesen Axa apê Behri,
Simbilsorê ser xaniya, destmala dest lawika,
Roja dawet û eyd û şahiya,
Ez dame Brahîmê Temê, hirçê bûbilanî,
Kerqolanê riya Nisêbînê,
Heq ji sîng û berê min dernayê,
Yadê rebenê, Besê rebenê.*³⁶

Jin, ji mêtren ko »şevê heta sibê pişta xwe didine jinan« hez nakin. Hemû ev yekan, ji jinan re dîtina imkana dilketiyênen nû peyda dikin, wek çawa di stranekê de ji tê xuyan, jin gazî dilketiyê xwe yê nû dike:

Were teresê kuçikê mîrê min bikuje... Di van stranan de çawa tê xuyan jin gelek xemging û dilsar in:

*Deriyê mala bavê min yatamê bi toz û mij e,
De rabe teresê kuçkê mîrê min bikuje,
Tê devê xwe têxe xan û manê gerdenê,
Cotê memika ji xwe re bimije.³⁷*

Xelîlê Qazî

*Ezê Diyarbekira şewitî ketim bi müşmişê,
Toq û beniyê mi rebenê ser bejna zirav xuşexuşe,
Bira bavê min xêrê bike, xêrê nebinê,
Çawa ezê nedam Xelîlê Qazî, lawkê kurmanc,
Ezê dam kum bi qulkî ji vanê bajariya,
Ji êvarê heta sibê li ser sîngê min diponije.³⁸*

Çawa di van stranan de bi vekirî tê xuyan ko, jin ji mîrê xwe razî nîne. Di strana Xerabo ya ko di nav xetên wê de li dijî mîrê xirab protestoke gelek tûj heye, mirov dikare gelekî bi hêsanî vê nerazîbûnê bibîne. Ev strana ji devê jineke dil bi keser tê strandin, çawa em ji naveroka stranê têdighîn mîrê jînikê kesekî çavder e, jinxapînok e, di nav malan digere. Di stranê de motîva memikan gelek xurt e, jînik bi alîkariya vê motîvê qet nebe li şunda vegerîna mîrê xwe hêvî dike, gazin, lome, şîret di stranê de tevlihev dibin. Jinik bi vî tehrî hundirê xwe dirêje. Stran bi van xetan dest pê dike: *Ruhê bizdonek bi sîngê gewir şâ nabe...* Ev ifada di nav salan de bûye gotineke pêşîya û di kurdî de cih girtiye.

De Xerabo

*De Xerabo, de xerabo taximê sîng û berê mi kara xezala,
Ji te re nola qesra Pîrota li Mêrdîna şewitî, nû camkırî,
Na welle nola guşiyek tiriyê Çêlikê Elyê Remo
Di kan û mîwa xwe de nû kemilîn.*

...

*Xerabo, mal şewitîyo, ez ji te re dibêm tu her şeva Xwedê
Wer tewafa sîng û bera, ramûsanê cotê memikê mi kara xezalan.*

*Ji te re nolî sênyek berdîrê yê ter e.
Li Mêrge Mîra jorîn li Qeredaxa şewitî, tu bike parzûnan û torba,
Tu biguvişe av jê here, bi kîrê qelem traşê du dîlim ke,
Damarê geza û şekir ji nav here.
De xerabo, ez ji te re dibêm tu her şeva Xwedê,
Were li ser rûnê bixwe tev megere...³⁹*

Di çend stranan ji bo sîngtevtanek û destpaşilkekê qala parevekirin û nîvkirina sîng û beran jî tê kirin:

*Kulmalê, bangê Elegezê
Kulmalê, bangê Elegezê tê fike-fîk e,
De tu were telebextê min re,
Fîno xar ke, qotikê serda sî ke.
Agirê kulê beyta ocaxê bavê ketê,
Were xal û xetê sîng û bera,
Min û dewarê mîrê xwe nîvî ke.⁴⁰*

Di straneke mayî de jineke mîrkirî bahsa »kilîta cotê memikan« dike û kilîtê teslîmî dilketiyê nû dike:

Sebrê

*Lo lo taxima sîng û berê min ji te re,
Yek gul û yek sosin û yek çîçek e,
Tu tevî sîsed siwarê me Hesena lê peya be,
Berxo tu guleka xirab neke.
Kotî mîskînê mîrê min, fesad û dewûsê gunda xeberdar neke.
Ezê kilîta cotê zermemika teslîmî te kim, tu li cêba xwe ke,
Bîna te teng dibe, rebeno rojê carekê derî veke.⁴¹*

Formên memikan

Di stranên kurdî de dema dengbêj qala memikan kiriye gelek tiştên mayî anîne ber çavan, wekhebûna memikan û van tiştan li ser bingehêن mantiqî ava kirine. Di nav van pîvanan de tehr, reng û prosesên gihiştina memikan cihekî fireh digrin.

A. Tehrê Memikan: Dengbêj di gelek stranan de memik wek fêkiyan dîtiye û navê fêkiyan li memikan kiriye. Çima fêkî? Ez bawer dikim ji der guloverbûna memika û fêkiyan, zêdetir dengbêj ew tam ûлезета ко демекê ди fêkiyan de tam kiriye, di memikan de ji nû ve kivş kiriye an jî dixwaze kivş bike. Ji ber vê yekê jî him guloverbûn û him jî tam ûлезета memik û fêkiyan di van stranan de ketine nav hev. Ew fêkiyên ko di stranên kurdî de wek memikan hatine pejirandin û nîşandin wek misal ev in: sêv, xurme, tirî, porteqlal, hêjîr, guz, qawin, hinar, şememok...Peyva here zêdetir hatiye bi kar anîn, şemamok e: *Memkê xezala malxirab sor bûne / mîna şemamokêt deşta Hesîna.*⁴² Angorî besên Kurdistanê yên cida, cihê belavbûna stranan, ev dorber-an li ser zêdetir bikaranîna curê fêkiyan jî tesîr kiriye, wek misal di nav kurdên Sûriyê de, di nav stranekê de derbasbûna »porteqlalê Yafayê« normal e, ji ber ko, nêzîkbûna van sînoran navdariya porteqlalêν vê navçê eşkere dike:

*Li ser zilfê danî,
Xulamê cotê memikan,
Porteqalê Yafayê,
Devê dikana danî...*⁴³

Fêkiyên baştirîn li kîjan bajar, navçe an jî li kîjan herêmê digihêjin, stranbêj navê van cihan û memik gihadene hev, bi hevra bi kar anîne:

Elê Meyrê

*Ezê sîng û berê Meyrema xwe dibêjim
– Xurmek xurmê vê Bexdayê,
Hêjîrek hêjîrê vê Şengalê,
Tirîk tiriyê Bisindirê,
Qawinek qawinê Diyarbekirê,
Xort nizan be, xwe re bike çerezê şevbihêrê...*⁴⁴

Ji der tam ûлезета fêkiyan, ji aliyê din ew bîna xweş ya ko ji fêkiyan tê, vê carê dengbêj çawa kivş dike wekî ji memikan jî bîneke awa xweş tê. Di çend stranan de em rastî ıfadeyên derbarê bîna memikan tê, wek misal: *bîna memka em kotin, bîna memka em xwarin...* Ji ber ko memik

di bin kincan de zêde dimînin, ew xwey didin, wek hêkan disincirin, germ dibin, di çend stranan de vê carê em rastî ûfade »hilma memikan« tê: *hilma memka em xwarin*. Dema ev bîn û hilma memikan tevlihev dibe dinya bûye ya dengbêj.

Dengbêj memik ne tenê wek fêkiyan dîtiye, çawa di çend stranan de tê xuyan navê gelek tiştên mayî jî, li memikan kiriye. Dema memik û ev tişt dane ber hev, rûberî hev kirine, bêşik wekhevbûna van tiştan û memikan daye ber çavan, wek kanî, kulîlk, baxçe û bostan, zêr û zîv, maden, fincan....

Ci ye nêzîkiya di navbera kanî û memikan? Ez bawer dikim bersîva vê pirsê diçe digihêje wekhevbûna şîr û avê, herduyan jî mirov vedixwe, dengbêj memik wek cot kanî dîtiye, kaniyên ko li şuna avê şîr jê dikişin. Ava van kaniyan agir û şewata di dilê stranbêj çiqas dide sekinandin? Bersîva vê pirsê jî dîsa di nav fonksîyonên memikan yên duwemîn de veşartiye:

Hey lê, lê

*Hey lê, lê, hey qemerê!
Gundê Dodo du gelî ne,
Cotê zer memika cot kanî ne,
Wey malîno, hûnê qet dey nakin,
Ezê destê çav-birûyê beleka dimirim,
Hûnê bawer nakin.⁴⁵*

Lê gewrê

*Min serê memika givaşt
Sê fincan av ji hatin xwar,
Min fincanek jê vexwar,
Û ez bûme wek zîveal
Ez bûme wek merekî teyar...⁴⁶*

Di çend stranan de memik wek fincanan bi taybetî wek fincanên fer-fûrî hatine hesibandin. Ji alîkî de tehrê fincanan (giloverbûna wan, xweşikbûna wan), ji aliyê din fonksîyona (motîva vexwarinê) fincanan û memikan ji hev ne dûr in. Carcar em rastî ûfadeleyên »fincanên dest

hakiman⁴⁷ û »fincanê dest axeleran«⁴⁸ têن. Çawa di van stranan de jî tê xuyan, di salên kevn de fincanêن hakim, axa û began giranbiha bûne. Bi saya vê giranbihabûnê stranbêj xwestiye hêjabûna, giranbihatiya memikêن dilketiya xwe jî nîşan bide:

Hesreta min

*Hesreta min ji mala bavê derket,
Bi min re xeber nade
Nizanim çira?
Bejin zirav e mîna hal-halê nav geniman,
Memik spî ne mînanî fincanê dest hakimam
– Keçê, kulmalbavê,
Te goştê min helandiye
Bi waqî, bi derema
Hestûyê min helandiye
Kiriye şima...⁴⁹*

Stranbêj ji bo ko bedewî û xweşîya memikan bi tehrekî baştirîn bîne zîmîn, hemû rê û imkanêن hinerî ceribanidine. Carcar sîng wek baxçekî, di nav vî baxçeyî de memik jî wek »baqê gulan« bi nav kiriye. Di strana Eyşanê de awa tê gotin :

Eyşanê

*Sîngê gewrê baxçe ye, Eyşanê,
Baqê gula di nav da ye, Eyşanê...⁵⁰*

Mirov li vir baş têdighê ko baqê gulan memik in, di çend stranê kur-dî de carcar peyvên sîng û memik bi hevra têن bi kar anîn, di van stranan da sîng wek deşt, zozan, bostan û baxçekî fireh tê nexş kirin, memik jî di nav vî erdê fireh de cih digrin. Li vira êdî sîng li şuna memikan derbas nabin, ji ber ko qala memikan xwe tê kirin. Lê belê carina jî dema qala memikan nayê kirin, mirov vê çaxê têdighê ko peyva sîng memikan ifade dike.

B. Rengê Memikan: Di stranan de rengê memikan ji hev cida dibin. Ji aliye din besen memikan (serî, binî, xalên memikan) jî, bi rengên ci-

da carina têñ nîşan kirin. Di gelek stranan de memik wek berfa spî ne. Sedemêñ vê yekê angorî beşê bedenê yên mayî, memik zêde hatine parastin, rûyê rojê nedîtine, zêde spî mane. Her çiqas peyva gewr ne wek peyva spî be jî, li şuna peyva spî carcar em rastî peyva gewr jî têñ. Zêtir di stranêñ kurdî de memik bi rengê zer hatine nîşandin. Dema memik digihêjin, vê carê em rastî peyva sor têñ: *Memkê xezala malxirab sor bûne / mîna şememokêt deşta Hesina...* Ev sorbûn ji alîkî de bona serê memikan derbas dibe. Dema memik digihêjin, xalêñ li dorberê serê memikan çawa tê zanîn reng diguhirînin:

Eyşan

*Taximê sîng û berê Eyşana min gihiştine,
Xalê sor û zer ketinê.⁵¹*

Ji aliye din, di çend stranan de stranbêj rengê serê memikan û binê memikan, koka wan ji hev cida kiriye, serî bi taybetî sor, binî û kok jî, bi taybetî bi rengê zer û spî ve boyax kiriye, ji tonêñ tarî berbê tonêñ vekirî çûye. Bi rastî jî, angorî bin û koka memikan, serê wan zêdetir bi tonêñ tarî ne, sor, qehweyî û qemer in. Stranbêj ji bo ko vê ferqa ren gan zelaltir ji hev cida bike, çawa em dibînin ji xwe re motîva siyê peyda kiriye. Çawa tê zanîn cihê ko sí lê dikeve, angorî beşen mayî zêdetir di nav tariyê de dimîne, ev besa jî serê memikan e:

*Kezîzerê kezîzer,
Xulama memkê gulover,
Serî sor e, binî zer,
Mîna berfa newala,
Siyâ dara tim li ser...⁵²*

Tiştékî mayî jî heye, dema di stranêñ kurdî de behsa tehr û rengê memikan tê kirin, memik û tiştên here giranbiha di nav hevda hatine honandin, wek zêr, zîv, maden, fincanê ferfûrî...

Têlî

*Têlî heyran, li zozanê Serhedê dilê min bi xem e, bi birîn e,
Îşev serê birînê min girtiye temam av û xune,*

*Mala Têliyê çûye zozanê tevlê jorîne,
 Hespê min rewan bûye, şopa Têliyê digerîne,
 Ketim Pîro, Qendîl, Bingolê, Sîpanê, Şerefînê,
 Berbi Xelatê, Şuşanê, Tekmanê, hatim welatê jorîne,
 Mi xwe berda binya Kosedaxê, çend kon vegirtîne,
 Sê zerî min dî wê de serê kaniyê rûniştîne,
 Min go, gelî heval, ya mezin Têli ye,
 Herdê din jê re xizmetçîne,
 Giştî go, derewa meke, çavê te çawa ji dûrve dibîne.
 Min go, nîşanê Têliya min bellî ne,
 Yeke esmer e xwîn şirîn e,
 Çavê reşe kil kirîne,
 Tiliyê wê armûrî ne,
 Çene top, poz bele tujîne,
 Lîv tenik kaxitîne,
 Ziman celxê qelemîne,
 Diranê hûre sedefîne,
 Gerdenê spîne cembelîne.
 Memikê Têliyê fincanê ferfûrîne,
 Serê memika temamê zîvê çarcarîne,
 Koka memika temam zêrê reşadîne,
 Têli, vê sibengê ezê tiştekî bêjim, bila dilê te nemîne,
 Qedera ko berê ji bavan de hatiye nivîsandin torelîne,
 Çiqa zeriyên mîna Têli hene, para mîrkê kotîne.⁵³*

Gihiştina memikan û serhildana wan

Di stranên kurdî de memikên here baştirîn memikên ko bi hemdê xwe digihêjin, memikên ko zêde pê nehatine lîstin, memikên here ciwantir têن hesibandin. Memikên ko dest pê neketine di van stranan de memikên keçen çarde salî ne: »Xweziya min tê li wî xortî / di çarde saliya xwe de dest bavêje cotê zer memikan«. Memikên nûgihiştî, memikên keçen azep û xama angorî memikên jînên mîrkirî û pirzarok gelek hişk in û ji guloverbûna xwe tiştek zêde winda nekirine, timê gilok û gulover mane. Di çend stranan de ji bo ko vê hişkbûn û sertiya memikan bîne zimîn, stranbêj memik wek sêvan dîtine û peyva »ter« bi kar aniye. Çawa tê zanîn tişten ter gelek hişk in, natewin, formê xwe

bi carekê winda nakin, wek darên ter:

*Tu li kû da diçî yek seriya li min vegere,
Ev herdu memikên min mîna sêvîn payîzê,
Serê dara bimîne hê ter e.
Malê me danîne gundê vî quntarî,
Xwazgînçî li mala bavê min rûniştî,
Qelendê min digot, xelatê min dibirî,
Xizêma pozê min mîna çerxa felekê li hev dizvirî.
Lawikê min bona ramûsanekê,
Hate ser sîngê zeriyê, şîr tune bû, dîsa para zivirî.⁵⁴*

Di xeta dawîn ya vê stranê de derbasbûna »şîr tune bû« bêguman tunebûna mercên hevdudîtinê an jî vê rewşa nebaş nîşan dide.

Memikên ko di wextê xwe de digihêjin, di stranên kurdî de wek avahîkê, koşk û serake roj bi roj bilind dibe, hatine hesibandin, ifada »taximê memikan« piçekî jî, mîrov dikare bibêje ko li ser vê saziyê hatiye afirandin:

Xerabo
*Serê memikê min xatûnê,
Mîna tiriyê Çêlikê Eliyê Remo
Di çax û benga xwe de digihiya,
Û di mîwa xwe de dikemîlî,
Mîna quesra Pîrota,
Serê mihela Meşkîna,
Li bajarê Mêrdînê avakirî.⁵⁵*

Mezinbûn û gihiştina memikan di stranên kurdî de wek »serhildana memikan« hatiye hesibandin. Memik, çawa tê zanîn di kontakt û nêzîkiya bedenî de tesîreke gelek zû nîşan didin, bi taybetî serê memikan gelek jîndar û nazezîn in: *serê memikê te tûj in / weke serê derziya.*⁵⁶

Gulê Gulê
*Destê xwe kir paşilê,
Çi paşilek xweydayî,*

*Serê memikan hildaye,
Memik para xorta ye...⁵⁷*

Ev serhildana memikan çawa em dibînin di çend stranên kurdî de, bi serê xwe wek bûyerekê hatiye hesibandin. Memik silavan didin, deng dikin û bû lez û bez reng diguhirînin, sor û zer dabin...

Eman, eman dotmam

*Vî kerî pezê çendî va ye,
Nêriyê nav de notla ga ye,
Lawikê min qesta sîng berê min kiriye,
Cotê memikan jê re silav daye.⁵⁸*

Dilber

*Cotê memikê mi keçikê, mîna du kewê gozel,
Bi sariya sibehê re,
Li paşilka mi keçikê dikin şere-şero.⁵⁹*

Memikên keçen nûgihiştî an jî memikên ko zêde nebûne »destmala dest xortan« çawa me li jorê jî gotibû hişk û gulover in, wek sêvan: Memikê dosta min sêvê sor in / Hêdî bidine ber wan gezane.⁶⁰ Çawa tê zanîn tiştehî hişk û sert têrînîn, ji ber vê yekê jî dengbêj memik û sêv wek hev dîtiye, an jî tiştekî mayî anîye li ber çavên xwe: *Sîngê vê teresbavê hişk bû / Mîna helawa Entabê / Bi çakûç û tevşoyêl Destê neçaran û merengozan nedikşîya.*⁶¹ Ji aliyê din dengbêj wek fêkiyê ko digihêje û ji ciqlê darê dikeve, dema gihiştina memikan jî tespit kiriye:

Bedewê

*Girîdaxa ber bi dunê,
Sûret sor bûne xal ketinê,
Par vî çaxî memkê kewa min tune bû,
Îsal vî çaxî hatine ber ketinê...¹⁸¹*

Di hin stranan de wek kulîlk, gupikên daran çawa vedibin, memik jî

wisan dipiškivin an jî dipeqin. Dema memik mezin dibin, ew dikarêng angorî dengbêj kirasên keçan jî bidirînin: ...*memkê te li du cî kiras didirî*.¹⁸²

Guhastina formê memikan

Ew bedewî, guloverbûn, hişkbûn û rengîniya memikan çawa em dibînin di çend stranê de winda dibin. Di van stranan de em rastî peyvîn mizdan, tevdan, gez kirin, givaştinê tê. Piraniya van stranan ji devê mîran derdikevin. Ev yeka jî nîşan dide, mîr li dijî guhirîna formê memikan nerazîbûna xwe li hemberî jinê nîşan dide: *Memkê vê tolbavê sistbûne ji mizdanê*.¹⁸³ An jî çawa di straneke mayî de tê xuyan vê carê mîr ji zêde tevdana memikan gazinê xwe dike: *Ezê orta sîng û berê kawa xwe dinêrim / Gişte xirte-xale bi nîşana tevdanê*.⁶⁵ Carcar jî çawa em dibînin ji ber çend sedeman wek ji hev dûr ketin û dilsariyê memikên jinê »bê tîmar« dimînin:

Sêmalو gundo

*Ez çûme derê çeman, çemê sar in,
Zozanê bavê te bilind in,
Berfû baran lê dibarin.
Îsal sala hefta ye,
Berî lawkê min ketiye,
Welatê xerîb û xurbetê,
Sîng û berê min fadilê!
Bê mihas û bê timar in.
Yar, yar, yar xopano gundo!...*⁶⁶

Ji ber tevdan, mizdan û gezan an jî sedemên mayî çawa tê xuyan di van stranan de memik êdî wek memikên kevnejinan ji hev çûne, wek goşte kelax in, çilmisîne û vê rewşê bala dengbêj gelek kişandiye.

Dizêñ memikan û micizeya vebûna bişkokan

Di nav stranê ko li ser memikan de hatine gotinê, peyva ko zêdetir li bala mirovan dikşîne, bêguman peyva bişkok e. Ci pêwendiyêñ

memik û pişkokan hene? Di serdemên kevn de jinê kurd memikên xwe bi pêşîrdank (berpêşîr, çıkışbend) ne diparastin, tenê memikên xwe di bin kincên bişkokkirî de vedişartin, lê belê dîsa jî rîskê xuyabûna memikan hertim zêdetir bû. Ji ber van sedaman di gelek stranan de motîva bişkokan wek motîveke şer û dew derbas dibe. Ji aliyê mîran de kîmbûn an jî tunebûna bişkokan şahîke here mezin! hatiye hesibîn. Di stranan de em rastî vekirina bişkokan (bi destê mîran) nayêن. Ev yeka jî nîşan dide ko tenê îrada mîran roleke ewqas mezin nalîze. Daxwaza jinê zêdetir giringtir e. Ji ber hevdu famkirin û hevdu hizkirinê çawa em dibînin pişkokên pêşîran carina bi xwe jî vedibin! Dema bişkok vedibin, memik bi xwe difirin derva. Di bin vebûna van bişkokan de bêguman daxwaz û evîna jinê roleke mezin dilîze. Ji ber vê yekê jî dizêن memikan hertim nagihêjin armanc û xwaziyêن xwe.

Jina kurd hebûna memikên xwe angorî memikên mîran (yên korbûyî, şundamayî) hertim wek serdestîke mezin dîtiye. Bo vê yekê jî parastina memikên xwe û pirsa pêşkêşkirina wan, di van stranên lîrikî de cihekî fireh digre.

Angorî daxwazî an jî bêdiliya jinê demên vebûn / pevxistina bişkokan ji hev cida dibin. Biryar dîsa di destê jinan de ye. Ji ber vê yekê jî dizê memikan hertim bi hêsanî nagihêjin armancêن xwe: *Ezê dikim herim diziya cotê zer memikan / Destê min kete moriyê lingan.*⁶⁷ Dizêن memikan her rê û imkanan diceribînin wekî xwe bigihînin cotê memikan :

*Ay ay li min, kubarê dinê!
Derê Meşkîna xopan bi şewitî, ne tu der e,
Pozê kela Mêrdînê bişewitî, tim rasere.
Xweziya ez bibûma zêrekî mehmûdî,
Ji xanboxaza qirikê xwe berda,
Nava cotê sîng û bera!
Sîng û berê xelka têlî kaleboze spî ne,
Mîna baxçekê Siltan Evdilhemîd,
Bi şev û rojê qereqol û newbet tim li ber tê!
De ay ax li min, of of li min!
De ax ax li min, tengezar im Xwedêwo.*⁶⁸

Lê dema jinekê dil kir, wê çaxê bişkok êdî xwe vedibin. Çima xwe ved-

ibin? Ji naveroka stranan em fam dikan ko, êdî her tişt bi hemdî xwe, bi qamê xwe dimeşe, du dil bûne yek. Dema du kesan hev hez kir, bêguman bişkok êdî xwe vedibin, kes pişkakan venake. Di van stranan de bişkok ya diqetin, ya difilitin..! Avahiya lêkeran (verb) timê pasîf in. Ev hilbijartina gramatîkî, ji alîkî de rola zorê ji ortê radike. Çawa di stranekê de tê diyar kirin êdî »sî û şeşbişkokên zîvîn« hatine vekirinê, kê vekirine? Ev yek nayê zanîn, wek micizekê evînê tê xuyan:

*Delalo, mi bêrî kir, te bêrî kir,
Riya Mendara şewitî li newalê me li hev hêvî kir
Bişkokê mi rebenê xwedê filitî, sînga gewr spî kir.⁶⁹*

...

*Vî zinarî li me sî kir
Bişkok qetiya, sîng spî kir,
Emrê minî sed salî hebû,
Minê te re tev nîvî kir.⁷⁰*

Di stranê Zerî domamê û Merdînê de çawa em dibînin di navbera lawik û keçikekê de li ser memikan tê deng dikan, şer û dewek heye, dîtinêna cida davêjin ber hev. Angorî naveroka van strananê dirêj, misal wek strana Zerî domamê, dema keç pey miyên xwe diçe, erdê dikeve »sêsed û şest şes bişkokên« keçikê diqetin, lawik wê çaxê memikên keçikê dibîne. Lê belê cara pêşîn keçik van bawerî û dîtinêna lawik qebûl nake, xwe li dijî van »îftîran« û »bêbextiyan« diparêze û ji lawik dipirse:

Zerî domamê

— *Kuro kulmalo, ya bêbextî serda hato,
Te wextê serê zer memikê dîne,
Nav û nîşanê wan çiye, ci nîne ?*

...

— *Kuro kulmalo, te wexta çifte zer memikê mine zer dîbûn
şede, şudê te kî, kî bûn ?*

Paşê di navbera keç û xort de ev diyaloga jêrîn derbas dibe. Keçik di dawiyê de têdighê ko bi rastî lawik memikê wê dîtine, kesekî nas e:

*Keçê, kulmalê, wextê min çifte zer memikê te zer dibûn,
Neh hebe li wêderê hezire sekinibûn:
Sê heve Celalî bûn,
Sê heve Rojikî bûn,
Sisêye Sîpikî bûn.*

— *Kuro, kulmalo, hersêkê Celalî qaçaxê çiya bûn,
Hersêkê Rojkiye vireke derewîn bûn,
Hersêke Sîpikî razgone, cînarê mala bavê min bûn,
Usa ne te çifte zer memikê mine zer dîne...⁷¹*

Him di strana Zerî domamê de, him jî di strana Merdînê de çawa tê xuyan bi rastî lawikan memikên van keçikan dîtine. Ji ber vê yekê jî keçik cotê zer memikan xwe pêşkêşî »helaliyê canê xwe« dike. Çawa di straneke mayî de jî tê xuyan, hertim kilît di destê jinê da ye: *Heger tu pirsa kilita cihê memikan dikî / qifil û mifte destê min e.*⁷² Di gelek stranan de berî ko bişkok vebin, cara pêşîn dest li ser morî û zêrên li sto û gerdenê tênen û diçin. Her çiqas fonksiyona morî û mircan û zêran cida be jî, di her sîngtevdanekê de ew tênen qetandin. Di stranê kurdî yên evînê de morî û mircan, zêr û zîvîn gerdenê û bişkok wek motîv, bedewîke mezin pêk tînin, xemleke bêhempa didin van stranan.

Dema jinek dil nake yek dest bavêje cotê memikan êdî derge têngirtin. Jina kurd di vî warî de gelek serhişk e, gavekê paş da navêje. Dema Zîn ji ser Memê re tu kesekî nahebîne, heft dergê mala bavê wê yên pola timê girtî dimînin:

Memê û Zînê

*Zînê got:
— Heft dergê mala bavê min, heft jî pola ne,
Temam qerebaşî pelewan e,
Heqê bavê kê heye,
Vê êvarê devê xwe bigihîne xala sîng û berane...⁷³*

Hertim ne tenê mîr li pey jinan in, carina jî jin pey mîran in, qayde û qanûnan davêjin alîkî. Angorî erf û edetêne kurdan ev jinan,

xortxapînok in. Gelek caran ev jinan wek »jinên nav malan« têni bi nav kirin. Di destana Zembîlfiroş de, dema Xatûn dil dike wekî Zembîlfiroş bibe dostê wê, Zembîlfiroş vê yekê naxwaze. Lê dîsa jî ev xatûna dewlemend, xortxapînok û provakatîf sîng û berê xwe vedike, dixwaze wî ji rê derxe: ... *Derî dadaye / Ser sîng û berê xwe vedeya*.⁷⁴ Dema jinek sîng û berê xwe yekten, nêşkêva li pêşberî mîrekî veke, bêguman ev tabloya nûpêkhatî dikare hiş û mêtûyê stranbêj tevlîhev bike, çokêñ stranbêj bilerzîne, wan welat welat bigerîne:

*Sînem delalê çaxê min û te,
Li çemê mîra li hev seyran kir,
Min serê xwe danî bû li ser çoka,
Jêlîl temâşeyî xalan û biskan kir.
Dema çavê min li sîng û berê Sînema min diketin,
Misir, Beyrût û Şamê tê ra xuya kir.*⁷⁵

Cenga li ser memikan

Di çend stranan de jina kurd zêdebûna hejmarêñ dilketiyan wek telukeke li dijî memikêñ xwe dîtiye û li dijî van êrîşan parastina memikêñ xwe di hin stranan de dike pirseke sereke. Li ser memikan cengê mîran, wek êrîşen polîtîk bi nav kiriye, carcar jî rewşa Kurdistanê û ev êrîşen li dijî memikan rûberî hev kiriye. Cengê li ser Kurdistanê wek cengê li ser memikêñ xwe dîtiye. Ev motîvîn polîtîk û evînê di van stranan de ketine zikê hev:

Bejna min

*Bejna min, nazik e, ta rihana şeng e,
Sûretê min usa ne, notla hermûşê peng e,
Sîng û berê min usa nim,
Notla text û payê Kurdistanê,
Îsal heft sal e, danzdeh qirala li ser qal û ceng e.*⁷⁶

Di straneke mayî de, dema li ser memikan tê sekinîn, em rastî ifadeke wek vê ifadê têni: ...na welleh nola Sîltan Reşîd, şert û qayîşê heft duwelê ecnebi li ser e... Di van stranan de derbasbûna van ifadeyêñ polîtîk û

dîrokî rengekî gelek hinerî tevî van stranan dike. Ji alîkî de jî, jinê him hebûna xwe ya jinîn û him jî telukeyên li dijî hebûna welatê xwe xwastiye bîne zimîn. Di straneke mayî de, stranbêja jinîn hêjabûna memikên xwe wek »paytextê mîrê Kurdistanê« dibîne:

Derdo

*Kuro mi j'te re ne go,
Zimanê te qelem e, sîngê mi defter e,
Serê sibehê, mînakî melayê diwanzde elîm,
Tu dixwînî li ezbere.
Sîng û berê mi etîma Xwedê,
Mînanî paytextê Kurdistanê,
Salê diwanzde meh,
Şer û qewxeyê diwanzde,
Dewletê ecnebî, daîm li ser.*⁷⁷

Çend motîfên dînî û memik

Ji der motîvên polîtîk, di çend stranan de hin motîvên dînî (olî) jî, bi tema memikan ve tevayî derbas dixin. Jina kurd di van stranan de zêdetir pesnê memikên xwe dide, bi alîkariya îfadeyle dînî »edebiyateke memikan« diafrîne. Di van stranan de wek misal em rastî îfadeyle fitir, zekat, melek, xwedê, rojî, paşîv, hec, teberik, şêx û mele têñ. Ji ber ko di nav her civatekê de bîr û bawerî, motîv û nexşen olperestî (dînî) timê bi rûmet bûne, stranbêj xwastiye jî vê rûmetê behrekê girê bide, jê îstîfade bike. Lê belê çawa em dibînin, stranbêj hêjabûn û giranbihabûna memikan li ser van xemlên olperestî re girtiye, cihekî hin jî rûmettir daye memikan. Di van stranan de memik bûne zêr û zîv, maden û wek bihuşteke derewîn, rengîn û şengeşox:

*Wele sîng û berê min evdala xwedê,
Mînanî baxçekî Zinara Mêrdînê,
Serê salê sê cara zekatê mala Xwedê lê dikeve, lo!...⁷⁸*

Di straneke mayî de ya ko evîna li ser keçeye tîrk têda derbas dibe, memik wek fitara êvarê hatiye bi nav kirin:

Keçêdînê

*Lê gewrê, lê xezalê,
Kanî rinda nav malê,
Weyla mi memik xwarê,
Memik fitara êvarê.
Keçê dînê tu zanî,
Te ez kuştım, te ez helandim,
Tu b'kurmancî nizanî,
Asker oldum peyade,
Te'lîm bilmem ne çare...⁷⁹*

Di strana din de jî, çawa em dibînin vê carê li ser memikê Eyşê »cotek melek« dixwînin.⁸⁰ Dema memik têx xuyanê micizeyên nedîtî, bûyerên nehêvîkirî dikarin peyda bibin, wek »Eger vekim bişkokê sîng û berokê memikane / Heciyê vejerin ji riya Mekane«⁸¹, »Eger hûn bişkokêd sîng û berokan vekin/ Wê miriyên gora zêndî bikin«.⁸² Dema memik vedibin, stranbêj ji Xwedê re hurmetan dişîne û şikiran dike: »Sîng û berê wê gulbarane/ Ezê bîhn kim, ji xuda bikim şikirane.«⁸³ Di straneke mayî de, motîvên olperestî û tema memikan bi temamî ketine zikê hev:

*Were mala bavê min derî veke, bê bismila,
Gava tu ketî cem min, te lihêf bilind kir,
Bê yarebî, sed maşalla,
De gava devê xwe avêt xebxeba çînaxî, qirika minî poşnaqî,
Te devê xwe qirika min deranî, bê yarebbî, hemdulla,
Sîng û berê min te re bozî-beyazî,
Mîna beyaz kaxita destê xoce û mella.⁸⁴*

Çawa di straneke mayî de jî em dibînin, vê carê cotê memikan ji bo xêr û xweşiyê bîne, bona dergekî xêrê li pêşîya xêrxwazan veke, wek teberik tê pêşkêşkirin:

De gidyano
De gidyano! De gidyano!
Navbeyna min û bejna zirav bi dîwar e,

*Alî kils, yek nikar e.
Cotê memkê min xanim xatûnê,
Yek sêv, yek porteqal e.
Keçikê gazî dîkir digo: Lo...lo lawiko,
şevkê ji nîvbenda şeva û pê ve,
Were tewafa sîng û berê min keçikê,
Ji te re xweştir e,
Ji teberika mala şêxê Kal e.
Ji girêdana piştê ber jor de,
Tu çi dixwazî ez minêkarim,
Ji girêdana piştê û ber jêr de,
Ez mirida şêxê Kal im,
Çi bixwazî ez nikarim.⁸⁵*

Di dawiya vê stranê de, tiştekî gelek balkêj jî, keçik bedana xwe ji piştê (navê) ve dike du beşa: beşa jor, beşa jêr. Di navbera herdu beşan de besa girêdanekê jî dike, beşa jor sîng û ber tev de pêşkêşî lawikê xwe dike, beşa jêr bi tehrekî gelek nazik perde dike. Ev yeka jî nîşan dide ko, di stranên kurdî de navça here erotîk memik in, ji navê berbi jor. Motîvên li ser beşen bedenê yên mayî (ji navê berbi jêr) wek navçêن erotîk ewqas balkêş nînin.

Peydabûna temaya »jinên memikfiroş«

Tema »Jinên memikfiroş« zêdetir di nav stranên ko ji devê mîran derketî, cih digre. Mîrên ko evîndar bûne, hertim çawa di van stranan de tê xuyan, negîhiştine daxwazên xwe, hêviyên wan nehatine cih. Ji ber vê yekê jî, van mîran di hembêza xem û xeyalan de ji xwe re imkan û mecalên nû peyda kirine, wan di zerya xewnerojan de bi tehrekî hinerî avjenî kirine, çûne û hatine, bona ko ji xwe re cote memik dest bixin. Em di çend stranan de rastî peyvên dikan, suk û bazar, mişterî, kirîn û firotin... têr. Ji ber çend dijwarî, bêgavî û bêmecaliyên jîyînê, stranbêj xwe avîtiye ber bextê xem û xeyalan. Di van stranan de keç hertim di rola memikfiroşek, xort jî di rola mişterîkî de ye:

*Helîmcanê
De bi can be, Helîmcanê,*

Î lê Helîmcanê,
 Heyran ez ne tî me,
 Û ez ne birçî me.
 Ez li ber sîhka Bitlîsa xopan rûniştîme.
 Î lê Helîmcanê,
 Heke tu avkişênî, ez gelek tî me,
 Heke tu nanpêj î, ez gelek birçî me,
 Heke tu sîngfiroşî, ez mişterî me,
 Heke tu nafroşî,
 Roj hizura heq,
 Ezê li ser pela selatê,
 Destê min û dewa te
 Ezê li Helîmcana xwe de'weçî me...⁸⁶

Di van stranan de derbasbûna peyvîn sîngfiroş û mişterî, ji alîkî de evîndariya mîr çiqas bi şewat e, gelek baş eşkere dike. Bêguman ev peyvan ji kirîna memikan zêdetir, destxistina memikan ifade dîkin. Bi gotineke mayî hêviyên hevdudîtinê, evînê eşkere dîkin. Li vir mirov nikare pêwendiyên ekonomîk û bazirganî bîne bîra xwe, wek misal: – *kawa min mesîya dikanê / memik birin firotinê.*⁸⁷ Di vê stranê de tişê ko mirov jê derdixe ne kirîn û firotina memikan e, mebest hêviya destxistina memikan e, ev yeka tenê di nav sînorê daxwazekê de dimîne.

Çawa me berê jî gotibû, dengbêj di navbera fêkî û êmîş û memikan de tu cidadîk nedîtiye, wek »paşîl tijî êmîş e«.⁸⁸ Li vir peyva êmîş li şuna memik hatiye bi kar anîn, ciyê ko fêkî û êmîş li tê kirîn û firotinê. Angorî dengbêjê mîrîn û fantaziyên wî, li wir mirov dikare memikan jî, ji xwe re peyda bike. Ji ber vê yekê jî pey riya sûkê (pazarê) ketiye û ji keçikê pirs kiriye: *Zer memika nafroşî?*⁸⁹

Ji bo kirîna memikan ci ji destê mîr tê dide, yek û du nabêje, timatî û çikûsiyê davê alîkî:

Seyran

Seyranê, min xulama te li wî devî,
Gundo, lo malîno, ezê bextê we ketime,
Gazin-loma ji min nekin,

*Ezê terka çav-birûyê Seyrana Mele Mûsa nakim.
Hetanî serê Qereşdaxa xopan,
Ranebe mîrg û zevî.
Seyranê minê sond xariye
Gere sûretê te sor bidim ber vî devî.
Seyranê, min xulamê te wî devî, xeberdanê,
Gundo, lo malîno, ezê bextê we ketime,
Hûnê gazin-loma min nekin,
Memikê Seyrana min wisan in:
Serî sor in kokê wan spî ne,
Notilî sêvêd Xelatî ne,
Notilî xurmê Herebî ne,
Na wele, notilî tiriyê Rewanê sincirîne,
Wê anîne hefa mala firotinê,
Herke xelqê rabe bide mal-halê dinê,
Ez sêfilê xadê rabim bidim,
Herçar mîngê xwe têr ber dotinê,
De bavê, Seyran xeyidiye bi min re nayê...⁹⁰*

Gelek caran memik di stranan de wek sêvên firotinê hatine nîşandan. Çawa me li jor jî gotibû, ji aliyê tehr, tam û lezet û hişkiya xwe ve, dirûvê memikan angorî dengbêj gelek li sêvan ketiye, wek hev hatine hesibîn. Ew bedhalê ko cotê memikan wek derman dîtiye, çawa di stranekê tê xuyan, dîsa riya dikanê digere:*Memik sêv e li dikanê.*⁹¹

Bi kurtî mirov dikare bibêje ko di hemû van stranan de ev motîvên li dora tema memikan berev dibin, nîşan didin ko, memik bi salan wek nîşaneke mezin ya şaxsiyeta jinan hatiye pejirandin. Bi kêmanî materiyalên folklorîk vê rastiyê ji me re pêşkêş dikin. Ji aliyê din li ser jîyîna seksuel ya jinêk kurd, di paşerojê de, ev stranan wek referans dikarin gelek zaniyariyên kîrhatî raberî me bikin.

Serkanî

- 1) Roja Nû, hejmar: 27. Ev kovara ko bi kurdî û bi fransî du zimanan hatiye weşandin û di navbera salêن 1943–1946 li Beyrûtê der-kețiye, çapa nû: Uppsala, 1986.
- 2) Heciyê Cindî, *Kilamêd Cimaeta Kurdaye Lîrîkiyê*, Erîvan, 1972, rûp. 39.
- 3) Ehmedê Xanî, *Mem Zîn*, Istenbol (werger: M. E. Bozarslan) 1975, rûp. 193, 108.
- 4) Heciyê Cindî, *Mesele û Xeberokêd Cimaeta Kurd*, Erîvan, 1985, rûp. 344.
- 5) M. U. Xamoyan, *Ferhenga kurdî-Rusîye Frazêologî*, Erîvan, 1979, rûp. 160.
- 6) Nura Cewarî, *Stranê Kurdaye Cimaetiyê*, Erîvan, 1983, rûp. 128.
- 7) Nura Cewarî, rûp. 166.
- 8) Nura Cewarî, rûp. 137.
- 9) *Kürt Halk Türküleri (Kilam û Stranên Kurd)*, Ankara, 1991, rûp. 178. Amadekar: Mehmet Bayrak).
- 10) Heciyê Cindî, rûp. 71.
- 11) Cigerxwîn, *Folklorâ Kurdî*, Stockholm, 1988, rûp. 133.
- 12) Ordîxanê Celîl & Celîlê Celîl, *Zargotina Kurda*, Moskov, 1978, cîlt : I, rûp. 373.
- 13) Heciyê Cindî, rûp. 110.
- 14) Celîlê Celîl, *Zargotina Kurdê Suriyê*, Erîvan, 1985, rûp. 241.
- 15) Cigerxwîn, rûp. 112.
- 16) Zeynelabidîn Zinar, *Xwençe V*, rûp. 48.
- 17) Roja Nû, hejmar: 18.
- 18) Qanadê Kurdo, *Beytêd Kurdî* (ev xebata Qanadê Kurdo berî mirîna wî wek destnivîs hatiye amade kirin, hin çap nebûye.
- 19) Qanadê Kurdo, Beytêd Kurdî. Di nav vê xebata neçapbûyî de, Qanadê Kurdo çend destanêن ko di nav Kurdên Îranê de belav bûne, qilibandiye zaravê kurmancî. Ji aliyê din çend destanêن

zaravê kurmancî jî, yên wî xwe berev kirine, di nav vê destnivîsê de cih girtine).

- 20) Qanadê Kurdo, Beytêd Kurdî (destnivîs).
- 21) Mehmet Bayrak, rûp. 101.
- 22) Celîlê Celîl, rûp. 223.
- 23) Cigerxwîn, rûp. 116.
- 24) Cigerxwîn, rûp. 164.
- 25) Qanadê Kurdo, *Beytêd Kurdî* (destnivîs).
- 26) Qanadê Kurdo, *Beytêd Kurdî* (destnivîs)
- 27) Heciyê Cindî, rûp. 73.
- 28) Ferhat, *Govend – Kürtleri Türkülerinden Ölenmek*, Köln, 1990, rûp. 13.
- 29) Ordîxanê Celîl & Celîlê Celîl, *Zargotina Kurda*, cîlt I, rûp. 411.
- 30) Hawar, hejmar: 37.
- 31) Heciyê Cindî, rûp. 33.
- 32) Nura Cewarî, rûp. 145.
- 33) Qanadê Kurdo, *Beytêd Kurdî* (destnivîs).
- 34) Qanadê Kurdo, *Beytêd Kurdî* (destnivîs)
- 35) Hawar, hejmar: 38.
- 36) Cigerxwîn, 151.
- 37) Celîlê Celîl, rûp. 245.
- 38) Celîlê Celîl, rûp. 216.
- 39) Roja Nû, hejmar: 36.
- 40) Heciyê Cindî, rûp. 71.
- 41) Ji arşîva M. Ararat.
- 42) Segvan Abdulhekîm, *Mehmed Arîfê Cizirî kewê ribad e*, Stockholm, 1990, rûp. 30.
- 43) Roja Nû, hejmar: 56.
- 44) Nura Cewarî, rûp. 149.
- 45) Heciyê Cindî, rûp. 122.
- 46) Roja Nû, hejmar: 6.
- 47) Heciyê Cindî, rûp. 201.
- 48) Heciyê Cindî, rûp. 198.
- 49) Heciyê Cindî, rûp. 201.
- 50) Celîlê Celîl, rûp. 270.
- 51) Nura Cewarî, rûp. 128.
- 52) Roja Nû, hejmar: 55.

- 53) Ji arşîva M. Ararat.
- 54) Ji arşîva M. Ararat.
- 55) Roja Nû, hejmar: 27.
- 56) Zeynelabidîn Zinar, *Xwençe III*, Stockholm, 1991, rûp. 45.
- 57) Roja Nû, hejmar: 55.
- 58) Heciyê Cindî, rûp. 115.
- 59) Roja Nû, hejmar: 45.
- 60) Heciyê Cindî, rûp. 115.
- 61) Zeynelabidîn Zinar, *Xwençe II*, Stockholm, 1990, rûp. 109.
- 62) Heciyê Cindî, rûp. 30.
- 63) Qanadê Kurdo, *Beytêd Kurdî* (destnivîs)
- 64) Heciyê Cindî, rûp. 76
- 65) Heciyê Cindî, rûp. 47.
- 66) Hawar, hejmar: 6.
- 67) Heciyê Cindî, rûp. 108.
- 68) Cigerwxîn, rûp. 146.
- 69) Celîlê Celîl, rûp. 245.
- 70) Ordîxanê Celîl & Celîlê Celîl, cîlt I, rûp. 353.
- 71) Heciyê Cindî, rûp. 88.
- 72) Hawar, hejmar: 28.
- 73) Nura Cewarî, rûp. 162.
- 74) J. S. Musaelyan, *Zembîlfiroş – Destana Kurdî û Şaxên Wê*, Moskov, 1983, rûp. 138.
- 75) Mele Mehmed Dêrşewî, *Mıştaxa Çiya – Ji Gotinê Pêşîya*, Stockholm, 1989, rûp 137.
- 76) Heciyê Cindî, rûp. 163.
- 77) Roja Nû, hejmar: 11.
- 78) Cigerwxîn, rûp. 147.
- 79) Roja Nû, hejmar: 57.
- 80) Ordîxanê Celîl & Celîlê Celîl, rûp. 411.
- 81) Qanadê Kurdo, *Beytêd Kurdî* (destnivîs)
- 82) Qanadê Kurdo, *Beytêd Kurdî* (destnivîs)
- 83) Qanadê Kurdo, *Beytêd Kurdî* (destnivîs)
- 84) Celîlê Celîl, rûp. 250.
- 85) Roja Nû, hejmar: 8.
- 86) Roja Nû, hejmar: 22.
- 87) Heciyê Cindî, rûp. 145.

- 88) Nura Cewarî, *Kilamêd Cimaeta Kurdaye Govendê*, Erîvan, 1964,
rûp. 64.
- 89) Cemîla Celîl, *Stranê Cimaeta Kurda*, Erîvan, 1977, rûp. 34.
- 90) Heciyê Cindî, rûp. 41.
- 91) Celîlê Celîl, rûp. 255.

Bîbliyografiyaya folklorâ kurdî

Di vê bîbliyografiyayê da 125 serkaniyên ko li ser folklorâ kurdî hatine wêşandin, cih girtine.

- Abbas, Hilmi, *Altkurdiche Kampf und Liebeslieder*, München, 1964.
- Abdulhekîm, Segvan, *Mehmed Arîfê Cizirî kewê ribad e*, Stockholm, 1990.
- Akreyî, Ezîz Reşîd, *Çirok û Serhatiyên kurdî*, Den Haag, 1982.
- Aras, Ahmet, *Ker û Kulik -Mîtolojiya kurdî de Destanek*, Istenbol, 1993.
- Aras, Ahmet, *Siyabend û Xecê-Mîtolojiya Kurdî de Destaneke Evînî*, Izmîr, 1993.
- Balî, A., *Gotinên Pêşîyan Ên Kurdî*, Istenbol, 1993.
- Bayrak, Mehmet, *Kürt Halk Türküleri*, (Kilam û Stranên Kurdî), Ankara, 1991.
- Berz, Koyo, *Na Xumxum a*, Uppsala, 1989.
- Berz, Koyo, *Siyamend û Xecê (şaxeke edebî)*, Stockholm, 1993.
- Blau, Joyce & Hakem, Helkewt, *Perles d'un collier*, Paris, 1981.
- Blau, Joyce, *Mémoire du Kurdistan*, Paris, 1984. (Rûpelên 15-100 ji nimûneyên folklorâ kurdî pêk hatiye.)
- Blau, Joyce, *Contes Kurdes*, Paris, 1986.
- Bois, Tomas, *Kurdische Volksdichtung*, Bonn, 1985.
- Bozarslan, M. Emîn, *Mîr Zoro-Meselokêd Lawiran I*, Borås, 1981.
- Bozarslan, M. Emîn, *Gurê Bilurvan-Meselokên Lawiran II*, Borås, 1982.
- Bozarslan, M. Emîn, *Kêz Xatûn-Meselokên Lawiran III*, Borås, 1982.
- Bozarslan, M. Emîn, *Serketina Mişkan-Meslokên Lawiran IV*, Uppsala, 1984.
- Bozarslan, M. Emîn, *Pepûk-Meselokên Lawiran V*, Uppsala, 1985.

- Bozarslan, M. Emîn, *Melayê Meşhûr -Pêkenokên Melayê Meşhûr*, Uppsala, 1986.
- Bozarslan, M. Emîn, *Masiyên Bejî* - Pêkenokên Gelî I, Uppsala, 1987.
- Bozarslan, M. Emîn, *Ji Dîna Dîntir* - Pêkenokên Gelî II, Uppsala, 1988.
- Bozarslan, M. Emîn, *Ilmê Tûrik* - Pêkenokên Gelî III, Uppsala, 1989
- Bozarslan, M. Emîn, *Bûka Gulsûn* - Pêkenokên Gelî IV, Uppsala, 1990.
- Bozarslan, M. Emîn, *Mela Kulî-Pêkenokên Gelî V*, Uppsala, 1991.
- Brunel, A., Gulusar, *Contes et legendes du Kurdistan*, Paris, 1946.
- Cankurt, *Zembîlfîroş-Hozana Çîrokî Ya Bi Nav Deng Bi Derxistineke Nû*, Bonn, 1987.
- Celîl, Celîlê, *Zargotina Kurdê Surîaê*, Erîvan, 1985.
- Celîl, Cemîla, *Kilamêd Cimaeta Kurda*, Erîvan, 1964.
- Celîl, Cemîla, *Kilam û Miqamêd Cimeta Kurda I*, Moskov, 1973.
- Celîl, Cemîla, *Stranê Cimaeta Kurda*, Erîvan, 1977.
- Celîl, Cemîla, *Kilam û Miqamêd Cimeta Kurda II*, Moskov, 1986
- Celîl, Ordîxanê, *Dîlokêd Cimaeta Kurda*, Erîvan, 1964.
- Celîl, Ordîxanê, *Destana kurdî Ya Mêrxasîyê »Xanê Lepzêrîn«*, Moskov, 1967.
- Celîl, Ordîxanê, *Mesele û Metelokêd Cimaeta Kurda I*, Erîvan, 1969.
- Celîl, Ordîxanê, *Mesele û Metelokêd Cimaeta Kurda II*, Erîvan, 1971.
- Celîl, Ordîxanê, *Stranê Zargotina Kurdaye Tarîqiyê*, Erîvan, 1975.
- Celîl, Ordîxanê & Celîl, Celîlê, *Mesele û Metelokêd Cimeta Kurda (bi Rûsî)*, Moskov, 1972
- Celîl, Ordîxanê & Celîl, Celîlê, *Çîrokê Cimaeta Kurda*, Erîvan, 1974
- Celîl, Ordîxanê & Celîl, Celîlê, *Zargotina Kurda I-II*, Moskov, 1978.
- Celîl, Ordîxanê & Celîl, Celîlê, *Gulançikzêrîn* (Nimûneyên folk-lora Kurda), Erîvan, 1984.
- Celîl, Ordîxanê & Celîlê, Celîl & Celîl, Zîna, *Çîrok, Efsane û Rîvayetên Kurdi* (bi Rûsî), Moskov, 1989

- Celîl, Zîna & Alenis, A., *Çirokêñ Kurdi Yêñ Gelî* (bi zimanê Lîtvani), Bîlnus, 1977.
- Cewarî, Nura, *Kilamêd Kurdaye Govendê*, Erîvan, 1964.
- Cewarî, Nura, *Afirandariya Kurda Ya Stranêñ Gelî* (bi Rûsi), Erîvan, 1971.
- Cewarî, Nura, *Stranê Kurdaye Cimetiyê*, Erîvan, 1983.
- Chaliand, Gerard, *Poesie Populaire des Turcs et des Kurdes*, Paris, 1961.
- Cigerxwîn, *Folklora Kurdî*, Stockholm, 1988.
- Cigerxwîn, *Gotinê Pêşîya*, Şam, 1957.
- Cindî, Heciyê & Evdal, Emînê, *Folklora Kurmanca*, Erîvan, 1936.
- Cindî, Heciyê, *Hikyatêd Cimaeta Kurdiê*, kitêba I, Erîvan, 1961.
- Cindî, Heciyê, *Hikyatêd Cimaeta Kurdiê*, kitêba II, Erîvan, 1962.
- Cindî, Heciyê, *Stran û Çirokêd kurdi Yêñ Epîki*, Moskov, 1962.
- Cindî, Heciyê, *Hikyatêd Cimaeta Kurdiê*, kitêba III, Erîvan, 1969.
- Cindî, Heciyê, *Kilamêd Cimaeta Kurdaye Lîrîkiyê*, Erîvan, 1972.
- Cindî, Heciyê, *Şaxêd Eposa »Rostemê Zale« Kurdi* (bi Rûsi), Erîvan, 1977.
- Cindî, Heciyê, *Hikyatêd Cimaeta Kurdiê*, kitêba IV, Erîvan, 1980.
- Cindî, Heciyê, *Mesele û Xeberokêd Cimaeta Kurda*, Erîvan, 1985.
- Cindî, Heciyê, *Hikyatêd Cimaeta Kurdiê*, kitêba V, Erîvan, 1986.
- Çem, Mûnzûr, *Tayê Kilamê Dêrsimi*, Stockholm, 1993.
- Deniz, Huseyin, *Gotnê Pêşyê Kurda*, Istenbol, 1991.
- *Der Löwe des Daroghas und andere kurdische Fabeln* (Ji aliyê Kurdê Awusturyê bi Almanî hatiye weşandin), St.Polten & Wîen, 1992.
- Dêrşewî, Mele Mehîmûd, *Mıştaxa Çiya ji Gotinêñ Pêşîya*, Stockholm, 1989.
- *Destana Memê Alan*, Istenbol, 1978.
- Dijwar, Egîd, *Yekitiya Çûkan- Çirokêñ kurdi*, Stockholm, 1990.
- Düzungün, Mustafa, *Dersim Türkülerî*, Enqere, 1992.
- Erdem, Hüseyin, *Siyabend û Xecê* (Almanî û Tirkî), Essen, 1985.
- Evdal, Emînê, *Memê û Zînê*, Erîvan, 1958.
- Farizof, I. & Rudenko, M., *Çiroken Kurdi* (bi Rûsi), Moskov, 1959.
- Ferhat, *Govend - Kürtleri Türkülerinden Öğrenmek* (bi Tirkî û Almanî), Köln, 1990.

- Fettahî Qazî, Qadirî, *Mehr û Wefa*, Tebrîz, 1966.
- Fettahî Qazî, Qadirî, *Sêx Senan*, Tebrîz, 1967.
- Fettahî Qazî, Qadirî, *Behram û Gulendam*, Tebrîz, 1968.
- Fettahî Qazî, Qadirî, *Şor Mehmûd û Merzingan*, Tebrîz, 1969.
- Fettahî Qazî, Qadirî, *Şêx Ferx û Xatûn Astî*, Tebrîz, 1972.
- Fattahî Qazî, Qadirî, *Seid û Mîr Seyfuddin Beg*, Tebrîz, 1976.
- Fattahî Qazî, Qadirî, *Amsal va Hekam-e Kurdî*, Tebrîz, 1985.
- Helimoğlu, Muhsine, *Cigaramın Üstünde Bir Topal Karinca*, Ankara, 1992. (Piraniya van çirokan li gelek herêm û deverên Kurdistanê hatine berev kirin).
- Heqî şeweys, Ismail, *Qise-î Pêşinan*, Bexda, 1933.
- Hugo, Makas, *Kurdische Texte im Kurmanci-Dialekte aus der Gegend von Mardin*, Leningrad, 1926.
- Kurdo, Qanadê, *Beytêd Kurdî* (destnivîs e).
- Lerx, Peter, *Forschungen über die Kurden und die iranischen Nordchaldäer I-II*, St.Petersburg, 1857-1858.
- Le Coq, Albert von, *Kurdische Texte*, Berlin, 1903
- Lescot, Roger, *Textes Kurdes I-II*, Paris-Beyrut, 1940-1942.
- Lescot, Roger, *Çirokên Kurdî*, Stockholm, 1987.
- Levendî, Mahmûd, *Mala Xwedê* (Pêkenîn), Stockholm, 1992.
- Mackenzie, D. N., *Kurdish Dialect Studies II (tekstên folklorîk)*, London, 1962.
- Malmîsanij, *Folklorê Ma Ra Çend Numûney*, Uppsala, 1991.
- *Mam und Zin* - Kurdishes Volksepos in der Fassung von Roger Lescot und L. Ch. Wentzel, Zurich, 1980.
- Mann, Oskar, *Kurdische-persische Forschungen*, Abt. IV: Die Mundart der Mukri Kurden I-II, Berlin, 1906-1909.
- *Mem and Zin*, *Kurdistan's national epic*, Amsterdam, 1968.
- *Mem och Zin*, Helsingfors, 1980.
- Metê, Hesenê, *Ardû* (kurteçîrokên gelêrî), Stockholm, 1990.
- Mihotulî, Selahaddîn, *Çirokên Kurdan*, Istenbol, 1991.
- Mokri, Mohammed, *Guranî ya Taranahaya Kordî*, Tehran, 1951.
- Mokrî, Mohammed, *La Legende de Bizan-û Manija*, Paris, 1966.
- Musaelyan, J. S., *Stranên Kurdî Yêñ Gelerî* (bi Rûsî), Moskov, 1985.
- Musaelyan, J. S., *Zembîlfiroş-Poema kurdî û şaxên wê Yêñ Edebî û Folklorîk*, Moskov, 1983.

- Nebez, Cemal, *Sprichwörter und Redensarten aus Kurdistan*, München, 1970.
- Nebez, Cemal, *Kurdische Märchen und Volkserzählungen*, München, 1972.
- Orbelî, I. A., *Li Muksiyê Jîyîn û Folklor* (bi rûsî), Moskov, 1982.
- Paul-Marguerite, Lucy & Bedirxan, Kamuran, *Proverbes Kurdes*, Paris, 1936.
- Pîremerd, *Diwanzde Siyarê Meriwan*, Suleymaniye, 1935.
- Prym, E. & Socin, A., *Kurdische Sammlungen*, St. Petersburg I-II, 1887–1890.
- Resûl, Îzzettîn Mustafa, *Edeb-î Folklorî Kurdî*, Bexda, 1970.
- Resûl Îbrahîm, Şukriye, *Pendî Pêşîniyan û Qisey Nesteqî Kurdî Nawerokî Fikrî-w-Edebî*, Bexda, 1984.
- Reş, Konê, *Ji Zargonina Kurdî- Serpêhatiyê Mîran*, Beyrût, 1991.
- Rudenko, M. B., *Çîrokên Kurdî Yêñ Gelî* (bi Rûsî), Moskov, 1970.
- Rudenko, M. B., *Poeziya Kurdî Ya şînê* (bi Rûsî), Moskov, 1982.
- Rudenko, M. B., *Şaxen Edebî û Folklorîk Yêñ Poema kurdî »Yusif û Zelêxa«* (bi Rûsî), Moskov, 1986.
- Sabar, Yona, *The Folk Literature of the Kurdish Jews*, Michigan, 1992
- Sarbajîrî, U., *Gewherê Goraniyekanî Hesen Zîrek*, Bexda, 1981.
- Secadî, Aladdin, *Rîstey Mirwari I-XIII*, Bexda, 1956–1983.
- Soane, E. & Nikitin, B., *Çîroka Suto û Tato* (çapeke teze, bi kurdî û Ingîlîzî), London, 1988 .
- Şemo, Erebê, *Die drei Glatzköpfe-Kurdische Volks-märchen*, Berlin, 1977.
- Tîgrîs, Amed & Motkî, Roman, *Ken û Girîn* (Pêkenîn), Stockholm, 1989.
- Xal, M., *Pendî Pêşînan*, Bexda, 1957.
- Yavuz, Muhsine Helimoğlu, *Diyarbakır Efsaneleri*, Istanbul, 1993. Herdu cild bi hevra (cild I: 1989, cild II: 1990).
- Wentzel, Luise Charlotte, *Kurdische Märchen*, Düsseldorf, 1978.
- Wikander, Stik, *Recueil de textes kourmandji*, Uppsala, 1958.
- Zaza, Nureddine, *Contes et poemes Kurdes*, 1974.
- Zinar, Zeynelabidîn, *Xwençe I* (Gotinêñ Pêşîyan, Kilam-Dilok û Çîrok), Stockholm, 1989.

- Zinar, Zeynelabidîn, *Xwençe II* (Kilam-Dilok û Çîrok),
— Stockholm, 1990.
- Zinar, Zeynelabidîn, *Xwençe III* (Kilam, Meselok û
Çîrok), Stockholm, 1991.
- Zinar, Zeynelabidîn, *Xwençe IV* (Kilam, Lawija Mesîh, Meselok û
Çîrok), Stockholm, 1990.
- Zinar, Zeynelabidîn, *Xwençe V* (Kilam, Serpêhatî, Meselok û
Çîrok), Stockholm, 1991.
- Zinar, Zeynelabidîn, *Xecê û Siyabend* (şaxeke edebî), Stockholm,
1992.
- Zinar, Zeynelabidîn, *Xwençe VI* (Kilam, Serpêhatî, Meselok û
çîrok), Stockholm, 1993.